

Yon

Yon beleŋ mere igiŋ Yesu niŋ yitiŋ gayen kayyiŋ

Mere beleŋ po al hiriŋ

1 ¹Be, haŋkapyā wor po megeŋya naŋkiŋya ma forok yekeyabe Mere goyen hinhin. Mere gobe Al Kurunya hinaryum. Irde Mere gobe Al Kurun. ²Yeŋbe megeŋya naŋkiŋya ma forok yekeya Al Kurunya hinaryum. ³Det kurun gabe yeŋ hitte mat gab Al Kurun beleŋ forok yiryiŋ. Det kurun forok yiryiŋ gayen Mere go miŋmoŋ manhan forok ma yewoŋ. ⁴Irde yeŋbe Al Kurunya hugiŋeŋ heŋ heŋ gote miŋ al, irdeb alyā bereya Al Kurun yikala yird yird hulsi. ⁵Irdeb hulsi goreb kidoma bana melak heŋ hiyen. Irkeb kidomayen saŋiŋ beleŋ epte ma wor po isikamde hiyen.^a

⁶Be, Al Kurun beleŋ al kura teŋ kerke wayyiŋ. Deŋembe Yon. ⁷Yeŋbe hulsi goyen goke al momoŋ yire yeŋ wayyiŋ. Gogab al tumŋaŋ meremiŋ nurde hulsi goke dufaymiŋ tareŋ irnayiŋ yeŋ nurde wayyiŋ. ⁸Goyenbe Yon yiŋgeŋbe hulsi moŋ. Yeŋbe hulsi goyen goke po tagale yeŋ wayyiŋ. ⁹Hulsi fudinde alyā bereya Al Kurun yikala yirde hiyen gobe Yon kamere gab megen wayyiŋ.

¹⁰Yeŋ hitte mat gab Al Kurun beleŋbe megeŋ gago iryiŋ. Irkeb waŋ megen gar hinhin. Goyenbe al megen hinhan mar gare keneŋ bebak ma tiyamiŋ. ¹¹Yeŋbe yiŋgeŋde alyā bereya wor po hitte waŋ yeŋya hinhin gega, go ma nurd unenbe igiŋ igiŋ ma iramiŋ. ¹²Goyenpoga al kura pel ma irde dufaymiŋ yeŋ ge tareŋ iramiŋ marbe Al Kurunyen dirŋeŋ weŋ heŋ heŋ saŋiŋ yunyiŋ. ¹³Dirŋeŋ weŋ hamiŋ gobe megen niŋ mata ma gama irde Al Kurunyen dirŋeŋ weŋ hamiŋ. Irde alyen dufayde ire uŋyat matare ma Al Kurunyen dirŋeŋ weŋ hamiŋ. Yeŋbe Al Kurunyen dufayde po dirŋeŋ weŋ hamiŋ.

^a **1:5** Miŋ kurabe: Goyenbe kidomare niŋ alyā bereya beleŋ keneŋ bebak ma teŋ hanyen.

¹⁴Be, Mere gore po al heŋbe neŋya hinhet. Irdeb tareŋmin turŋuŋ yaŋ wor po goyen dilniniŋde wor po keneŋ hinhet. Tareŋmin turŋuŋ yaŋ gobe Al Kuruŋ beleŋ Urmiŋ uŋkureŋ muŋ goyen unyiŋ. Yeŋbe al bunineŋ yirde faran yurd yurd matamiŋ kuruŋ wor po. Irde mere fudinde manan maŋiŋ wor po hinhin.

¹⁵Be, Yon Baptais beleŋ yeŋ ge kuware tagalde gaha yeŋ hinhin: “Al gabe ne beleŋ dineŋ himyen al go goyen. Yeŋ ge yeŋbe gaha dineŋ himyen: ‘Al harhokner wayyeŋ al gobe ne kawan ma himiriŋya bikkeŋ bikkeŋ wor po hinhin. Niŋgeb deŋemya tareŋminiŋyabe nere folek wor po,’ dineŋ himyen gobe gogo,” yiriŋ.

¹⁶⁻¹⁷Be, saba saŋiŋbe Al Kuruŋ beleŋ Mose haniŋde kerke yeŋ beleŋ tagalyiŋ gega, bunineŋ dirde faran durd durdya mere fudindeya gobe Yesu Kristu haniŋde kerke yeŋ beleŋ dunyiŋ. Niŋgeb yeŋ beleŋ bunineŋ dirde faran durd durd mata gobe kuruŋ wor po geb, neŋ tumŋan guram dirde tareŋ dirde go hende hugineŋ duneŋ teban dirde hiyen. ¹⁸Al Kuruŋbe al kura kintiŋ miŋmoŋ gega, Al Kuruŋ Urmiŋ uŋkureŋ muŋ goreb Al Kuruŋbe gwahade yeŋ kawan dikala dirde hiyen. Yeŋbe Al Kuruŋya tumŋande, irde yeŋya tumŋan haryen.

Yon Baptais beleŋ saba tagalyiŋ
(*Mat 3:1-12; Mak 1:1-8; Luk 3:1-17*)

¹⁹Be, Yerusalem taunde niŋ Yuda marte doyaŋ mar beleŋ Yon Baptais goyen, “‘Gebe al ganuŋ?’ iney gusuŋan irnayeŋ,” yineŋ Al Kuruŋ doloŋ ird ird mata doyaŋ marya Liwai marya kura hulyaŋ yiramiŋ. ²⁰Be, mel go waŋ gusuŋan irkeb Yon gobe helwaŋ ma hiriŋ. Irdeb kawan keŋkelak po, “Nebe Mesaia moŋ,” yinyiŋ. ²¹Irkeb sopte gusuŋan irdeb, “Niŋgeb gebe ganuŋ? Ge gayenbe Elaia?” inamiŋ. Inkeb wol heŋbe, “Moŋ, nebe yeŋ moŋ,” yinyiŋ. Irkeb mel gore sopte po, “Niŋgeb Mose beleŋ Al Kuruŋyene mere basaŋ al kura wayyeŋ yiriŋ go goyenbe ge gago?” inamiŋ. Irkeb Yon beleŋ wol heŋbe, “Moŋ po,” yinyiŋ. ²²Irkeb mel gore, “Niŋgeb gebe ganuŋ? Mere bebakkeŋ kura dirkeb mulgaŋ heŋ kuŋbe hulyaŋ dirhaŋ mar goyen bebak yirtek,” inamiŋ. ²³Irkeb Yon beleŋbe Al Kuruŋyene mere basaŋ al Aisaia beleŋ mere tiyyiŋ goyen goke yeŋbe,

“Nebe al kura sawsawa po kuruŋ naŋa bana goŋ heŋbe,

‘Doyaŋ Al Kuruŋyene beleŋ sope irde huwa irnan!’ yeŋ hiyeŋ yeŋ katiŋ al go goyen,” yinyiŋ.

Aisaia 40:3

²⁴Gwaha yinkeb Yuda marte tikula saŋiŋ po gama irde haŋyene Farisi mar kura Yuda mar beleŋ hulyaŋ yirke wayamiŋ gore, ²⁵“Gebe Mesaia moŋ, Elaia moŋ, irde Al Kuruŋyene mere basaŋ al yitiŋ goyen moŋ yaha gega, daniŋ geb alya bereya baptais yirde ha?” iney gusuŋan iramiŋ. ²⁶Irkeb wol heŋbe, “Nebe fe uliŋ po baptais yirde hime. Goyenbe deŋ haŋ bana goŋbe al kura deŋ beleŋ al gwahade yeŋ ma nurd uneŋ haŋ al

kura hi. ²⁷Yenbe harhokner ga wayyen. Ne al gahade gare epte ma yen ge ten meten kurun titek hime. Kahan basanminde nin kan urgun kan yugu ten ten gobe meten kurun mon gega, go wor epte mon yen nurde hime,” yinyin.

²⁸Be, mata ten hinhan kurun gabe Betani taunde, Yodan fe siya kurhan Yon Baptais belen alya bereya baptais yirde hinhin belen gon forok yirin.

Yesube Al Kurun Urmin

²⁹Be, ferd faymindebe Yesu go Yon hitte wan hike kenenbe alya bereya gor gabu irde hinhan mar goyen, “Al Kurunyen sipsip al dirin fonen nen ge ten gitik irtin go iro wan hi iro kennan. Yen kamyen gore gab megen nin marte mata bulun kurun gayen pasi iryen. ³⁰Nebe al gayen gake yenbe, ‘Al kura harhokner wayyen al gobe ne kawan ma himirin ya bikken bikken wor po hinhin. Ningeb tarenminbe nere folek wor po,’ yimin gogo. ³¹Ne belen wan alya bereya baptais yirde himyen gabe al gayen Israel mar yikala yirmeke kenen beak tinayin yen baptais yirde himyen. Goyenpoga ne wor bikkenbe Mesaiabe al goyen yen beak ma ten hinhem,” yinyin.

³²Irdeb Yesu baptais irkeya mata forok yirin goyen goke Yon Baptais belen gahade momon yiriyin: “Be, nan kinde mat Holi Spirit kalyingi kattin yara ten ulin hende hike kinmin. ³³Ne wor go ma nurde unmewon gega, fe belen po alya bereya baptais yirayin yen hulyan niryin Al gore, ‘Al kura Holi Spirit katen yen hende hike kenayin al goreb Holi Spirit belen po alya bereya baptais yiryen,’ ninyin. ³⁴Ningeb mata gwahade goyen yen hitte forok yeke kinmin geb, gago al gabe Al Kurunyen Urmin dinen hime,” yinyin.

Al karwo Yesuyen komatmin hamin

³⁵Be, sopte fay urkeb Yon gobe komatmin irawa goya gor huwarde hinhan. ³⁶Irkeb Yesu wan kun hike kenenbe, “Al Kurunyen sipsip al dirin dirnen iro kini,” yinyin.

³⁷Be, komatmin irawa gobe Yon belen gwaha yeke nurdeb Yesu gama irde kwaryum. ³⁸Gama irde hike Yesu belen fulgan kan yenenbe, “Derbe da nin nurde wan har?” yinyin. Irkeb irem gore wol henbe, “Rabai, gebe dare hen kun ha?” inen gusunan iraryum. (“Rabai” gobe Grik mere matbe “tisa” yen hanjen.) ³⁹Irkeb Yesu belen wol henbe, “Wayyi, wan gabe kiniryen,” yinyin. Irkeb irem gore gama irde kunbe hinhin gasun goyen kenaryum. Irdeb naja dilinbe 4 kilok wawunbana hiri geb, goyen nalube Yesuya gor po hinhan.

⁴⁰Be, Yonyen mere nurde Yesu gama iraryum al kurabe Andru. Yenbe Saimon Pita kulin. ⁴¹Yenbe Yesuya hen gabe gor mat po itin Saimon nin kun nan kinyin. Irdeb kenenbe, “Deyyabe Mesaia kenhar,” inyin. (Mesaia

gobe Grik mere matbe Kristu.) ⁴² Gwaha inenbe Saimon goyen Yesu hitte tawayyinj. Tawake Saimon goyen Yesu belej kenenbe, “Gebe Yon urmin Saimon. Gebe Sifas ginen hinayinj,” iniyinj. (Sifas gobe Grik mere mat Pita.)^b

Yesu belej Filipya Natanielya komatminj yiriyinj

⁴³ Be, go feraminj kunj fay urkeb Yesu go Galili nanjare kwe yenj kunj hinhin. Kunj henya Filip kenenbe, “Wanj gama nira,” iniyinj. ⁴⁴ Filipbe Betsaida taunde ninj al. Andruya Pitaya wor gor ninj po.

⁴⁵ Be, Filip go kadam Nataniel nin nankenenj kurinj. Kunj kenenbe, “Nenbe Mose belej saba sanjinminde yenj ge kayyinj, irde Al Kurunyen mere basanj mar mananj yenj ge asande kayaminj al go goyen kenhet. Yenbe Nasaret ninj al Yesu, Yosep urminj,” iniyinj. ⁴⁶ Irkeb Nataniel belej wol henbe, “Nasaret taunde matbe da iginj forok yiyyen? Epte monj geb,” iniyinj. Irkeb Filip belej, “Wake kure, irde ga kena,” iniyinj.

⁴⁷ Be, Yesu belej Nataniel wanj forok yeke kenenbe, “Be, Israel mar al fudinde wor po yenj kentek albe gago. Yenbe usi ma tenj hiyen. Hubu wor po,” yirinj. ⁴⁸ Irkeb Nataniel belej, “Gebe daha mat nurd nunha?” inenj gusunanj iriyinj. Irke wol henbe, “Gebe Filip belej kunj ne ninj ma ginkeya fik he yokjare hike genhem,” iniyinj. ⁴⁹ Gwaha inkeb Nataniel belej, “Rabai, gebe fudinde Al Kurun Urminj. Gebe Israel marte Doyanj Al Kurunj,” iniyinj. ⁵⁰ Irkeb wol henbe, “Fik he yokjare hike genhem ginmeke goke tenbe gago dufayge ne ninj tarenj irha? Mata gog munj po monj geb. Gote folek mata tinenj turunj yanj kurayen kurayen wor hako yenenj henj taha geb,” iniyinj. ⁵¹ Irdeb sopte gaha iniyinj. “Fudinde wor po dinenj hime, denbe nanjinj hol yeke Al Kurunyen miyonj belej megen mat hiryonj hende Al Kurunj hitte hurkunj megen katenj tenj hike yennayinj. Irde hiryonj gobe ne Al Urminj gayen yenj bebak tinayinj,” iniyinj.

Yesu belej fe tigiri tike wain hirinj

2 ¹ Be, nanja fay irawa hubu hekeb Galili nanja bana gonj ninj taun kura Kana gorbe al kura bere tirinj gote dula mata kurunj forok yirinj.

² Yesu milinbe dula mata kurunde gor hinhin. Yesu wor Galili nanjare hinhin. Ningeb yenya komatminja wor hoy yirkeb gor kwaminj.

³ Be, dula mata kurunde gor ninj wainbe hubu hirinj. Irkeb Yesu milinj belej wanbe Yesu goyen, “Mel gabe wain minjon hahanj,” iniyinj. ⁴ Irkeb Yesu gore wol henbe, “Bere,^c danij geb gwaha gwaha tiya ninenj ha? Mata tinenj turunj yanj titek nalube hako geb,” iniyinj. ⁵ Gwaha inkeb milinj

^b 1:42 Sifas gobe Yuda marte mere, irde Pita gobe Grik marte mere. Deje irawa gote minbe ‘hora kurunj’. ^c 2:4 Yesube Mesaia meten goyen minj uryinj geb, milinj goyen bere iniyinj gogo.

belen gor niŋ meten mar goyen, “Yen belen daha kura tinan dinkeb go po gama irnaying,” yinyin.

⁶Be, Yesu hinhin ya bana gonbe Yuda marte matare haniŋya kahaŋya halde ig ulin titek fe farde hanŋyen kuwe hora belen po yirtin karkuwan 6 gayen hinhan. Kuwe unŋkurenbe fe 100 lita gwahade gon hitek. ⁷Irkeb Yesu belen meten mar goyen, “Kuwe ga fe yunke makin henan,” yinyin. Irkeb fe yunke wan tumnan makin hitin ala tiyamin. ⁸Irkeb, “Be, fe kura farde yukuŋ dula mata ga tonan hen hi al go unnan,” yinke yen yirin gwahade po tiyamin. ⁹Gwaha tikeb dula mata gote tonan al goreb Yesu belen fe tigiri tike wain hirin goyen tunan uryin. Goyenbe wain gobe meten mar belen gor niŋ kura ten wayhan yen ma nuryin. Gega meten mar gobe gwaha mat forok yihi yen nurde hinhan. Be, tonan al gore bere tirin al goyen hoy irke wakeb, ¹⁰“Albe wain igin wor po go wa yawan yunke nene hanŋyen. Irde ep nene hikeya gab wain mali malinen goyen yawan yunen hanŋyen. Goyenbe gebe gwaha ma taha. Wain iginbe kame ga yunen yen nurdeb wain mali malinen goyen hubu heke gab gago igin dunha,” inyin.

¹¹Be, Galili naŋa bana niŋ taun Kana gorbe Yesu belen hanŋkapyo wor po mata tinen goyen forok iryin. Irkeb komatmin yago mata tinen turunŋ yan tiyyin goyen kenenbe yen ge dufaymin sanin iramin.

Yesu belen Al Kurunyen ya balem bana hora meten ten hinhan mar yakira tiyyin

(Mat 21:12-13; Mak 11:15-17; Luk 19:45-46)

¹²Be, go kamereb Yesube milinŋya kulin yagoyabe komatminŋa irde tumnan Kapeneam taunde katen gor hinhan gega, wawun budam ma hinhan.

¹³Be, Yuda marte gabu nalu kurun kura Pasoba^d goyen forok yewen tikeb Yesube taun go tubul ten Yerusalem hurkuriŋ. ¹⁴Kun Al kurunyen ya balem koya milgu irtin bana al gabu irde hanŋyen sawsawa kurunde gorbe al belen bulmakaw, sipsipyabe kalyinŋi yago gor yerke al belen wan damu ten hinhan goyen yinyin. Irde hora kapyan hen hen mar^e manan gasunminde keperde hike yinyin. ¹⁵Gwahade yenenbe kan kura ten det goyen yusulak ten tende niŋ det irde gore po dapna goyen tumnan yusulak tike Al Kurunyen ya balem bana mat sinare katamin.

^d 2:13 Bikken Israel mar Isip naŋa tubul ten Kenan kunin tiyaminŋabe Al Kurun belen sipsip al dirin dirnen gasa yirde darim yade yame kantayan sam yirnayin yinyin. Munan al kura gwaha ma tiyamin marbe Al Kurunyen miyon belen wanbe mel gote urmin matalinŋa dapnamin matalinŋa goyen tumnan gasa yirke kamamin. Gega meremin gama iramin marbe miyomin belen yubul tiyamin goke dufay hen hen ge dula mata ten hinhan.

^e 2:14 Hora kapyan hen hen mar gobe al belen horamin hoyan goyen yunkeb wolminenbe Al Kurunyen ya balem bana Al Kurun galak ird irdde niŋ hora goyen yunen hanŋyen.

Irde hora kapyan heŋ heŋ marte hora goyen yad yemeyke mali ga megen katamiŋ, irde hora yerd yerd gasuŋ wor yaboloŋ tiyyiŋ. ¹⁶Irdeb kalyiŋgi damure niŋ yerde hinhan mar goyen yinyiŋ. “Det ga yade kat kunaŋ. Daniŋ geb Adoner yabe dawet damu teŋ teŋ gasuŋ irde haŋ?” yinyiŋ. ¹⁷Be, komatmiŋ yago goyen yeŋ beleŋ mata tiyyiŋ goyen keneŋbe Al Kurunyen asaŋde mere kura katiŋ hinhin goke biŋ bak yamiŋ. Merebe gahade:

“Yage goke dufay heŋ heŋ gore po mununeŋ teŋ hi,” yitiŋ hi.

Tikiŋ 69:9

¹⁸Be, Yuda marte doyaŋ mar gor hinhan goreb, “Mata tiŋeŋ dahade kura Al Kurun beleŋ po ga irtek goyen kura forok irke keneŋbe fudinde gebe mata gahade ird ird tareŋge yaŋ yeŋ gentek?” inamiŋ. ¹⁹Irkeb Yesu beleŋ wol heŋbe, “Al Kurunyen ya balem ga upew urnaŋ. Irkeb ne beleŋ naŋa fay karwore po ya kurun goyen sopte irde pasi ireŋ,” yinyiŋ. ²⁰Irkeb mel goreb, “Ya balem gayenbe dama 46 hubu heke gab pasi iramiŋ. Goyenbe ge beleŋbe naŋa fay karwore po ya ga irde pasi ireŋ yeŋ ha?” inamiŋ. ²¹Goyenbe Yesu beleŋ Al Kurunyen ya balem niŋ yiriŋ gobe yingeŋ ge nurde yiriŋ. ²²Kame Yesu go kamiŋde mat huwarke gab komatmiŋ yago goyen Yesu beleŋ mere tiyyiŋ goyen goke biŋ bak yamiŋ. Irkeb Al Kurunyen mere asaŋde hi goya Yesu beleŋ mere tiyyiŋ goyen fudinde yeŋ nuramiŋ.

²³Be, Yesu go Pasoba gabu kurun nalure Yerusalem hinhinya goyen mata tiŋeŋ kurayen kurayen Al Kurun po ga yirtek goyen yirde hike yeneŋbe al budam yeŋ ge dufaymiŋ tareŋ iramiŋ. ²⁴Goyenpoga Yesube al biŋde dahade haŋ goyen keŋkela nurde yuneŋ hinhin geb, mel goke hekkeŋ ma nuryiŋ. ²⁵Yeŋbe al dufaymiŋdebe gwahade haŋ yeŋ nurde hinhin geb, al kura beleŋ waŋ al kadom ge tagalde al gobe gwahade gwahade yeŋ momoŋ irtek ma hinhin.

Yesu beleŋ Nikodemusya mere tiyaryum

3 ¹Be, Yuda marte doyaŋ mar buda bana goŋ niŋ al kura deŋembe Nikodemus goyen hinhin. Al gobe Farisi mar al. ²Yeŋ beleŋ wawuŋ kurare kura Yesu hitte waŋbe, “Rabai, gebe al saba yird yird al, irde Al Kurun beleŋ gad gerke wayaŋ yeŋ nurde hite. Al kura Al Kurunya ma hiriryenbe mata tiŋeŋ kurayen kurayen ge beleŋ irde ha gayen epte ma iryeŋ,” inyiŋ. ³Irkeb Yesu beleŋ wol heŋbe, “Fudinde wor po ginhem. Al kura sopte ma kawaŋ hiyyeŋbe Al Kurun beleŋ alya bereyamiŋ doyaŋ yirde hi bana goŋ epte ma hiyeŋ,” inyiŋ. ⁴Irkeb Nikodemus goreb, “Goyenbe al salanŋeŋ hitiŋbe daha mat sopte kawaŋ hiyyeŋ? Daha matbe miliŋ biŋde hurkuŋ sopte kawaŋ hiyyeŋ? Epte moŋ!” inyiŋ. ⁵Irkeb wol heŋbe, “Fudinde wor po ginhem. Al kura mata buluŋmiŋ yubul teŋ fe po baptais tiyyeŋ, irde Holi Spirit tiyyeŋ al gobe epte al gergeŋ sopte kawaŋ

hitiŋ yara hiyyeŋ. Munəŋ gwahade ma tiyyeŋbe Al Kurun beŋeŋ alya bereyamiŋ doyaŋ yirde hi bana goŋ epte ma hurkuyeŋ. ⁶Albe miliŋ biŋde mat kawaŋ heŋ haŋyen. Gega kawaŋ hitiŋ mar gobe Holi Spirit beŋeŋ po gab Al Kurun diliŋde al gergeŋ yiryen. ⁷Sopte kawaŋ hawayiŋ ginhem gake hurkunŋat ma tiyayiŋ. ⁸Meŋe migiriŋbe nurde hityen gega, meŋe gobe gwaha mat waŋ goŋ kwa yeŋ ma po nurde hityen. Ningeb Holi Spirit beŋeŋ gergeŋ yiryen mar goyen wor megen niŋ mar beŋeŋ epte ma al gwahade yeŋ bebak tinayiŋ,” inyiŋ. ⁹Gwaha inkeb Nikodemus beŋeŋ, “Mere yeŋ ha gobe daha mat forok yiyyeŋ?” inyiŋ.

¹⁰Irkeb wol heŋbe, “Gebe Israel mar saba yird yird al gega, dahade ningeb merene gayen bebak ma teŋ ha? ¹¹Fudinde wor po gineŋ hime. Neŋbe saba fudinde yeŋ nurde hityen goke tagalde hityen. Irde mata fudinde dilniniŋde yeneŋ hityen goke tagalde hityen. Goyenpoga deŋbe mereniniŋ goyen fudinde yeŋ ma nurde haŋyen. ¹²Nebe igiŋ bebak tinayiŋ mat po megen gar mata forok yeŋ haŋyen goyen yade saba dirde himyen gega, deŋbe fudinde yeŋ ma nurde haŋyen. Ningeb Al Kurun hire gor niŋ mata forok yeŋ haŋyen gore saba dirmeked daha mat fudinde yenayiŋ? Epte moŋ geb. ¹³Al kura Al Kurun hire gor kura ma hurkuriŋ. Goyenbe ne Al Urmiŋ gayen ga po gab Al Kurunya heŋ gor mat katmiriŋ. Ningeb Al Kurunyen gasuŋde niŋ mata goyen igiŋ tagaltek hime. ¹⁴Mose beŋeŋ sawsawa po kurun naŋa bana goŋ Israel marya hinhanya baras ain beŋeŋ po kunere toneŋ irde he hende kerde isaŋ hiriŋ. Ningeb ne Al Urmiŋ gayen wor Al Kurun beŋeŋ gwaha po niryen. ¹⁵Gogab ne neneŋbe al tumnaŋ ne niŋ dufaymiŋ saŋiŋ irde Al Kurunya hugiŋeŋ hinayiŋ.

¹⁶“Al Kurunbe megen niŋ alya bereya gayen bubulkunne wor po yeŋ nurd yuneŋbe Urmiŋ unŋkuren muŋ goyen basiŋa ma irdeb yunyiŋ. Ningeb al kura Urmiŋ goke dufaymiŋ tareŋ iryen al gobe hugiŋeŋ kamde kamdere ma kunbe Al Kurunya hugiŋeŋ hiriryen. ¹⁷Al Kurunbe alya bereya gayen merem yaŋ yire yeŋ ma Urmiŋ teŋ kerke katyiŋ. Gwaha titneŋbe Urmiŋ beŋeŋ meten tiyyen go hende alya bereya yumulgaŋ tiyyen yeŋ Urmiŋ teŋ kerke katyiŋ. ¹⁸Ningeb al kura Urmiŋ goke dufaymiŋ tareŋ iryenbe Al Kurun beŋeŋ merem yaŋ ma yiryen. Munəŋ al kura Al Kurun Urmiŋ goke dufaymiŋ saŋiŋ ma iryen al gobe Urmiŋ unŋkuren muŋ goke hekkeŋ ma nuryen geb, bikkeŋ merem yaŋ irtiŋ hiyen. ¹⁹Be, merem yaŋ yird yird gote miŋbe gahade: hulsu kura Al Kurun beŋeŋ teŋ kerke megen gar wayyiŋ. Goyenbe albe mata buluŋ po teŋ haŋyen geb, kidoma bana po hitek yirkeb hulsu niŋ amaŋeŋ ma nurde haŋyen. ²⁰Ningeb mata buluŋ teŋ haŋ marbe hulsu niŋ igiŋ ma nurde haŋ. Moŋgo hulsire forok yeteke mata buluŋniniŋ kawaŋ henayiŋ yeŋbe hulsire watek ma yirde hiyen. ²¹Goyenpoga al kura mata igiŋ igiŋ fudinde po teŋ hi al gobe hulsire forok yeŋ hiyen. Gogab mata teŋ hiyen kurun gobe Al Kurunyen dufay po gama irde teŋ hi goyen kawaŋ hekeb al hoyan beŋeŋ kennayiŋ,” inyiŋ.

Yon Baptais beleŋ Yesu niŋ kawan po tagalyiŋ

²² Be, go kamereb Yesuya komatmiŋya gobe Yerusalem taun go tubul teŋ Yudia naŋa bana goŋ niŋ tiyuŋ hoyanŋaŋ hoyanŋaŋ kwamiŋ. Irde goŋ naŋa fay budam ma heŋya alya bereya baptais yiryiŋ. ²³ Be, goya goyenbe Yon Baptaisbe Salim tiyuŋ bindere Ainon gor al baptais yirtek fe igiŋde wor po hinhin. Niŋgeb gor alya bereya turte waŋ hikeb baptais yirde hinhin. ²⁴ Yon go gwaha teŋ hinhin gobe fere teŋ koyare ma keramiŋya teŋ hinhin.

²⁵ Be, Yonyen komatyabe Yuda al kura goya yende matare ig uliŋ teŋ teŋ mataya fe baptais niŋ kadam mohonŋde tiyamiŋ. ²⁶ Gwaha teŋ Yon hitte waŋbe, “Rabai, Yodan fe ward ironŋ geya hinaruŋ al gobe al baptais yirde hi. Irkeb al tumŋaŋ yeŋ hitte kuŋ haŋ,” inamiŋ. ²⁷ Irkeb Yon beleŋ wol heŋbe, “Albe mali mali ma metenŋ tinayiŋ. Al Kuruŋ beleŋ metenŋ yuntiŋ goyen po tinayiŋ. ²⁸ Haŋkapyabe, ‘Nebe Mesaia moŋ. Nebe yeŋ ge teŋ meheŋ heŋ wamiŋiŋ,’ dineŋ hinhem goyen deŋbe nurde haŋ. ²⁹ Al kura bere mekerd unke tewe yeŋ bere gote yare kuyeŋ. Irkeb al gote kadombe waŋ bere tiyyenŋ al gote yare heŋ al goya beremya mulgaŋ heŋ waŋ waŋ ge doyaŋ hiyyenŋ. Irdeb al go waŋ mere tike nurdeb amaŋ hiyyenŋ. Niŋgeb al go amaŋ hiyyenŋ gwahade goyen po ne wor Yesuyen mere momoŋ nurdeb amaŋ wor po hihim. ³⁰ Yeŋbe al deŋem yaŋ hiyyenŋ, munanŋ nebe deŋnem moŋ heweŋ.

³¹ “Yeŋbe Al Kuruŋ hitte mat katiŋ geb, al megen haŋ kuruŋ gate folek wor po. Munanŋ nebe megen gar forok yimiriŋ geb, megen niŋ al, irde megen mata forok yeŋ haŋ go po ga nurde bebak teŋ himyen. Fudinde wor po, yeŋbe Al Kuruŋ hitte mat katiŋ geb, neŋ al megen hite kuruŋ gate tareŋ folek wor po. ³² Yeŋbe Al Kurunyen gasuŋde niŋ mata goyen diliŋde yeneŋ, mere kirmiŋde nurde hiyen goke tagalde hiyen gega, al kura meremiŋ nurde fudinde yeŋ ma nurde hanŋyen. ³³ Goyenbe al kura Yesuyen mere nurde usi ma yiyyenbe Al Kurunyen merebe fudinde yeŋ nurdeb gogo gwaha tiyyenŋ. ³⁴ Al Kuruŋ beleŋ teŋ kerke wayyiŋ al gobe Holi Spirit keŋkela wor po untiŋ geb, Al Kurunyen mere po tagalde hiyen. ³⁵ Yeŋbe Naniŋ Al Kuruŋ beleŋ bubulkunne wor po yeŋ nurde unenbe det kuruŋ gayen doyaŋ yird yird tareŋ goyen unyiŋ. ³⁶ Niŋgeb al kura Urmiŋ goke dufaymiŋ saŋiŋ iryenbe Al Kurunya hugiŋenŋ hiriryenŋ. Munanŋ Urmiŋde mere ma nuryenbe Al Kurunyen bearar bana hiyen geb, yenŋa hugiŋenŋ heŋ heŋ goyen epte ma tiyyenŋ,” yinyiŋ.

Yesuya Samaria bere kura goya mere tiyaryum

4 ¹ Be, Farisi mar gobe Yesu beleŋ Yon Baptais fole irde al budam baptais yirke komatmiŋ budam heŋ haŋ yeke gote mere momoŋ goyen nuramiŋ. ²⁻³ Niŋgeb Yesu gobe Yudia naŋa go tubul teŋ sopte

mulgaŋ heŋ Galili naŋa beleŋ kuriŋ. Goyenbe Yesu yinŋenbe al kura ma baptais yirde hinhin. Komatmiŋ yago beleŋ po ga al baptais yirde hinhan.

⁴Be, Galili kwe yeŋbe beleŋmiŋ Samaria naŋayaŋ mat kuriŋ. ⁵Kuŋbe Samaria naŋa bana goŋ niŋ taunde kura gor forok yiriŋ. Taun gote deŋembe Sikar. Sikar taun gobe megeŋ tapum kura bikkeŋ Yekop beleŋ urmiŋ Yosep niŋ tubul teŋ unyiŋ goyen bindere hinhin. ⁶Gorbe Yekopyen meteŋ mar beleŋ bikkeŋ mete fe talaŋmiŋ kura goyen gor hinhin. Be, Yesu gob beleŋ ulyaŋ kuŋ naŋa baŋkahal heŋ misiŋeŋ wor po hekeb uliŋ yul yeke kuŋ mete fete gor keperde usaŋ heŋ hinhin.

⁷Gor hikeb Samaria bere kura fe fare yeŋ wayyiŋ. Irkeb Yesu beleŋ, “Fe kura nunke newe,” inyiŋ. ⁸Goya goyenbe komatmiŋ yagobe kuŋ biŋge damu tiniŋ yeŋ taun bana goŋ kwamiŋ. ⁹Be, Yesu beleŋ gwaha inkeb Samaria bere gore wol heŋbe, “Gebe Yuda mar al, munaŋ nebe Samaria niŋ bere. Goyenbe dahade geb fe kura nunke newe ninha?” inyiŋ. Yuda marbe Samaria mar niŋ igiŋ ma nurd yuneŋ awalikde ma hanŋen geb, gogo mere gwahade tiyyiŋ. ¹⁰Be, bere go gwaha yekeb Yesu beleŋ wol heŋbe, “Gebe det igiŋ wor po damum moŋ Al Kuruŋ beleŋ duliŋ guntek gobe det goyen yeŋ nurde, fe niŋ gineŋ hime al gayen neneŋ bebak teŋ ha manhan det goke gusaŋaŋ nirwoŋ. Irkeb Al Kurunya hugineŋ hitek gird gird fe goyen gunmewoŋ,” inyiŋ. ¹¹Irkeb bere goreb, “Doyaŋ al, mete gabe dukuŋ wor po. Irde fe fard fard detgem moŋ gega, damde kuŋ nene igiŋ hitek fe goyen farayiŋ? ¹²Fe gabe asininiŋ Yekop, dirŋeŋ weŋ, sipsipmiŋyabe bulmakawmiŋya beleŋ nene hinhan. Irdeb neŋ ge tubul teŋ dunyiŋ. Niŋgeb ge gayenbe asininiŋ Yekop folek yeŋ nurdeb gogo yaha?” inyiŋ. ¹³Irkeb wol heŋbe, “Al buda mete fe gayen ga nenayiŋbe sopte fe niŋ yiryen. ¹⁴Goyenbe fe ne beleŋ yunmeke nennayiŋ mar gobe sopte fe niŋ ma yiryen. Fudinde, fe ne beleŋ yunmeke nennayiŋ gobe Al Kurunya hugineŋ hitekde niŋ fe. Fe gobe fe kura diliŋde mat hugineŋ marde waŋ hiyen go gwahade goyen geb, fe go niyyen al gote biŋde forok yeŋ epte ma pet yiyyen,” inyiŋ. ¹⁵Irkeb bere goreb, “Doyaŋ al, fe ge beleŋ yeŋ ha goyen ne nunayiŋ. Gogab sopte fe niŋ ma niryen. Irdeb sopte fe fard fard niŋ gar ma waŋ heŋ,” inyiŋ. ¹⁶Irkeb Yesu beleŋ wol heŋbe, “Kuŋ almege tupi teŋ ga wayyi,” inyiŋ. ¹⁷Gwaha inkeb bere goreb, “Nebe almenem moŋ,” inyiŋ. Irkeb Yesu beleŋbe, “‘Almenem moŋ,’ yaha gobe fudinde yaha. ¹⁸Fudinde gebe al siptesoŋoŋ yade yubul teŋbe sopte al teŋ goya har gobe almege moŋ. Niŋgeb, ‘Almenem moŋ,’ ninha gobe fudinde wor po yaha,” inyiŋ. ¹⁹Irkeb bere goreb, “Doyaŋ al, gebe Al Kurunya mere basaŋ al genhem. ²⁰Goyenbe Al Kuruŋ doloŋ ird ird gasuŋbe asininiŋ yago beleŋ dugu^f gayenter waŋ doloŋ irde hinhan. Gega deŋ

^f 4:20 Dugu gote deŋembe Grisim dugu.

Yuda marbe Al Kurun doloŋ ird ird gasunbe Yerusalem po yeŋ hanŋyen,” inyiŋ. ²¹Irkeb Yesu beleŋ inyiŋ. “Bere, merene ga fudinde yeŋ nura ko. Nanne doloŋ irniŋ yeŋbe dugure gorya Yerusalem taundeya po ma doloŋ irtek nalu goyen forok yiyyeŋ. ²²Deŋ Samaria marbe al goyen doloŋ irhet yeŋ ma nurdeya doloŋ irde hanŋyen. Munan Al Kurun beleŋ alya bereya yumulgan teŋ teŋ gobe neŋ Yuda mar momoŋ diryiŋ geb, neŋbe al goyen doloŋ irde hite yeŋ nurdeya doloŋ irde hityen. ²³Goyenbe Al Kurun doloŋ ird ird mar keŋkelak wor po gore Al Kurunyen mere fudinde goyen binde kerde Holi Spirityen tarende Al Kurun doloŋ irtek nalube forok yiyyeŋ. Go nalu gobe hanŋa gago forok yihi. Al Kurunbe mata gwaha mat doloŋ ird ird mar goke nanŋkeneŋ hiyen. ²⁴Al Kurunbe gogo hi yeŋ ma kentek. Yeŋbe Holi Spirit yara po geb, doloŋ irniŋ yenayiŋ marbe Holi Spirityen tarende meremiŋ fudinde goyen binde kerde gab doloŋ irde hinayiŋ,” inyiŋ. ²⁵Irkeb bere goreb, “Mesaia gobe wayyeŋ yeŋ nurde hime. Yeŋ beleŋ gab ge beleŋ yeŋ ha kurun goyen miŋ keŋkela bebak diryeŋ,” inyiŋ. Mesaia Kristu ineŋ hanŋyen. ²⁶Be, bere gore gwaha inkeb Yesu beleŋ wol heŋbe, “Go al gobe mere girde hi al gago,” inyiŋ.

²⁷Be, Yesu beleŋ bere goya mere teŋ hikeb komatmiŋ yago goyen mulgan heŋ wan yeneŋbe diliŋ fot yamiŋ. Goyenbe al kura beleŋ, “Da niŋ nurde ha?” ineŋ kurabe, “Daniŋ bere ga mere irde ha?” ineŋ gusunan ma iramiŋ. ²⁸Be, bere gobe fe fard fard kuwemiŋ goyen gor po tubul teŋbe mulgan heŋ taunde kunbe al momoŋ yirdeb, ²⁹“Al kura ne mata teŋ himyen kurun goyen momoŋ nirde pasi wor po hihi. Yeŋbe Mesaia wet kura niŋ, wan kennan!” yinyiŋ. ³⁰Irkeb mel go Yesu kinniŋ yeŋ kwamiŋ.

³¹Goya goyenbe komatmiŋ beleŋ, “Rabai, binde ga kura nawa be,” inamiŋ. ³²Irkeb wol heŋbe, “Nebe bingene yan goyen deŋ go ma nurde han,” yinyiŋ. ³³Gwaha yinkeb komatmiŋ yago goyen, “Al kura beleŋ binde kura wet yawan una?” yeŋbe kadam gusunan gird tiyamiŋ. ³⁴Irkeb Yesu beleŋ, “Nere bindebe nad nerke wamiŋ al gote dufay keŋkela gama irdeb meten nunyiŋ goyen teŋ tukun pasi ireŋ gogo. ³⁵Irdeb dende mere kurabe, ‘Gagasi sipte po heŋbe sak nanŋa hiyyeŋ,’ yeŋ hanŋyen. Goyenbe diliŋ nanŋkeneŋ Al kurunyen metende binde ep hahan ga yennan. Bindebe yad yadi yertek hahan. ³⁶Al binde yade yadi yiryen al gobe meten tiyyen gote murungem tiyyen. Binde yad yiryen gobe alya bereya Al Kurunya hugineŋ hitek gasunde yukuyeŋ go gwahade goyen. Gogab meten hard hard al goya binde yad yad al goya tumnande aman hiriryen. ³⁷Ningeb mere kura, ‘Al kura beleŋ binde haryen. Irkeb al kura beleŋ binde yade yadi yiryen,’ yitiŋ gobe fudinde yeŋ nurde hime. ³⁸Nebe deŋ beleŋ binde ma hartin metende gor niŋ binde yawarnayiŋ yeŋ hulyan dirmiŋ. Al hoyan beleŋ meten kurun po titiŋ gote igineŋbe deŋ beleŋ yade han gago,” yinyiŋ.

³⁹Be, Samaria niŋ alya bereya taun goyenter niŋbe bere gore kun, “Al goreb ne mata teŋ himyen kurun goyen momoŋ nirde pasi hihi,”

yinyiŋ geb, Yesu niŋ dufaymiŋ saŋiŋ iramiŋ. ⁴⁰Niŋgeb mel gore waŋbe, “Neŋya gar hiniŋ,” inkeb yenya wawuŋ irawa gor heŋ saba yirde hinhin. ⁴¹Irkeb al budam Yesu niŋ dufaymiŋ tareŋ iramiŋ. ⁴²Irdeb bere goyen, “Haŋkapy a neŋbe ge beleŋ mere momoŋ diran goke dufayniniŋ yeŋ ge tareŋ iriŋ. Goyenpoga haŋkabe nindikeŋ kirmiŋniniŋde wor po meremiŋ nurdeb fudinde wor po al gabe megen niŋ alya bereya Yumulgan teŋ teŋ Al yeŋ nurhet,” inamiŋ.

Yesu beleŋ doyaŋ al kura gote urmiŋ sope iryiŋ

⁴³Be, Yesu go gor heŋ wawuŋ irawa hubu hekeb mel go yubul teŋ Galili naŋare kuriŋ. ⁴⁴Kuŋ heŋyabe Yesu beleŋ yinŋeŋ ge yeŋ, “Al Kurunyen mere basan marbe naŋamde niŋ mar beleŋ palap ma yirde haŋyen,” yiriŋ. ⁴⁵Be, Galili niŋ marbe Pasoba gabu kurun nalure Yerusalem kuŋ gor Yesu mata teŋ hinhin goyen kenamiŋ geb, yeŋ waŋ forok yekeb aman heŋ hoy irde gargar iramiŋ.

⁴⁶Yesube sopte po Galili naŋa bana goŋ niŋ taun kura Kana, fe gergeŋ tigiri tike wain hiriŋde gor kuriŋ. Gorbe naŋa gote doyaŋ al kurunde meteŋ al kura gor hinhin. Goyenbe al gote urmiŋbe Kapeneam taunde gor garbam buluŋ po heŋ yamiŋde firŋiŋde po hinhin. ⁴⁷Doyaŋ al gobe Yesu go Yudia naŋare mat Galili forok yihi mere momoŋ go nurdeb yeŋ hitte kuŋ urmiŋ kamtek binde po hiriŋ goyen waŋ sope irwoŋ yeŋ eseŋ mere iryiŋ. ⁴⁸Irkeb Yesu beleŋ wol heŋbe, “Deŋbe dulŋeŋ epte ma wor po dufaytiŋ ne niŋ saŋiŋ irnayiŋ. Mata tiŋeŋ kurayen kurayen Al Kurun beleŋ po ga yirtek goyen yeneŋ gab ne niŋ dufaytiŋ tareŋ irnayiŋ,” inyiŋ. ⁴⁹Irkeb al goreb, “Doyaŋ al, urne kamyenkek geb, wake kure,” inyiŋ. ⁵⁰Irkeb wol heŋbe, “Urgebe igiŋ hiyyeŋ. Go ma kamyen geb, igiŋ ge kwa,” inyiŋ. Irkeb al gobe Yesuyen mere goyen fudinde yeŋ nurdeb yamiŋde kuriŋ. ⁵¹Be, al go hako kuŋ hikeyabe meteŋ marmiŋ beleŋ waŋ belen keneŋbe, “Urgebe igiŋ hiyuŋ!” inamiŋ. ⁵²Irkeb al goreb da nalure wor po garbam go urmiŋ tubul tiyuŋ goke gusuŋaŋ yiryiŋ. Irkeb, “Urgebe ki naŋa bul irde naŋa diliŋ unkuŋeŋ gwahade hekeya garbam tubul tiyuŋ,” inamiŋ. ⁵³Gwaha inkeb diriŋ gote naniŋ goyen Yesu beleŋ, “Urgebe igiŋ hiyyeŋ, go ma kamyen,” inyiŋ mere gobe naŋa diliŋ goyenter wor po ninuŋ yeŋ bebak tiyyiŋ. Irdeb yenya yamiŋde haŋyen mar gobe tumŋaŋ Yesu niŋ dufaymiŋ tareŋ iramiŋ.

⁵⁴Be, Yesube Yudia naŋare mat Galili naŋare waŋ mata tiŋeŋ sopte hoyan kura iryiŋ gobe gogo doyaŋ al gote urmiŋ sope iryiŋ.

Yesu beleŋ al garbam miŋyaŋ kura Betesida fe ala siŋakde hinhin goyen sope iryiŋ

5 ¹Be, Yesube hinhin, irde nalu kura kuke gab Yuda marte gabu nalu kurun kura forok yekeb Yerusalem kuriŋ. ²Yerusalem binde goŋbe

fe ala kura al po taltin Yuda marte mere mat Betesida inen hanjen goyen hinhin. Fe ala gobe hora koya kurun taun go milgu irtinje yame kura Sipsipyen Yame inen hanjen goyen bindere hinhin. Irde ya kawan yulyanen kura siptesonon goyen fe ala go sijakyan hinhan. ³⁻⁴Gorbe al garbam minyan karim ma wan ya kawan bana gon hinhan. Dili titmin, kahan nonbo hitinyabe ulin kamtin yagoya goyen budam wor po wan gor hinhan. ⁵Be, al kura dama 38 gayen garbam hitinje po hiyen goyen wor gor hinhin. ⁶Be, Yesu bele gon kun al goyen firtinje gwahade hike kenenbe al gobe sobamde po bulun gon gahade hiyen yen nuryin. Irdeb, “Igin hemewon yen nurde ha we?” inyin. ⁷Irkeb garbam al goreb, “Doyan al, fe ugala tike al gore kura faran nurde nad fete nertek mon. Ningeb hako ga kurke yen kurut yen himekeb al hoyan bele gon wa mehen hen kurkun hanjen,” inyin. ⁸Irkeb Yesu bele gon be al goyen, “Huwara. Huwarde gasunge sope irde ten kwa,” inyin. ⁹Irkeb goyare po al gobe igin hirin. Irdeb huwarde gasunmin sope irde ten kurin.

Be, mata gobe Sabat nalure forok yirin. ¹⁰Ningeb Yuda marte doyan mar bele gon al igin hirin al goyen, “Sabat nalure detge yade kun ha gobe Moseyen sabarebe utan irtin goyen ten han geb,” inamin. ¹¹Irkeb al gore wol henbe, “Sope nira al goreb, ‘Huwardeb detge ten kwa,’ nina,” yinyin. ¹²Irkeb mel goreb, “Gobe ganun al bele gon wor po gwaha gina?” inen gusunan iramin. ¹³Goyenbe Yesube al buda kurun bana gon isal po uryin geb, al garbam minyan igin hirin goreb al goyen yen bebakken ma nuryin.

¹⁴Be, kamebe Yesu bele gon Al Kurunyen ya balem bana gor al go kenenbe, “Ga nura ko. Igin hawan geb, sopte mata bulun ma tiyayin. Mon go det bulun wor po girtek kura forok yen gunyen geb,” inyin. ¹⁵Irkeb al gobe Yuda marte doyan mar hitte kunbe, “Yesu bele gon sope nirun,” yinyin.

¹⁶Be, Yesu gob Sabat nalure mata gwahade tiyyin geb, Yuda marte doyan mar bele gon bulun bulun iramin. ¹⁷Irkeb Yesu bele gon wol henbe, “Adonebe meten titinje po hiyen. Gayenter wor meten ten hi. Ningeb ne manan gago meten ten hime,” yinyin. ¹⁸Gwaha yekeb mel Yuda marte doyan mar goreb daha mat kura mayteke kami yen kurut wor po yen hinhan. Gobe Sabat naluyen saba ma gama irde hiyen goke po mon. Al Kurun wor neya tunande, irde Adone nigen yen hiyen goke manan igin ma nurdeb gogo maynin ten hinhan.

¹⁹Be, Yesu bele gon gahade wol hirin: “Fudinde dinen hime. Urminbe yingen de sanin de epte ma det kura iryen. Nanin bele gon mata kura ten

⁵ 5:3-4 Asan hoyandebe gahade hi: ⁴ Irdeb gise han ka Doyan Al Kurunyen miyon bele gon binde go katen fe korom irde hiyen. Ningeb miyonmin gore katen fe go korom irke al kura yen wa solok yen fe binde kurkuyenbe garbammin dahade gobe goya po hubu hiyen.

hikeb Urmin wor goyen po ten hi. Ningeb yenbe Nani belen mata kura ten hike kenenbe goyen po ten hiyen. ²⁰Nani be Urmin goyen bubulkunne wor po yen nurdeb yen mata ten hiyen kurun gob Urmin ikala irde pasi hen hiyen. Fudinde denbe han ka mata kenhan gate folek Al Kurun belen Urmin ikala irkeb yen belen kawan forok yiryen. Irkeb den belen yenenbe diti fot yenayin. ²¹Nani belen al kamtinde mat yisan hen hiyen gwahade goyen po, Urmin wor al kura Al Kurunya huginen hen hen goyen une yenbe igin ala po unyen. ²²Irde Nani yingenbe al merem yan ma yirde hiyen. Goyenpoga al merem yan yird yird metenbe Urmin hani de kiriyin. ²³Gogab al belen Nani turun irde han yen gwahade goyen po Urmin wor turun irde hinayin. Al kura Al Kurun Urmin ma turun irde hiyenbe ten kerke wayyin al Nani wor turun ma irde hiyen.

²⁴“Fudinde wor po dinen hime, al kura merene gayen nurde nad nerke katmirin al goke dufaymin taren iryenbe yenya huginen hen hen goyen tenayin. Irdeb yen dili de merem yan ma henayin. Go mar gobe huginen kamde kamde mata goyen fole irde Al Kurunya huginen hen hen mata goyen minyan henayin. ²⁵Fudinde wor po dinen hime, nalu kura forok yewen tiya. Go nalu gobe gago forok yihi. Ningeb Al Kurun ma nurde unenbe yen dili de al kamtin yara han yen mar goyen Al Kurun Urminde mere nurnayin. Irde nurde yen ge dufaymin taren irdeb yenya huginen hinayin. ²⁶Nani yingenbe al belen yenya huginen hen hen mata gote min al. Gwahade goyen po Urmin wor Nani belen huginen hen hen mata gote min al iryin. ²⁷Irdeb yenbe Al Urmin geb, alyen mata iginya bulunya pota yird yird sanin goyen manan unyin.

²⁸“Be, al kamtin tumnan Urminde melak nurdeb meteminde mat huwarnayin nalu go wan hi geb, goyen goke hurkun kat ma tinayin. ²⁹Al mata igin igin ten hitin marbe huwarde Al Kurunya huginen hinayin. Munan al mata bulun bulun ten hitin marbe kamtinde mat huwarkeb merem yan yiryen. ³⁰Nigen taren de epte ma daha wet kura tiyen. Alyen mata iginya bulunya yinen himyen gobe Al Kurun belen al gobe gwahade ninke po gabe igin ma bulun yinen himyen gogo. Nebe dufayner ma mata ten himyen. Nad nerke wamirin al gote dufay po gama irde gwaha ten himyen. Ningeb meten ten himyen gabe huwak geb,” yinyin.

Al hoyan wor Yesube ganun goyen tagalamin

³¹Be, Yesu belen sopte po gaha yinyin: “Nebe nigen ge yen nebe al goyen yewenbe merene gobe fudinde mon yenayin. ³²Goyenbe ne nin hen mere tagalde hiyen al kura hi. Al gore ne nin tagalde hiyen gobe fudinde yen nurde hime. ³³Denbe Yon Baptais belen ne nin dahade kura yeke nurtek yen al hulyan yiran. Irkeb yen belen ne nin mere fudinde dirun. ³⁴Nebe al belen ne nin hen tagalwon yen ma nurde hime. Goyenpoga Yon Baptais

belen ne nin hen tagalde hi goke momonj dirde hime gobe den belen ne nin dufaytin tarej irkeb Al Kurun belen dumulgan tiwon yen nurdeb gago momonj dirde hime. ³⁵Yonyen merebe hushi kura melak hen agat urtin yara alyen dufay wuk irde hinhin. Irkeb denbe sobamde ma meremij goke aman hen hinhan. ³⁶Goyenbe meten ten himyen gabe Yon belen ne nin hen tagalde hiyen gote folek. Meten ne gabe Nanne belen gwaha ten pasi irayin ninenbe nunyin. Ningeb meten ne gareb fudinde Nanne belen nad nerke wamirin goyen al yikala yirde hi. ³⁷Irdeb Nanne nad nerke wamirin al gore wor yingen mohonde ne nin tagaltin hi. Goyenpoga denbe melak mun kura ma nurde, yenbe al gwahade yen ma kenej hanjen. ³⁸Irde ne nin dufaytin sanjin ma irde han geb, nad nerke wamirin al gote merebe bitinde ma hi.

³⁹“Be, Al Kurunyen asanbe den belen mali ma kapyan hen hanjen. Kenkela kapyan hetek gab goreb Al Kurunya huginen hitek gobe nende hiyen yen nurdeya kapyan hen hanjen. Goyenbe asan gobe ne nin katin han. ⁴⁰Ningeb ne hitte wanayinbe Al Kurunya huginen hitek goyen dende hewon gega, ne hitte wan wan nin bada hen han.

⁴¹“Nebe al belen turun nirnan yen ma nurde hime. ⁴²Irde den gayen al dahade yen nurd dunen hime. Bitin banabe Al Kurun nin fudinde wor po amanen nurd nurdbe hubu wor po. ⁴³Nebe Adone belen hulyan nirke wan tarejminde meten ten himyen gega, denbe pel po nirde han. Goyenbe al kura wan yingen de tarej de po meten ten hikeb gargar irnayin. ⁴⁴Denbe kadtin belen turun dird dird nin po nurde hanjen. Gega Al Kurun unkuken gore turun dird dird nin mun kura ma nurde hanjen. Ningeb den belen gwaha ten hinayinbe dahadem dufaytin ne nin sanjin irnayin? Epte mon geb.

⁴⁵“Goyenbe ne belen Adone hitte merem yan diryen yen ma nurnayin. Merem yan dirtek albe Mose geb. Denbe yen ge hekken nurde hanjen gega, yen gore po merem yan diryen geb. ⁴⁶Yen belen gab asanmindebe ne nin kayyin. Ningeb den gayen yen ge fudinde hekken nurde hanjen manhan ne nin dufaytin tarej irwon. ⁴⁷Goyenbe mere kayyin goke dufaytin tarej ma irde han geb, daha matbe ne mere ten hime gayen fudinde yen nurnayin? Epte mon,” yinyin.

Al 5,000 binje paka yiryn

(Mat 14:13-21; Mak 6:30-44; Luk 9:10-17)

6 ¹Be, go kamereb Yesube Galili nanare kurin. Kunbe Galili fe ala kurun goyen sin kurhan kurin. Galili fe ala kurun gote denjem kurabe Taiberias. ²Be, al budam Yesu belen garbam mar sope yird yird mata tinen karkuwan forok yirke yenamin geb, yen po gama irde kwamin. ³Irkeb Yesu gob dugu dabayinde kura gor hurkunbe komatminya keperde usan hamin. ⁴Be, Yuda marte gabu nalu kurun kura Pasoba goyen binde binde hen hinhin.

⁵Be, Yesu gob al buda kurun go yen hitte po wan hike yinyin. Irdeb Filip goyen, “Beretbe damde kun damu ten yuntek?” inyin. ⁶Go inyin gobe yingenbe gwaha tiyen yen nurd nurd ga Filip goyen dulin tunan ure yen gusunjan iryin. ⁷Irkeb Filip belej wol henbe, “Al tumnan beret mun kura netek gobe nen bana al kura gagasi ⁸gayen meten ten hora tiyyen gore wor epte ma diryen,” inyin. ⁸Gwaha yekeb komatmin kura Andru, Saimon Pita kulin belej hardeb, ⁹“Dirin kura beret muknen siptesonon bali bilmin karka ten palawa yara irtin gore po yirtin goya makan dapna irawaya minyan bana gan hi. Goyenbe go mun goreb al buda kurun gayen daha yiryen?” inyin. ¹⁰Irkeb Yesu belej wol henbe, “Al buda ga yinke kepernan,” yinyin. Irkeb gorbe yamun budam hinhande geb, goyan keperde tukamin. Al gabu iramin gobe 5,000 gwahade. ¹¹Be, Yesu belej beret muknen siptesonon go yade Al Kurun turun irde al buda keperamin mar goyen gale hen yunke nene ep namin. Irde makan dapna irawa goyen wor yade gwahade po yiryin.

¹²Be, nene ep neke yenenbe Yesu belej komatmin goyen yinyin. “Beret ep nene yubul tahan ga buda yirnan. Kura mun yubul tike bulun ma henayin,” yinyin. ¹³Irkeb beret muknen siptesonon namin mar gore ep nene yubul tiyamin goyen buda yirde tiri ¹²gayen makin yiramin. ¹⁴Be, al buda gobe Yesu belej mata tinen kurun goyen irke kenenbe, “Fudinde, al gabe Al Kurunyen mere basan Al kame megen gar wayyen yitin al go goyenbe gago!” yamin. ¹⁵Goyenbe Yesube mel gore wan parsay irde yende Doyan Al Kurun irnin ten hike nurdeb gor matbe bal hen yen unkenen po dugure hurkurin.

Fe hende huwarde kurin
(*Mat 14:22-33; Mak 6:45-52*)

¹⁶Be, numtuk uren tikeb Yesuyen komatmin yagobe dugu dabayinde mat mulgan hen Galili fe ala sinare kurkamin. ¹⁷Irdeb gor mat Galili fe ala kurun goyen sin kurhan Kapeneam belej kunin yen hakwa hende hurkunbe kun hinhan. Gega Yesube mel goya ma kwamin. Be, hako kun hikeyabe kidoma hiri. ¹⁸Irdeb mene kurun tike duba huwaryin. ¹⁹Be, mel gobe 5 ma 6 kilomita gwahade kwamin. Irkeb Yesu forok yen fe yuwalnen hende huwarde hakwa go tur po wayyin. Wan hike kenenbe kafura wor po hamin. ²⁰Goyenbe Yesu belej, “Ne wan hime ge, kafura hen ma,” yinyin. ²¹Irkeb aman hende Yesu faran urke hakwa binde hurkurin. Irkeb gor kunin yen kun hinhande gor bemel po forok yamin.

²²Be, ferd fay uryin goya goyenbe al buda fe ala sin kurhan Yesu belej yubul tiyyin marbe gor po hinhan. Mel gore hakwa gor ma hike kenenbe, “Kibe hakwa unkenen goyen po gar hinhin gobe Yesuyen komatmin belej ten kwan. Gega Yesube yenya tumnan ma kwan,” yamin. ²³Be, Doyan Al Kurun belej beret ten Al Kurun turun irde al buda go

gale heŋ yunke namiŋ gasuŋ bindere gor Taiberias mat hakwa buda kura waŋ forok yamiŋ. Irkeb mel gore Yesube gor wet hi yeŋ kuŋ naŋkenamiŋ. ²⁴Goyenbe hakwa bana goŋbe Yesu ma komatmiŋ gwahade muŋ kura ma keneŋbe Yesu niŋ naŋkinniŋ yeŋ hakwa go hende Kapeneam kwamiŋ.

Yesube Al Kurunya hugineŋ heŋ heŋ gote saŋiŋ miŋyaŋ

²⁵Be, al buda gobe fe ala goyen siŋa kurhan mat waŋbe Yesu kenamiŋ. Irdeb, “Rabai, daha naŋa gar wayaŋ?” iney gusuŋaŋ iramiŋ. ²⁶Irkeb wol heŋbe gaha yinyiŋ: “Fudinde wor po diniŋ hime, deŋbe mata tiŋey Al Kurun beley po ga irtek goyen keneŋ miŋ bebak ma teŋya ne niŋ naŋkeneŋ haŋ. Beret nene bitiŋ makiŋ iraŋ goke po teŋ ne niŋ naŋkeneŋ haŋ. ²⁷Megen niŋ biŋge buluŋ hetek goke ma metey teŋ hinayiŋ. Nene Al Kurunya hugineŋ hitek biŋge goke po metey teŋ hinayiŋ. Biŋge gobe ne Al Urmiŋ gare duneŋ. Biŋge goyen duneŋ duneŋ metey gobe Adone beley basiŋa nirde nuniŋ,” yinyiŋ. ²⁸Gwaha yinkeb mel goreb, “Niŋgeb daha wor po teŋbe Al Kurun beley metey goke nurde hi goyen titek?” iney gusuŋaŋ iramiŋ. ²⁹Irkeb wol heŋbe, “Deŋ beley Al Kurunyaŋ metey titek gobe yeŋ beley teŋ kerke wayuŋ al goke dufaytiŋ tareŋ irnayiŋ gogo,” yinyiŋ. ³⁰Irkeb, “Gwahade kenem mata tiŋey dahade goyen irke keneŋ gabe ge niŋ dufayniniŋ tareŋ irtek? Niŋgeb daha tiyayiŋ? ³¹Hakot wor po asininiŋ yago sawsawa naŋa bana hinhanyabe biŋge ‘mana’ iney haŋyen goyen nene hinhan. Goyen goke Al Kurunyaŋ asaŋde, ‘Al Kurunyaŋ gasuŋde niŋ biŋge yeŋ beley mel go yunke namiŋ,’ gwahade katiŋ hi,” inamiŋ. ³²Gwaha inkeb Yesu beley wol heŋbe, “Fudinde wor po diniŋ hime, Al Kurunyaŋ gasuŋde niŋ biŋge katke namiŋ gobe Mose beley ma yuniŋ. Biŋge yuniŋ albe Adone geb. Irde gayenter wor biŋge fudinde duneŋ hi al gobe Adone. ³³Al Kurunyaŋ gasuŋde niŋ biŋgebe yeŋ hitte mat katuŋ al gogo. Yeŋ beley po gab alya bereya megen haŋ kurun gayen Al Kurunya hugineŋ heŋ heŋ goyen yuneŋ hiyen,” yinyiŋ. ³⁴Irkeb mel gore, “Doyaŋ al, haŋka matbe biŋge goyen hugineŋ hugineŋ duneŋ hayiŋ,” inamiŋ.

³⁵Irkeb wol heŋbe gaha yinyiŋ: “Nebe Al Kurunya hugineŋ hitek biŋge fudinde go goyen. Niŋgeb al kura ne hitte waŋ dufaymiŋ ne niŋ saŋiŋ iryeŋ al gobe biŋge ma kamde fe niŋ ma irde hiyeŋ go gwahade goyen po Al Kurunya hugineŋ heŋ heŋ tareŋ gobe hubu ma hiyyey. ³⁶Goyenbe dinhem gwahade po, deŋbe ne gayen neneŋ haŋ gega, dufaytiŋ ne niŋ tareŋ ma yirde haŋ. ³⁷Al tumŋaŋ Nanne beley ne niŋ nuntiŋ mar gobe ne hitte wanayiŋ. Irkeb al ne hitte wanayiŋ mar gobe kura muŋ takira ma tiyeŋ. ³⁸Nebe Al Kurun hitte mat katmiriŋ gobe dufayne gama irde metey tiye yeŋ ma katmiriŋ. Gwahade yarabe nad nerke katmiriŋ al gote dufay po gama irde metey tiye yeŋ katmiriŋ. ³⁹Niŋgeb ne niŋ nuntiŋ mar gobe uŋkureŋ muŋ kura tubul timeke pel ma hiyyey. Gwaha irtiŋeŋbe

nalu funande mel go tumnaŋ yisaŋ heŋ al gergeŋ wor po yireŋ. Go tiyeŋ gobe nad nerke katmiriŋ al gote dufay geb, go po gama ireŋ. ⁴⁰Nanner dufaydebe al tumnaŋ diliŋbe Urmiŋ hende po irde yeŋ ge po dufaymiŋ tareŋ irnayeŋ marbe yeŋya hugiŋeŋ hinayeŋ. Irkeb nalu funandebe ne beleŋ mel go yisaŋ heweŋ,” yinyiŋ.

⁴¹Be, Yesu beleŋ yinŋeŋ ge yeŋ, “Nebe biŋge fudinde Al Kurun hitte mat katmiriŋ,” yeke nurdeb Yuda mar gore Yesu niŋ igiŋ ma nurde siksiksuk tiyamiŋ. ⁴²Irdeb, “Al gabe Yosep urmiŋ Yesu moŋ? Naniŋya miliŋyabe nurde yuneŋ hite. Goyenbe dahade niŋgeb yinŋeŋ ge yeŋ, ‘Nebe Al Kurun hitte mat katmiriŋ,’ yeŋ hi? Mere gobe kukuwamŋeŋ wor po!” yamiŋ.

⁴³Irkeb Yesu beleŋ, “Merene goke igiŋ ma nurde siksiksuk teŋ haŋ gobe bada henaeŋ. ⁴⁴Al kura yinŋeŋ epte ma ne hitte wanayeŋ. Nanne nad nerke wamiŋ al gore gab bul yirke ne hitte wanayeŋ. Irkeb nalu funandebe go mar gobe ne beleŋ kamtiŋde mat yisaŋ heweŋ. ⁴⁵Al Kurunyen mere basaeŋ mar porofet buda beleŋ asaŋde, ‘Al Kurun beleŋ mel goyen tumnaŋ saba yiryeŋ,’ katiŋ hi gwahade goyen po, al kura Adoner mere nurde sabamiŋ bebak tinayeŋ mar gobe tumnaŋ ne hitte wanayeŋ. ⁴⁶Al kura Nanne ma kintiŋ. Goyenpoga ne yeŋ hitte mat watiŋ al gare po ga kintiŋ. ⁴⁷Fudinde wor po dineŋ hime, al kura ne niŋ dufaymiŋ saŋiŋ irnayeŋbe Al Kurunya hugiŋeŋ hinayeŋ. ⁴⁸Niŋgeb al beleŋ nene Al Kurunya hugiŋeŋ hitek biŋge gobe ne gago. ⁴⁹Asetiŋ yagobe sawsawa po kurun naŋa bana kuŋ heŋya biŋge ‘mana’ ineŋ haŋyen goyen nene hinhan gega, tumnaŋ kamamiŋ. ⁵⁰Goyenbe biŋge fudinde Al Kurun hitte mat katiŋ gobe gar hi. Al kura biŋge go niyyeŋbe Al Kurun diliŋde al kamtiŋ yara ma hiyyeŋ. ⁵¹Nebe al beleŋ nen Al Kurunya hugiŋeŋ hitekde niŋ biŋge Al Kurun hitte mat katiŋ goyen. Niŋgeb albe biŋge nene gabe tareŋ heŋ haŋyen gwahade goyen po, ne niŋ dufaymiŋ tareŋ irnayeŋ marbe Al Kurunya hugiŋeŋ hinayeŋ. Biŋge gobe ne gago. Alya bereya megen haŋ kurun gayen Al Kurunya hugiŋeŋ hinayeŋ goke teŋ nigeŋ gasoŋne yuneŋ,” yinyiŋ.

⁵²Be, Yesu beleŋ gwaha yinkeb Yuda mar goyen mere tiyyiŋ goke teŋbe, “Al gab dahadem yinŋeŋ gasoŋ dunke netek?” yeŋbe yinŋeŋ bana goŋ bipti forok irde yinŋeŋ uliŋ kadom mohonde tiyamiŋ. ⁵³Irkeb Yesu beleŋ yinyiŋ. “Fudinde wor po dineŋ hime, ne Al Urmiŋ gate gasoŋneya darineya ma nenayeŋbe Al Kurunya hugiŋeŋ heŋ heŋ gobe epte ma dende hiyyeŋ. ⁵⁴Munaŋ al kura gasoŋneya darineya niyyeŋ al gobe Al Kurunya hugiŋeŋ heŋ heŋ gobe yende hiyyeŋ. Irkeb nalu funande al gobe isaŋ heweŋ. ⁵⁵Gasoŋnebe nene Al Kurunya hugiŋeŋ hitek biŋge wor po, irdeb darine wor nene Al Kurunya hugiŋeŋ hitek fe wor po go goyen. ⁵⁶Niŋgeb al kura gasoŋneya darineya niyyeŋ al gobe neya hireŋ. Irkeb ne wor yeŋya hireŋ. ⁵⁷Adone gwahader hitiŋ al gore nad nerke megen

gar katmiriŋ. Irde yende saŋiŋde ne wor hugiŋeŋ heŋ heŋ tareŋnem yaŋ hime. Niŋgeb al kura gasoŋne niyyeŋ al gobe tareŋner Al Kurunya hugiŋeŋ hiriryen. ⁵⁸Nebe biŋge Al Kurun hitte mat kattin go goyen. Asetin yagobe biŋge ‘mana’ inen hanŋyen goyen nene hinhan gega, kuŋ kuŋbe kamamiŋ. Goyenbe al kura ne biŋge yeŋ hime gayen niyyeŋ al gobe Al Kurunya hugiŋeŋ hiriryen,” yinyiŋ. ⁵⁹Be, mere gabe Kapeneam taun bana Yuda marte gabu yare al saba yirde heŋya tiyyiŋ.

Yesuyen komatmiŋ yago budam tubul teŋ kwamiŋ

⁶⁰Be, sabamiŋ go nurdeb Yesuyen komatmiŋ yago kura beleŋ, “Saba gabe epte ma bebak titek, metenŋ wor po. Ganuŋ beleŋ epte nurde gama iryen?” yamiŋ. ⁶¹Irkeb Yesu go komatmiŋ yago goyen yinŋeŋ ulin mere goke ŋagak yeŋ hike nurdeb, “Merene gare dufaytin haga ira? ⁶²Gwahade kenem kame ne Al Urmiŋ gayen bikkeŋ hinhemde mulgaŋ heŋ hurkumeke neneŋbe dahade nurnayiŋ? ⁶³Al Kurun diliŋde al gergeŋ ird ird gobe Holi Spirit beleŋ po ga iryen. Megen niŋ marte saŋiŋde epte ma gwaha irnayiŋ. Merene gayen al kura beleŋ fudiŋde yeŋ nuryeŋbe Holi Spirit beleŋ al goyen Al Kurun diliŋde gergeŋ wor po iryen. ⁶⁴Goyenbe kuratiŋ kurabe merene gayen fudiŋde yeŋ ma nurde haŋ,” yinyiŋ. Gwaha yinyiŋ gobe metenmiŋ miŋ urde komatmiŋ yawariŋde mat po ganuŋ beleŋ yeŋ ge dufaymiŋ tareŋ ma irnayiŋ, irde ganuŋ beleŋ asogom haniŋde kiryeŋ goyen keŋkela nurde hinhin geb, gogo yinyiŋ. ⁶⁵Irdeb sopte yinyiŋ. “Kuratiŋ kura beleŋ merene pel irnayiŋ goke teŋbe, ‘Al kura yinŋeŋ epte ma ne hitte wanayiŋ, Nanner tareŋde po ga ne hitte wanayiŋ,’ dinhem gogo,” yinyiŋ.

⁶⁶Be, mere go yiriŋde matbe komatmiŋ yago budambe gama ird ird niŋ bada hamiŋ. ⁶⁷Irkeb Yesu beleŋ komatmiŋ 12 goyen, “Deŋ manan nubul tiniŋ yeŋ nurhan?” yineŋ gusuŋan yiryiŋ. ⁶⁸Irkeb Saimon Pita beleŋ wol heŋbe, “Doyaŋ Al Kurun, ge po ga al beleŋ nurde Al Kurunya hugiŋeŋ hitek merege yaŋ geb, gubul teŋ ganuŋ hitte kutek? ⁶⁹Irde gebe Al Wukkeŋ wor po Al Kurun hitte mat wayariŋ yeŋ nurde dufayniniŋ saŋiŋ irde hite, irde gebe fudiŋde al gwahade yeŋ nurde gunen hite,” inyiŋ. ⁷⁰Irkeb Yesu beleŋ wol heŋbe, “Deŋ komatne 12 gayenbe nigen po basiŋa dirmiŋ. Goyenpoga kuratiŋ kurabe Satanyen dufay gama irde hi geb!” yinyiŋ. ⁷¹Gobe Yudas, Saimon Iskariot urmiŋ niŋ nurdeb gogo yiriŋ. Yeŋbe Yesuyen komatmiŋ 12 bana hinhin gega, kamebe yeŋ beleŋ Yesu goyen asogom haniŋde kiryiŋ.

Yesube gabu nalu kurun kura “Ya Kawan Heŋ Heŋ” ineŋ hanŋyen goke Yerusalem hurkuriŋ

7 ¹Be, Yuda marte doyaŋ mar Yudia nanare hanŋyen goreb Yesu mayniŋ yeŋ yeŋ ge doyaŋ heŋ hinhan. Niŋgeb Yesube go nurdeb

kamde kamde naluminbe hako hinhin geb, Yudia naja belen kutek ma iriyin. Irkeb Galili naja bana gon po hen kun hinhin. ²Goyenbe Yuda marte gabu nalu kurun kura “Ya Kawan Hen Hen” inen hanjen goyen forok yetek binde hen hikeb ³Yesu kulin yago belen, “Naja ga tubul ten Yudia najare kwa ko. Gogab mata tinen turun yan wor po forok yirde hayen goyen gor nin komatge yago wor yennayin. ⁴Al kura al budam belen nurd nunwon yen goya banare ma mata ten hiyen geb. Gebe mata tinen turun yan forok yirde hayen geb, naja kurun gayen bana gebe al gwahade yen alya bereya yikala yirde kun hayin,” inamin. ⁵Yesu kulin yago yingen de wor yen ge dufaymin taren mun kura ma iramin geb, gogo gwaha inamin.

⁶Goke tenbe Yesu belen wol henbe, “Gwaha ten ten nalunebe hako geb. Munan den hittebe nalu kurun gabe igin ala po. ⁷Megen nin marbe epte ma den haram dirnayin. Goyenbe nebe yen mata ten han gobe bulun ten han yen huginen yinen himyen geb, goke igin ma nurd nunen han. ⁸Ningeb denbe igin nin gabu nalu kurunde gor kuran ko. Nere kun kun nalu wor pobe hako geb, nalune forok yeke gab hurken,” yinyin. ⁹Be, Yesu go gwaha yinenbe Galili gor po hinhin.

¹⁰Irkeb kulin yagobe Yesu go gor po tubul tenbe Yerusalem kwamin. Gega Yesu wor kame gab balmin hurkurin. ¹¹Be, gabu nalu kurun goyenter Yuda marte doyan mar belen yen ge nankenenbe, “Al gobe dare hi?” yen gusunan hen hinhan.

¹²Be, Yerusalem al gabu iramin bana kurun gob yen ge sisure tagaltin ala ten hinhan. Kura belenbe, “Yenbe al igin,” yekeb, kura belen, “Mon, yen belen al usi yirde hi,” yen hinhan. ¹³Goyenbe Yuda marte doyan mar goke kafura henbe al kura belen Yesu nin mun kura kawan ma rut yen hinhan.

Yesu belen gabu nalu kurunde gor al saba yiriyin

¹⁴Be, gabu nalu kurun goyen kun kahalte hewen ten hikeyabe Yesu gob Al Kurunyen ya balem koya milgu irtin bana al gabu irde hanjen sawsawa kurunde gor hurkunbe al saba yiriyin. ¹⁵Irkeb Yuda mar belen nurde hurkunbat tenbe, “Al gabe saba mun kura ma titin gega, dufay kurun gabe dare nin tiyun?” yamin.

¹⁶Irkeb meremin go nurdeb Yesu belen wol henbe, “Saba ten hime gabe nere mon. Saba gabe nad nerke wamirin al goyen hitte mat wan hi. ¹⁷Al kura Al Kurunyen dufay gama ire yen nuryen al gobe saba ten hime gayen Al Kurun hitte mat wan hi ma nigen dufayde mere ten hime goyen bebak tiyyen. ¹⁸Al kura yingen dufayminde mere ten hiyen al gobe al belen turun nirnan yen gwaha ten hiyen. Goyenbe al kura metenpe tiyayin yen hulyan iriyin al goyen turun irnan yen meten ten hiyen al gobe al fudinde, usi minmon. ¹⁹Den belen saba taren gama irde hanjen

gobe Mose beleŋ dunyiŋ. Goyenbe deŋ kurun gayen saba goyen keŋkela ma gama irde haŋ. Gega daniŋ mununniŋ teŋ haŋ?” yinyiŋ. ²⁰Gwaha yinkeb al buda gor gabu iramiŋ goreb, “Al kura muguneŋ ma teŋ hi geb, daniŋ gwaha yaha? Gebe ungurage yaŋ,” inamiŋ. ²¹Irkeb wol heŋbe, “Nebe Sabat nalure kura mata tiŋeŋ turuŋ yaŋ unkuŋeŋ forok irmiŋ. Irkeb goke hurkuŋkat tiyaŋ. ²²Goyenbe deŋ wor Mose beleŋ urtiŋ yago guba yeŋ yunnayiŋ yiriŋ goyen gama irtek yeŋbe Sabat nalure meten teŋ haŋyeŋ. (Guba yeŋ yeŋ mata gobe Mose beleŋ ma miŋ uryiŋ. Asetiŋ yago meheŋde hinhan gore miŋ uramiŋ.) ²³Niŋgeb diriŋ kura gote guba yeŋ yeŋ nalu goyen Sabat nalure forok yekeb Sabat nalu go yeŋ bada ma heŋ haŋyeŋ. Irde Sabat nalure buluŋ tihit yeŋ ma nurde haŋyeŋ. Niŋgeb ne wor al kura Sabat nalure sope irmeke igiŋ wor po hiyuŋ gega, daniŋ bitiŋ ar nirde haŋ? ²⁴Niŋgeb deŋbe al kura matamiŋ siŋare niŋ goyen po keneŋ goke ma tagal unnayiŋ. Gwaha titŋeŋbe al gore mata teŋ hi gote miŋ keŋkela bebak tenya ga gobe igiŋ ma buluŋ innayiŋ,” yinyiŋ.

Yesube Mesaia?

²⁵Be, mere gwahade yeke nurdeb Yerusalem niŋ mar kura beleŋ, “Al gabe nende doyaŋ mar beleŋ mayniŋ yeŋ kurut yeŋ haŋ al go goyen moŋ? ²⁶Al gabe kawan po mere teŋ hi. Goyenbe mel gore daha wet kura ma ineŋ haŋ. Niŋgeb doyaŋ mar wor yeŋbe Mesaia yeŋ nurde haŋ wet? ²⁷Goyenbe neŋbe al gabe gor niŋ yeŋ nurde hite. Gega Mesaia wayyeŋbe gor kura mat waya yeŋ ma po nurtek,” yamiŋ.

²⁸Be, mel gore gwaha yekeb ya koya milgu irtiŋ bana al gabu irde haŋyeŋ sawsawa kurun de gor po Yesu gore al saba yirde heŋyabe kuware, “Deŋbe fudinde ne gayen keŋkela nurd nuneŋ haŋ? Irde gor mat wayuŋ yeŋ nurde haŋ? Moŋ, deŋbe go ma nurd nuneŋ haŋ geb. Nebe dufayner ma gar wamiriŋ. Adone beleŋ nad nerke wamiriŋ. Matamiŋbe fudinde wor po. Goyenbe deŋbe go ma nurde uneŋ haŋ. ²⁹Goyenpoga nebe yeŋ beleŋ nad nerke wamiriŋ geb, keŋkela nurde uneŋ hime,” yinyiŋ.

³⁰Be, Yesu beleŋ go yiriŋ muŋ goke teŋbe teŋ mayniŋ tiyamiŋ. Gega mayke kamtek nalube hako hinhin geb, mayniŋ yeŋ kurut yamiŋ gega, kura muŋ sisaŋ ma uramiŋ. ³¹Goyenbe al buda bana goŋbe al budam Yesu niŋ dufaymiŋ saŋiŋ irtiŋ hinhan. Niŋgeb mel goreb, “Mesaia hoyan damiŋ beleŋ waŋbe al gare mata tiŋeŋ karkuwaŋ forok yirde hi goyen fole irde budam po iryeŋ? Epte moŋ!” yamiŋ.

³²Be, Farisi mar gobe al beleŋ mere gwahade teŋ sisu balgarat teŋ hike nuramiŋ. Irdeb Al Kurun doloŋ ird ird mata doyaŋ marte karkuwaŋmiŋya Farisi marya beleŋ Yesu fere tiniŋ yeŋ Al Kurunyen ya doyaŋ irde haŋyeŋ mar hulyaŋ yiramiŋ.

³³Be, Yesu beleŋ, “Nebe nalu ulyaŋde ma denya heŋbe mulgaŋ heŋ nad nerke wamiriŋ al hitte kweŋ. ³⁴Irkeb ne niŋ naŋkennayiŋ gega, go

ma nennayin. Irdeb ne heṇḍe gorbe deṇ gwahade mar gobe epte ma kunayin,” yinyin. ³⁵Irkeb Yuda mar goreb yinḡen ulin, “Al gabe dam beleṇ neṇ epte ma kentekde kweṇ yeṇ yeṇ hi? Yeṇbe nende al burgagaw kerde Grik marte naṇare kwamiṇ beleṇ goṇ kuṇ Grik mar wet saba yireṇ yeṇ yeṇ hi? ³⁶Gobe daha yihim yeṇbe, ‘Ne niṇ naṇkennayin gega, go ma nennayin. Irdeb ne heṇḍe gorbe deṇ gwahade mar gobe epte ma kunayin,’ yeṇ hi?” yamiṇ.

³⁷Be, gabu nalu kurunṇ goyen kuṇ kuṇ nalu funanḡde hiriṇ. Nalu funanṇ gobe Yuda mar beleṇ nalu kurunṇ yeṇ nurde haṇyen. Be, nalu go forok yekeb Yesu beleṇ huwardeb kuware gaha yinyin: “Al kura fe niṇ irkeb ne hitte waṇ fe niyyen. ³⁸Ninḡeb al kura ne niṇ dufaymiṇ tareṇ iryenḡe Al Kurunṇen asanḡde katiṇ gwahade goyen po, Al Kurunṇa hugineṇ heṇ heṇ matare niṇ fe gore biṇḡde mat marde waṇ hiyen,” yinyin. ³⁹Be, Yesu beleṇ fe kahayanṇ merem tiyyinṇ gobe kame al kura yeṇ ge dufaymiṇ tareṇ irnayinṇ marbe Holi Spirit tenayinṇ yeṇ gogo yiriṇ. Gega goyenterbe Yesu goyen Al Kurunṇ hitte ma mulḡanṇ heṇ hurkunṇ deṇem turunṇ yaṇ goyen go ma tiriṇḡde hinhin geb, Holi Spiritbe kateṇ miṇmoṇ.

⁴⁰Be, meremiṇ go nurdeb al kura beleṇ, “Fudinde, al gabe kame wayyenṇ yitiṇ Al Kurunṇen mere basanṇ Al go goyen gago,” yamiṇ. ⁴¹Irkeb kura beleṇḡe, “Yeṇbe Mesaia,” yamiṇ. Goyenbe kura beleṇ, “Moṇ, Mesaiaḡe Galili naṇare mat ma wayyen geb. ⁴²Al Kurunṇen asanḡdebe Mesaiaḡe Dewityen miṇḡde mat forok yiyyenṇ, irde Dewit hinhin taunde Betlehem gor kawanṇ hiyyenṇ yitiṇ moṇ?” yamiṇ ⁴³Be, Yesu niṇ teṇḡe al buda goyen kurabe Yesu niṇ hekeb kurabe Yesu asogo iramiṇ. ⁴⁴Kura beleṇ Yesu go teṇ mayniṇ yeṇ kurut yamiṇ gega, sisaṇ ma po uramiṇ.

Yuda marte doyanṇ marbe Yesu niṇ dufaymiṇ saṇiṇ ma iramiṇ

⁴⁵Be, ya balem doyanṇ irde haṇyen mar go Yesu fere tiniṇ yeṇ kwamiṇ gega, walip yeṇ nurdeb mulḡanṇ heṇ Al Kurunṇ doloṇ ird ird mata doyanṇ marte karkuwanṇmiṇya Farisi marya hitte kwamiṇ. Kukeb yeṇ beleṇ, “Daniṇ al go teṇ ma wayhanṇ?” yineṇ gusunṇanṇ yiramiṇ. ⁴⁶Irkeb ya balem gote doyanṇ mar beleṇ wol heṇḡe, “Al kura beleṇ yeṇ mere igiṇ po teṇ hi gwahade kura ma teṇ hiyen,” yinamiṇ. ⁴⁷Irkeb Farisi mar goreb, “Deṇ wor al gore usi dirde bitiṇ yawara?” yinamiṇ. ⁴⁸Irdeb, “Doyanṇ marya Farisi marya kura dufaymiṇ al goke tareṇ irke yenanṇ? Hubu wor po geb! ⁴⁹Al buda Moseyen saba keṇkela ma nurde hanṇ mar goreb gogo gama irde hanṇ. Go mar gobe Al Kurunṇen bearar bana po hinayinṇ,” yamiṇ. ⁵⁰⁻⁵¹Irkeb Nikodemus beleṇ huwardeb, “Nende sabarebe al kura merem yaṇ irtek yeṇḡe al gote mere wor wor nurde gab merem yaṇ irnayinṇ yitiṇ moṇ?” yineṇ gusunṇanṇ yiriṇ. Nikodemusbe Farisi mar al gega, hakot yeṇ beleṇ kuṇ Yesu keneṇ sabamiṇ nuriṇ al go goyen. ⁵²Be, Nikodemus beleṇ gwaha yinkeb mel gore wol heṇḡe, “Ge mananṇ Galili niṇ al? Al

Kurujyen mere kenkela kenayin. Irde gab Al Kurujyen mere basan al kura Galili bana mat ma wayyen yitin goyen bebak tiyayin,” inamin.

[⁵³Be, Yerusalem gabu iramin marbe bur yenbe tiyumin tiyumin kwamin.

8

¹Goyenbe Yesube Olip dondonde hurkurin.

Bere mata bulun minyan kura Yesu hitte tawayamin

²Be, fay urkeb sopte Al Kurujyen ya balemde kurin. Irkeb al budam wan kalyan keramin. Irkeb keperde saba yiryn. ³Be, Moseyen saba marya Farisi marya belen bere un yan kura goyen al hoyanya duwan ten hike kenenbe ten wayamin. Tawakeb bere gob gabu iramin goyen dilin mar huwaryin. ⁴Irkeb mel goreb, “Tisa, bere gabe un minyan gega, al hoyanya duwan ten hike kenhet. ⁵Moseyen sabarebe bere gahade gab horare gasa yirke kamnayin yitin hi. Munan gebe gokeb daha yawayin?” inen gusunan iramin. ⁶Gusunan gwahade iramin gobe Yesu belen daha wet kura yekeb meremin gore po bul irde merem yan irnin yenbe gusunan gwahade iramin gogo. Goyenbe Yesu gob urgun kan hani po megen mere kura kan hinhin. ⁷Irkeb mel gore wol hen hen ge pakku irke huwardeb yinyin. “Den bana gayen al kura mata bulun minmon wor po hi kenen gab yen wa mehen hen horare mayyen,” yinyin. ⁸Irdeb sopte urgun kan megen mere kan hinhin.

⁹Be, mere go nuramin marbe yunkuren yunkuren siksuk irde kun hinhan. Parguwak wa mehen hamin. Kun kunbe Yesuya bere goya po gor hinaryum. ¹⁰Irkeb Yesu belen huwardeb, “Bere, al buda gar gobe damde han? Al kura merem yan ma gira?” inyin. ¹¹Irkeb bere goreb, “Gwaha, doyan al, hubu po,” inyin. Irkeb Yesu belen, “Be, ne wor merem yan ma giren geb, kwa ko. Irdeb mata bulun sopte ma tiyayin,” inyin.]^h

Yesube hulsi

¹²Be, kame Yesu gob al saba yirdeb, “Nebe alya bereya Al Kuruj yikala yird yird hulsi. Ningeb al kura ne gama niryenbe mata bulunyen kidoma bana ma kun hiyen. Irde Al Kurunya huginen hen hen gote hulsi goyen tiyyen,” yinyin. ¹³Irkeb Farisi mar belen inen tenbe, “Mere ten ha gobe gigen ge po ten yen ha. Ningeb merege kuruj gobe min minmon geb, al kura belen fudinde yen ma nuryen,” inamin. ¹⁴Irkeb wol henbe, “Nebe gor mat wamirin, irde gor kwen yen nurde hime. Ningeb nigen ge mere ten hime gayenbe min manan mere ten hime. Goyenbe denbe ne gayen gor mat wamirin, irde gor kwen yen hime gobe mun kura ma nurde han. ¹⁵Denbe megen nin alyen dufayde po merem yan nirde han. Gega nebe dende matare al mun kura merem yan ma irde himyen. ¹⁶Munan ne

^h 8:11 Asan hoyandebe 7:53-8:11 gobe ma hi.

belej al kura merem yan yiren mar gobe ne nun-kuren ma yiren. Nanne hulyan nirke wamirin al goya har geb, mel goyen merem yan yiren mata gobe mata huwak wor po. ¹⁷Dende saba tarendebe mere kura fudinde hej hej ninbe al irawa belej mere goyen sanj irkeb mere gobe fudinde yej nurnayin yej katin hi. ¹⁸Ningeb nebe nigen ge mere tej himyen, irde Adone nad nerke wamirin al gore wor ne yej hime gwahade po yej hi,” yinyin. ¹⁹Irkeb mel gore, “Adogebe dare hi?” inen gusujan iramin. Irkeb, “Denbe neya Adoneyab go ma nurde dunen han. Ne nurd nunen han manhan Adone wor nurde unwon,” yinyin. ²⁰Saba gabe Al Kuruyen ya balem bana Al Kurun galak ird ird gasun bindere gor hej al saba yiriyin. Goyenbe yej mayke kamtek nalube hako geb, al kura wan tej minjon.

²¹Be, sopte po Yesu belej, “Nebe kwej. Irke ne nin nan-kennayin. Irdeb mata bulun bana po hej kamnayin. Goyenbe ne kwenje gorbe den epte ma kunayin,” yinyin. ²²Be, Yesu mere tiyyin goyen Yuda mar belej nurdeb, “Al gab yingen temeyen tiya? Gwahade ningeb gogo, ‘Ne kwenje gorbe den epte ma kunayin,’ yej hi?” yej yingen ulin kadam gusujan gird tiyamin. ²³Goyenbe Yesu belej teban yinyin. “Denbe megen gar nin mar gega, nebe gwahade mon. Denbe megen gar nin mata gama irde han gega, nebe Al Kurun hire gor nin mata gama irde hime. ²⁴Denbe mata buluntin bana gon po hej kamnayin dinhem gobe fudinde wor po dinhem. Ningeb nebe al gwahade yej dinen himyen go goyen fudinde yej ma nurnayinbe mata buluntin bana gon po hej kamnayin,” yinyin. ²⁵Irkeb mel goreb, “Gebe ganun al wor po?” inen gusujan iramin. Irkeb wol henbe, “Nebe al gwahade yej mehenje mat wor po dinen himyen al go goyen. ²⁶Nebe mere misin budam goke den gayen merem yan dirtek hime. Goyenbe nad nerke wamirin al gobe mataminbe fudinde geb, nebe al gore ninen hiyen go po megen nin mar kurun gayen momon yirde hime,” yinyin.

²⁷Be, mel gobe Yesu belej Nani ge mere dirde hi yej ma bebak tiyamin. ²⁸Gwahade ningeb Yesu belej, “Ne Al Urmin gayen den belej kuruse hende nisan hej mununke kammeke gab nebe al gwahade dinen himyen goyen goke bitin bak yiyyen. Irdeb nebe dufayner ma mere tenbe Nanne belej saba nirde hi goyen po tagalde himyen goyen goke bebak tinayin. ²⁹Nad nerke wamirin al gobe neya har. Nebe yej amanen nuryen mat po mata tej himyen geb, nubul ma tej hiyen,” yinyin. ³⁰Be, al budam meremin nuramin mar gobe Yesu nin dufaymin tarej iramin.

Yesuya Abrahamya

³¹Be, Yuda mar kura yej ge dufaymin tarej irhet yamin mar goyen Yesu belej, “Sabane gayen kenkela tanarnayinbe komatne wor po henayin. ³²Irde gab mere fudinde goyen nurnayin. Irke mere fudinde nurnayin gore gab mata bulun bana mat dad sin diryen,” yinyin. ³³Irkeb

mel gore wol heŋbe, “Neŋbe Abrahamyen asem yago. Irde al kurat yufuk bana heŋ meterŋ muruŋgem moŋ ma teŋ hitiŋ. Niŋgeb daha yihim yeŋbe megen niŋ kanduk bana ma hinayiŋ dineŋ ha?” inamiŋ. ³⁴Irkeb wol heŋbe, “Fudinde wor po dineŋ hime, al kura mata buluŋ tiyyeŋ gobe mata buluŋ yufukde gor po heŋ gote kanduk po teŋ hiyeŋ. ³⁵Be, al kura al kurate yufukde heŋ muruŋgem moŋ meterŋ teŋ uneŋ hiyen al gobe hugiŋeŋ hitek gasuŋ miŋmoŋ hiyyeŋ. Goyenbe doyaŋ almiŋ gote urmiŋbe hugiŋeŋ naniŋya hiriryen. ³⁶Niŋgeb ne Al Urmiŋ gare mata buluŋtiŋ yad siŋa yirde dawarmekeb fudinde wor po deŋbe mata buluŋ bana ma wor po hinayiŋ. ³⁷Deŋbe Abrahamyen asem yago yeŋ nurde duneŋ hime. Goyenbe bitiŋ bana gobe mata buluŋ beleŋ po makiŋ hitiŋ geb, merene nurtek ma haŋ. Niŋgeb mununniŋ teŋ haŋ gogo. ³⁸Nebe Nanne beleŋ mata nikala nirke yeneŋ himyen goyen po momoŋ dirde hime. Munaŋ deŋbe nantiŋ beleŋ mere dirke nurdeb goyen po teŋ haŋ,” yinyiŋ. ³⁹Irkeb mel goreb, “Abrahambe adoniniŋ,” inamiŋ. Irkeb, “Deŋbe Abraham diriŋeŋ weŋ manhan yeŋ mata teŋ hinhin goyen po teŋ hiwoŋ. ⁴⁰Nebe mere fudinde Al Kuruŋ hitte mat nurmiŋ goyen po momoŋ dirde himyen. Goyenpoga deŋbe goke mununniŋ teŋ haŋ. Abrahambe mata gwahade kura ma teŋ hinhin. ⁴¹Niŋgeb deŋbe adotiŋ beleŋ mata teŋ hiyen goyen po teŋ haŋ,” yinyiŋ. Irkeb mel gore igiŋ ma nurdeb, “Neŋbe totpa diriŋ moŋ. Adoniniŋbe Al Kuruŋ uŋkureŋ gogo po,” inamiŋ. ⁴²Irkeb Yesu beleŋ, “Nebe Al Kuruŋ hitte mat wamiriŋ hime geb, nantiŋbe fudinde Al Kuruŋ manhan ne niŋ amaŋeŋ nurde hiwoŋ. Nebe dufayner ma wamiriŋ, yeŋ beleŋ nad nerke wamiriŋ. ⁴³Deŋbe merene epte ma nurtek geb, gogo merene miŋ bebak ma teŋ haŋ. ⁴⁴Deŋbe adotiŋ Satanyen diriŋeŋ weŋ. Irdeb adotiŋde dufay buluŋ goyen po gama irde mata titek po dirde hi. Yeŋbe mata fudinde muŋ kura biŋ bana ma hi geb, miŋde mat wor po al gasa yirke kamde kamde al hiriŋ. Yeŋbe usi al, irde usi mere gote miŋ al. ⁴⁵Niŋgeb mere fudinde dineŋ hime gega, ne niŋ hekkeŋ ma nurde haŋ. ⁴⁶Deŋ bana gayen ganuŋ al kura beleŋ mata buluŋ gwahade tiyaŋ ninyeŋ? Nebe mere fudinde teŋ hime gega, daniŋ ne niŋ hekkeŋ ma nurde haŋ? ⁴⁷Al kura Al Kuruyuŋbe meremiŋ nurde hiyen. Niŋgeb deŋbe Al Kuruyuŋ moŋ geb, Al Kuruyuŋ mere ma nurde haŋ gogo,” yinyiŋ.

⁴⁸Be, Yesu beleŋ gwaha yinkeb Yuda mar gore wol heŋbe, “Gebe Samaria niŋ al, uŋgura beleŋ ketal gurtiŋ gintek gobe fudinde wor po gintek,” inamiŋ. ⁴⁹Irkeb wol heŋbe, “Nebe uŋgura ma ketal nurtiŋ hime. Nebe Adone turuŋ irde himekeb deŋ beleŋbe soŋ heŋ ne ma turuŋ nirde haŋ. ⁵⁰Nebe deŋne turuŋ yaŋ ird ird niŋ ma nurde hime. Goyenbe deŋne turuŋ yaŋ irtek albe uŋkureŋ hi. Niŋgeb merem yaŋ nirde haŋ gobe yeŋ haniŋde kereŋ. ⁵¹Fudinde wor po dineŋ hime, al kura merene gama iryeŋbe go ma kamyen,” yinyiŋ.

⁵²Be, Yuda mar gobe Yesu mere tiyyin goyen nurdeb, “Haŋkab gebe uŋgura ketal gurtin ha yen nurde gunhet. Abrahambe kamyin, irde Al Kurunyen mere basan mar manan kamamin. Gega gebe, ‘Al kura merene gama iryenbe go ma kamyen,’ yen ha?” ⁵³Abrahamya Al Kurunyen mere basan maryabe kamamin. Munan ge gayenbe yen folek? Al dahade go goyenbe ge gago?” inamin. ⁵⁴Irkeb wol henbe, “Denne turun yan irenbe min minmon hiyyen. Goyenbe Nanne den belen Al Kuruninin yen han al gore denne turun yan irde hi geb. ⁵⁵Denbe yen ma nurd unen han gega, nebe nurde unen hime. Irdeb ne belen al goyen ma nurde unen hime yewenbe ne wor den yara usi al hewen. Goyenbe nebe nurde unenbe meremin gama irde himyen. ⁵⁶Asetin Abrahambe ne megen gar wan wan nalu goyen kenmewon yen nuryin. Irdeb kenenbe aman wor po hiriŋ,” yinyin. ⁵⁷Irkeb mel goreb, “Ge gayen damage 50 ma hen hi gega, Abraham kenarin?” inamin. ⁵⁸Irkeb wol henbe, “Fudinde wor po dinen hime, Abraham forok ma yirin ya nebe hinhem!” yinyin. ⁵⁹Gwaha yinkeb mel gore hora yadeb maynin tiyamin. Irkeb bana kunbe Al Kurunyen ya balem goyen tubul ten hoyande kuriŋ.

Al diliŋ titmin kura sope iryin

9 ¹Be, Yesu gob belen kun henya be al kura miliŋ belen diliŋ titmin gwahade po kawan kirtin goyen kinyin. ²Irkeb komatmin belen, “Rabai, ganun belen mata bulun tiyyin? Al gare ma miliŋ nanin belen tiyaryum geb, gago gwahade po kawan hiriŋ?” inamin. ³Irkeb wol henbe, “Diliŋ titmin gobe yingenbe mata bulun ma miliŋya naninyat mata bulun belen ma iryin. Gobe Al Kurunyen sanin yen hitte kawan forok yiyyen yenbe gwahade po kawan hiriŋ. ⁴Munan nenbe nan hikeya po nad nerke wamirin al gote meten ten hitek. Monko kidoma hekeb epte ma meten titek geb. ⁵Nebe megen gar hime nature gabe alya bereya Al Kurun yikala yird yird hulsi geb,” yinyin.

⁶Be, gwaha yinenbe mulowore meyan tenbe tigiri tike wona hekeb ten al gote diliŋde sam iryin. ⁷Gwaha irdeb, “Kun Siloam fe alare delge hala,” inyin. (Siloam gote minbe Ten Kerke Kutin.) Irkeb al gobe kun fete gor diliŋ haldebe diliŋ wuk yeke nankenenbe mulgan hen wayyin. ⁸Irkeb tiyunminde nin marya hakot diliŋ titmin hen kanan ten hike kenen hitin mar goreb gusunan hamin. “Al gabe belen keperde kanan ten hiyen al go goyen mon?” yamin. ⁹Irdeb al kura belen, “Al diliŋ titmin gar go goyen,” yekeb kura belenbe, “Mon, yen mon. Al kura yen yara po be,” yamin. Goyenbe al goreb, “Nebe yen han al goyen,” yinyin. ¹⁰Irkeb mel goreb, “Daha matbe igin hen gogo nankenha?” inamin. ¹¹Irkeb, “Al Yesu inen han yen al go gore wona irde delne sam yira. Irdeb, ‘Kun Siloam fe alare hala,’ ninkeb kun haldebe gago nankenhem,” yinyin. ¹²Gwaha yinkeb, “Al gobe dare hi?” inen gusunan irkeb, “Go ma nurde hime,” yinyin.

¹³Be, mel gore al goyen tenj Farisi mar hitte tukamiņ. ¹⁴Be, Yesu belen mulowo meyan irde tigiri tenj gore po al diliņ titmiņ goyen sope iryiņ nalu gobe Sabat nalu. ¹⁵Ninggeb Farisi mar wor yeņ belen daha mat diliņ igiņ heke naņkinyiņ goke gusuņaj iramiņ. Irkeb, “Yeņ belen wonja tenj delner sam irke kuņ fete delne haldebe naņkenhem,” yinyiņ. ¹⁶Irkeb Farisi mar kura belen, “Al gobe Sabat nalure niņ mata ma gama ira geb, yeņbe Al Kuruņ hitte mat ma watiņ geb,” yamiņ. Goyenbe kura belenbe, “Gwahade kenem mata buluņ al belenbe dahadem mata tiņeņ turuņ yaņ Al Kuruņ belen po ga yirtek goyen yirde hi?” yineņ gusuņaj hamiņ. Be, mel gobe gwaha tenj yingeņ uliņ kadom mohonđe tiyamiņ. ¹⁷Be, gwaha tenj kuņ kuņ funaņbe al diliņ igiņ hiriņ al goyen gusuņaj iramiņ. “Delge sope ira al gobe ganuņ yeņ nurde ha?” inamiņ. Irkeb al goreb, “Yeņbe Al Kuruņyen mere basaņ al geb,” yinyiņ.

¹⁸Be, Yuda marte doyaņ marbe al diliņ titmiņ gega sope irke naņkinyiņ goyen fudinde yeņ ma nuramiņ. Irdeb miliņya naniņya niņ keya heke wayaryum. ¹⁹Wakeb, “Al gayenbe urtiriņ? Irde yeņbe diliņ titmiņ gwahade po kawaņ hiriņ yeņ haryen go goyen? Goyenbe dahade niņgeb haņkabe naņkeneņ hi?” yineņ gusuņaj yiramiņ. ²⁰Irkeb al gote naniņya miliņya belen wol heņbe, “Gabe urdere. Irdeb diliņ titmiņ gwahade po kawaņ hiriņ gobe nurde har. ²¹Goyenbe daha mat naņkena, irde ganuņ belen sope ira gobe ma nurde har. Yeņbe parguwak geb, yingeņ momoņ diryeņ geb, gusuņaj irnaņ” yinaryum. ²²Be, Yuda marte doyaņ mar gobe bikkeņ mere sege irdeb, “Al kura Yesube Mesaia yekeb takira titek. Irkeb gabu yaniniņde epte ma wanayiņ,” yeņ mere mayamiņ. Ninggeb naniņya miliņya go mere goyen nuraryumde geb, doyaņ mar goke kafura heņbe, ²³“Yingeņ gusuņaj irnaņ. Yeņbe parguwak geb,” yinaryum gogo.

²⁴Be, sopte al diliņ titmiņ go inke wayyiņ. Irkeb, “Delge sope ira al gobe mata buluņ al yeņ nurde uneņ hite. Ninggeb al go deņem turuņ yaņ irtiņeņbe Al Kuruņ deņem turuņ yaņ ira ko,” inamiņ. ²⁵Irkeb wol heņbe, “Al gobe mata buluņ al ma gwahade moņ gobe ma nurhem. Goyenpoga nebe delne titmiņ hinhem gega, gago naņkenhem go po ga nurde hime,” yinyiņ. ²⁶Gwaha yinkeb mel goreb, “Daha daha gira? Daha mat delge sope irke naņkenha?” ineņ gusuņaj iramiņ. ²⁷Irkeb wol heņbe, “Nebe bikkeņ momoņ dirhem gega, merene ma nurhaņ. Gega daniņ sopte nurniņ tenj haņ? Deņ manaņ yende komatmiņ hiniņ yeņ tenj haņ?” yinyiņ. ²⁸Gwaha yinkeb mel goreb sukal irde, “Ge po gab al gote komatmiņ! Neņbe Moseyen komat geb! ²⁹Mosebe Al Kuruņ belen mere iryiņ gobe nurde hite. Goyenbe al gobe gor kura mat wayuņ yeņ ma po nurde uneņ hite,” yamiņ. ³⁰Irkeb wol heņbe, “Be, deņ belen al gobe gor kura mat wayuņ yeņ ma nurde hite yeņ haņ gobe kukuwamneņ wor po. Gega nebe al gore sope nirke gago naņkeneņ hime. ³¹Al Kuruņbe mata buluņ marte merebe go ma wol heņ yuneņ hiyen. Munaj Al Kuruņ palap

irde dufaymin gama irde hanj mar gote merebe nurde wol henj hiyen yep nurde hityen. ³²Irde al kura al diliŋ titmin gwahade po kawaj hitiŋ goyen sope irke nanjintiŋ baranjen kura ma po nurde hityen. ³³Sope nira al gobe Al Kurun hitte mat ma wayun manhan det kura ma irwonj,” yinyiŋ. ³⁴Gwaha yinkeb mel gore wol henbe, “Gebe mata bulun bana po kawaj henj kun kurun hawan. Ningeb daniŋ ge gahade gare saba direnj tenj ha!” inenbe gabu yamiŋde mat huginenj takira tiyamiŋ.

³⁵Be, Yesu gob al diliŋ titmin goyen Yuda marte doyanj mar beleŋ takira tiyamiŋ gote mere momonj nuryiŋ. Irdeb al goyen kenenbe, “Ge gayen Al Urmin niŋ dufayge tareŋ irha?” inyiŋ. ³⁶Irkeb al goreb, “Doyanj al, yenbe al ganun? Momonj nira. Irkeb yenj ge dufayne tareŋ irenj,” inyiŋ. ³⁷Irkeb Yesu beleŋ wol henbe, “Al gobe bikkenj kenha. Fudinde wor po, al gobe mere girde hime al ne gago po geb,” inyiŋ. ³⁸Irkeb al goreb, “Doyanj Al Kurun, ge niŋ dufayne sanj irhem,” inenbe dokolhonj yugulunj tenj turunj iryiŋ. ³⁹Irkeb, “Nebe al iginya bulunya pota yird yird niŋ megen gar wamiriŋ. Gogab ne niŋ dufayminj tareŋ irnayiŋ marbe diliŋ titminj gega nanjinyen go gwahade Al Kurunyen dufay kenkela bebak tinayiŋ. Munanj al kura harhok nunnayiŋ marbe al kura diliŋ titminj yara Al Kurunyen dufay epte ma bebak tinayiŋ,” inyiŋ. ⁴⁰Irkeb Farisi mar kura yenja hinhan gore nurdeb, “Gebe nenj gayen wor diliŋ titminj dinen ha?” inamiŋ. ⁴¹Irkeb wol henbe, “Denbe dindikenj ge yenj, ‘Dilniniŋ titminj geb, Al Kurunyen mere kenenj bebak ma tenj hite,’ yenj hanj manhan Al Kurun beleŋ mata bulun mar ma dinwonj. Goyenbe dindikenj, ‘Nenbe dilniniŋ titminj monj, igiŋ Al Kurunyen mere kenenj bebak tenj hite,’ yenj hanj geb, bikkenj mata bulun bana hanj yenj denen hime,” yinyiŋ.

Sipsipya doyanj alminiya

10 ¹Be, Yesu go sopte gaha yinyiŋ: “Fudinde wor po dinen hime, al kura sipsip niŋ koya kirtiŋ goyen yamemde mat ma waj koya go nandu urde hurkuyenj al gobe kawe marya al gasa yirniŋ yirniŋ yirde detminj kawem yade hanjen marya geb. ²Goyenbe sipsip doyanj al wor pobe sipsip koya gote yamere mat waj hurkuyenj. ³Irkeb sipsip koya gote yame doyanj irde hi al goreb yame fegelde unyenj. Irkeb hurkunj sipsipminj goyen denj yurke tumnanj wakeb bul yirde sijare yukuyenj. ⁴Be, sipsipminj yingenj go po yade sijare yukunbe yingenj wa mehenj henj kun henja mere yirde hiyenj. Irkeb melak nurde hanjen geb, yenj po gama irnayiŋ. ⁵Goyenbe al tinenj gote melak ma nurde hanjen geb, kenenj yilwa irde busaharnayiŋ,” yinyiŋ.

⁶Be, Yesube maya mere gwaha mat yiryiŋ gega, sabamiŋ nurde hinhan marbe goke dinen hi yenj ma bebak tiyamiŋ. ⁷Nengeb Yesu gore sopte gaha yinyiŋ: “Fudinde wor po dinen hime, nebe sipsip niŋ koya kirtiŋ gote yame.

⁸Ningeb al kura asogo nirde neŋ wa neŋ wa teŋ haŋyen mar kuruŋ gobe kawē marya al gasa yirniŋ yirniŋ yirde detmiŋ kawem yade haŋyen marya geb, sipsip gore meremiŋ ma nuramiŋ. ⁹Nebe yame yara. Ningeb al kura ne hitte mat waŋ Al Kuruŋ hire gor hurkuyenbe det kura beŋe epte ma buluŋ iryen. Al gobe sipsip beŋe koya biŋde hurkuŋ usaŋ heŋ siŋare kateŋ yamuŋ nene haŋyen go gwahade goyen igiŋ po hiyen. ¹⁰Kawe albe sipsip kawē teŋ gasa yirde buluŋ buluŋ yireŋ yeŋ waŋ hiyen. Goyenpoga nebe merene nurde haŋ mar gob Al Kurunya hugiŋe heŋ heŋ goyen yuneŋ. Irkeb mel gobe Al Kurunya hugiŋe hinayiŋ goyenbe igiŋ wor po hinayiŋ.

¹¹“Be, nebe sipsip doyaŋ al igiŋ. Sipsip doyaŋ al igiŋbe sipsipmiŋ ge teŋ yingen kamde kamde niŋ ma nurde hiyen. Igiŋ kamyen. ¹²Goyenbe al damu irke ga sipsip doyaŋ yirde hiyen al gobe sipsip gote miŋ al moŋ. Ningeb kulu duwi kura wake keneŋbe sipsip goyen gor po okohom yubuŋ teŋ busaharyen. Irkeb kulu duwi beŋe sipsip goyen yisike burgagaw kernayiŋ. ¹³Al gobe damu irke hora niŋ po nurde sipsip doyaŋ yirde hiyen geb, sipsip goke ma nurde busaharyen.

¹⁴⁻¹⁵“Be, nebe sipsip doyaŋ al igiŋ. Nanne beŋe nurd nuneŋ hi, irkeb ne wor nurd unen hime. Gwahade goyen po, nebe sipsipne nurde yuneŋ hime, irke sipsipne wor nurd nuneŋ haŋ. Irde sipsipne teŋ kame yeŋbe igiŋ kameŋ. ¹⁶Nebe sipsipne hoyan manan haŋ. Gobe koya bana gor ma haŋ. Goyenbe go manan yawaren. Yeŋ manan melakne nurnayiŋ. Irde sipsip koya bana haŋ goya tumnan hike doyaŋ yird yird al manan ne nuŋkuren po heŋ.

¹⁷“Nebe kame sopte huwareŋ yeŋ nurdeb Nanner alya bereya goke teŋ kameŋ. Ningeb Nannebe goke teŋ ne gayen bubulkuŋne wor po yeŋ nurde nuneŋ hi. ¹⁸Al kura beŋe tareŋmiŋde epte ma mununke kameŋ. Nebe alya bereya goke kame yeŋbe igiŋ kameŋ, irde sopte huware yeŋbe igiŋ huwareŋ. Go tiyen gobe Adone beŋe gwaha tiyayiŋ ninyiŋ geb, gogo tiyen,” yinyiŋ.

¹⁹Be, mere tiyiŋ goyen nurdeb Yuda mar beŋe sopte yingen uliŋ kadom mohonde tiyamiŋ. ²⁰Al budambe, “Al gabe ungura ketal urtiŋ geb, kukuwa wor po! Ningeb daniŋ meremiŋ nurde haŋ?” yamiŋ. ²¹Goyenbe kurabe, “Meremiŋbe ungura ketal urtiŋ al beŋe mere titiŋ yara moŋ. Ungurabe al diliŋ titmiŋ igiŋ sope iryen? Epte moŋ geb,” yamiŋ.

Yuda mar tumnan Yesu asogo iramiŋ

²²Be, kuŋ kuŋ gabu nalu kuruŋ kura “Ya Balem Al Kuruŋ Untek” inen haŋyen goyen Yerusalem forok yiriŋ. Goyenterbe naŋa uysuŋ wor po heŋ heŋ nalu.ⁱ ²³Be, Yesube Al Kuruyen ya balem bana ya kawan

ⁱ **10:22** Naŋa uysuŋ wor po heŋ heŋ nalu gobe ais kateŋ hiyen geb, anutayen mere matbe “winta” yeŋ haŋyen.

yulyanjen kura Solomonyen Paranda inen hanjen bana goyan kuj hinhin. ²⁴Irkeb Yuda mar belej wan Yesu kalyan kerdeb, “Daha nana gab nebe al gwahade yen bebak dirkeb kukuwamjen ma nurtek? Gebe Mesaia kenem bebak po dirayin,” inamin.

²⁵Irkeb Yesu belej wol henbe, “Nebe momon dirmin gega, merene goyen fudinde yen ma nurde han. Mata tinjen turjun yan ne belej Nanner sanjen forok yirde himyen goreb nebe al gwahade yen dikala dirde han. ²⁶Goyenbe denbe nere sipsip mon geb, merene fudinde yen ma nurde han. ²⁷Nere sipsipbe melakne nurde gama nirde han. Ne wor sipsip go nurd yunen hime. ²⁸Nebe Al Kurunya huginen hen hen goyen yen yunen himyen. Ningeb go ma po bulun henayin. Irdeb al kura belej hanner mat epte ma sipsipne kura goran niryen. ²⁹Nanne belej alya bereyamin sipsip yara goyen ne nuntin. Yenbe taremin kurun wor po. Ningeb sipsip goyen yen doyan yirde hiyende mat epte ma al kura belej goran yiryen. ³⁰Neya Adoneyabe unken po geb,” yinyin.

³¹Be, Yesu belej gwaha yinkeb mel gore sopte hora yadeb maynin tiyamin. ³²Goyenbe Yesu belej yinyin. “Nebe meten igin wor po forok yirde dunen himyen. Gega meten igin damin goyen goke igin ma nurde mununnin ten han?” yinyin.

³³Irkeb mel gore wol henbe, “Nenbe mata tinjen forok yirde hayen goyen goke ma mugunnin ten hite. Goyenbe gebe al nen yara po gore, ‘Nebe Al Kurun,’ yen ha gobe Al Kurun sukal irde ha geb, goke mugunnin ten hite,” inamin.

³⁴Irkeb wol henbe, “Dende sabarebe Al Kurun belej Israel marte doyan mar kura turun yirdeb, ‘Denbe nigen yara,’ gwaha yitin goyen kapyan ma hen hanjen? ³⁵Al Kurun belej meremin yunin mar goyen, ‘Denbe nigen yara,’ yinyin. Al Kurunyen asande nin merebe fudinde wor po epte ma usi yetek. ³⁶Nebe Adone belej basina nirde nad nerke megen gar wamirin. Ningeb nebe Israel marte doyan mar kura Al Kurun belej, ‘Denbe nigen yara,’ yinyin mar gote folek. Gega dahade ningeb nebe Al Kurun Urmin yemekeb den belej Al Kurun sukal irha ninhan? ³⁷Ne belej Adoner meten ma ten himeke nenenbe dufayitin ne nin tare ma irnayin. ³⁸Goyenbe gwaha ten hime kenem ne nin heken nurnayin. Gega gwaha ten temin metenjen kenem mata tinjen turjun yan forok yirde himyen go po yenenbe fudinde yen nurnayin. Gogab Adonebe neya hike, nebe yenya har goyen bebak tinayin. Irde yenya neyabe unken po yen nurnayin,” yinyin. ³⁹Be, meremin goke mel gore sopte ten maynin tiyamin. Gega isal po uryin.

⁴⁰Be, gor matbe Yodan fe sina kurhan han kapyay Yon belej al baptais yirde hinhin belej gon kurin. Irdeb gon hinhin. ⁴¹Irkeb al budam yen hitte wayamin. Irdeb, “Yonbe mata tinjen turjun yan kurayen kurayen ma forok yiryin. Goyenbe yen belej al gake tagalde hinhin gobe fudinde wor

po,” yaminj. ⁴²Irdeb go gasunde gorbe al budam yenj ge dufayminj sanjij iraminj.

Lasarus kamyinj

11 ¹Be, al kura denjem Lasarus goyen garbam buluj po hiriñ. Yenbe Betani tiyunde niñ al. Betani gobe Mariaya babam Martayat tiyuj. ²Maria gobe he fimiñ hamiñ kusamuj gore po Doyañ Al Kurunyen kahanje wogorde tonañ yuwalñen belen po utma tiyyiñ bere go goyen. Be, kuliñ Lasarusbe garbam iryiñ. ³Ningeb ire babamya goreb Yesu niñ keya heñbe, “Doyañ Al Kurun, kadge amanen wor po nurde unen hayen al gobe garbam hihi,” yaryum. ⁴Irkeb Yesu gobe mere go nurdeb, “Garbam goreb Lasarus mayke kamyen. Goyenbe hugiñen ma kamyen. Al Kurun denjem turñuj yañ ird ird niñ garbam go forok yiyuj. Irde ne Al Urmiñ gayen al belen Lasarus hitte mata forok ireñ goyen kenenbe denne turñuj yañ irnayiñ,” yiriñ. ⁵Yesube Martaya hayminya kuliñ Lasarusya niñ amanen wor po nurde yunen hinhin. ⁶Goyenbe Lasarus garbam hiriñ mere momonbe nuryiñ gega, hinhinde gor po sopte wawuj irawa firyiñ.

⁷Irde gab komatmiñ yago goyen, “Mulgañ heñ Yudia nanare kuniñ,” yinyiñ. ⁸Irkeb komatmiñ belen inamiñ. “Goyenbe Rabai, gorbe Yuda mar belen horare soñ mugunañ go. Gega sopte mulgañ heñ gor kwenj tej ha?” inamiñ. ⁹Gwaha inkeb yenj kamtek nalube hako geb, go ma mununnayiñ yinenbe maya mere mat gaha yinyiñ: “Wampot mat wawujbana naja kurkuyen go kahal banabe awa 12 hanjen. Ningeb naja temeyde hikeyabe albe igiñ dawet kenkela yennayiñ geb, al kura belenyañ kuñ heñya epte ma kukuhuk uryen. ¹⁰Goyenbe wawujbe kidoma geb, belen kuñ heñbe takten mayyen,” yinyiñ.

¹¹Be, gwaha yinenbe sopte po, “Kadniniñ Lasarusbe ferde hi ningeb, ne belen kuñbe isañ hewenj tihim,” yinyiñ. ¹²Irkeb komatmiñ belen wol heñbe, “Doyañ Al Kurun, yenbe duliñ ferde hi gob igiñ hiyyen,” inamiñ. ¹³Goyenbe Yesube Lasarus goyen kamyiñ goke yinyiñ. Gega komatmiñbe fudinde ferd ferd niñ diniñ hi yenj nuramiñ. ¹⁴Be, mel gore gwahade nuramiñ geb, Yesu belen kawan po yinyiñ. “Lasarusbe kamuñ. ¹⁵Goyenbe ne belen yenj hitte mata kura forok irmeke kenenbe ne niñ dufaytiñ tareñ irnayiñ yenbe gogo Lasarus hitte arañen ma kumiñ goke amanen nurhem. Goyenbe han̄kabe wake yenj hitte kuniñ,” yinyiñ. ¹⁶Irkeb komatmiñ kura Tomas, denjem kurabe Didimus gore diñuj hoyañ yinyiñ. “Neñ manañ tumñañ kuniñ. Gogab yenya tumñañ kamtek geb,” yinyiñ.

¹⁷Be, Yesu go Betani forok yiriñ. Irdeb, “Lasarusbe bikken gote yeren horabok mete bana mete tiyañ,” yeke nuryiñ. ¹⁸Betani mat Yerusalemba 3 kilomita gwahade po, gisaw wor po mon. ¹⁹Ningeb Yuda mar budam belen ire babamya gote kuliñ kamyiñ goke kuñ biñ yurum yirniñ yen wayamiñ.

²⁰Be, Marta go Yesu waŋ hinhin mere momoŋ go nurdeb kuŋ belen tupi tiye yeŋ kuriŋ. Goyenbe Mariabe yare hinhin. ²¹Be, Marta belen kuŋ Yesu kenenbe, “Doyaŋ Al Kurun, ge gar hinhin manhan kolnebe go ma kamwoŋ. ²²Goyenbe haŋka gayen wor det kuraŋ Al Kurun gusuŋaŋ irkeb gunyeŋ yeŋ nurde hime,” inyiŋ. ²³Irkeb Yesu belen, “Kolgebe sopte huwaryeŋ,” inyiŋ. ²⁴Irkeb Marta belen wol heŋbe, “Nalu funaŋde al kamtiŋ huward huward nalurebe yeŋ manaŋ sopte huwaryeŋ gob nurde hime,” inyiŋ. ²⁵Irkeb, “Al kamtiŋde mat huwarnayiŋ, irde Al Kurunya hugiŋeŋ hinayiŋ gote miŋ albe ne gago. Niŋgebe al kura ne niŋ dufaymiŋ tareŋ irtiŋ kamyen gobe sopte huwaryeŋ. ²⁶Irde al dufaymiŋ ne niŋ saŋiŋ irde Al Kurunya hugiŋeŋ hinayiŋ marbe Al Kurun diliŋde al kamtiŋ ma hinayiŋ. Ga ginhem gayen fudiŋde yeŋ nurde ha?” inyiŋ. ²⁷Gwaha inkeb Marta belen, “Gwaha, Doyaŋ Al Kurun, gebe fudiŋde wor po Mesaia, Al Kurun Urmiŋ megen gar wayyeŋ yitiŋ al go goyen yeŋ nurde hime,” inyiŋ. ²⁸Gwaha inenbe mulgaŋ heŋ kuŋ haymiŋ Maria muŋ po hoy irdeb, “Tisabe waya. Irde ge niŋ gusuŋaŋ heŋ hi,” inyiŋ. ²⁹Irkeb Maria gob araŋ po huwarde Yesu hitte kuriŋ.

³⁰Be, Yesu gobe tiyuŋde ma forok yiriŋ. Martaya mere tiyaryumde gor po hinhin. ³¹Be, Yuda mar yare gor heŋ Maria biŋ yurum irde hinhin mar goyen Maria belen bemel po huwarde kat kuke kenenbe bembare kuŋ eseŋ wet kuŋ hi yeŋbe gama irde kwamiŋ. ³²Be, Maria gobe kuŋ Yesu hinhinde gor forok yeŋ kenenbe kahaŋ miŋde kateŋ dokolhoŋ yuguluŋ teŋbe, “Doyaŋ Al Kurun, ge gar hinhin manhan gob kolnebe go ma kamwoŋ,” inyiŋ. ³³Be, Mariaya Yuda mar yeŋ gama irde wayamiŋ morya goyen tumŋaŋ eseŋ hike Yesu belen yeneŋbe Yesu wor biŋde mat mel goke buniŋeŋ wor po nurde biŋ kanduk hiriŋ. ³⁴Irdeb, “Dare mete tiyaŋ?” yineŋ gusuŋaŋ yiriŋ. Irkeb mel gore wol heŋbe, “Doyaŋ Al Kurun, wake kuniŋ. Irde ga kena,” inamiŋ. ³⁵Be, Yesu go diliŋ fimiŋ katiŋ. ³⁶Irkeb Yuda mar goreb, “Go kennaŋ, Lasarus niŋ amaŋeŋ wor po nurde hiyeŋ geb gogo esa,” yamiŋ. ³⁷Goyenbe al kura belen, “Yeŋbe al diliŋ titmiŋ sope irke naŋkiniŋ. Gega Lasarusbe daniŋ ma sope irke gogo kamuŋ?” yamiŋ.

Lasarus kamtiŋde mat isaŋ hiriŋ

³⁸Be, Yesu go sopte po buniŋeŋ wor po nurdeb bembare kuriŋ. Bempa gobe horabok, irdeb hora kurun kura kaŋ kaŋ irde yamem goyen tatiŋ hinhin. ³⁹Be, Yesu belen, “Hora ga teŋ siŋa irnaŋ,” yinyiŋ. Irkeb al kamtiŋ gote babam Marta belen, “Goyenbe, Doyaŋ Al Kurun, kolne hakwambe bempa bana hike wawuŋ sipte hihi geb hamiŋ buluŋ hihi,” inyiŋ. ⁴⁰Gwaha inkeb, “Dufayge ne niŋ tareŋ irayiŋbe Al Kurunya tareŋ turuŋ yaŋ goyen kenayiŋ ma ginhem?” inyiŋ. ⁴¹Irkeb mel goreb hora kurun goyen teŋ siŋa iramiŋ. Irkeb Yesu belen kotaŋ kaŋbe, “Ado,

merene nurha goke igij wor po nurd gunhem. ⁴²Nebe merene hugijen nurde hayen goyen nurde himyen. Goyenbe al gar harde haŋ gake tenbe gago ginen hime. Gogab nebe ge beleŋ nad nerke wamirij goyen fudinde yeŋ nurnayij,” yirij. ⁴³Gwaha yeŋbe Yesu go uguŋ po, “Lasarus, siŋare kata,” inyij. ⁴⁴Irkeb al kamtij gobe hanijya kahanya amil beleŋ po bili irde kimij mala titij goyen siŋare katij. Irkeb Yesu beleŋ, “Bembare nij amil go hol irde unenbe tubul tike kwi,” yinyij.

Yesu mayke kami yeŋ mere sege iraminj

⁴⁵Be, Yuda mar budam Maria kinnij yeŋ wayaminj mar goyen Yesu mata tiyyij goyen kenenbe yeŋ ge dufayminj saŋij iraminj. ⁴⁶Goyenbe kuraminbe Farisi mar hitte kuŋbe Yesu mata tiyyij goyen momoŋ yiraminj. ⁴⁷Irkeb Al Kurun doloŋ ird ird mata doyaŋ mar pris buda gote karkuwaŋminjya Farisi marya beleŋ mere sege irnij yeŋ Yuda marte doyaŋ mar hoy yiraminj. Hoy yirke wakeb, “Be, nenbe daha titek? Al gabe mata tinj turuŋ yaŋ wor po forok yirde hi. ⁴⁸Al gayen tubul titeke gwahade po ten hijen gobe al tumŋaŋ yeŋ ge dufayminj saŋij irnij tahaŋ. Irkeb Roma gabman beleŋ waŋbe nende Al Kurunyen ya balemya alya bereya tumŋaŋ gwamuŋ yurnayij geb,” yaminj. ⁴⁹⁻⁵⁰Irkeb pris buda gote karkuwaŋminj bana goŋ kura denembe Kaiafas goreb tareŋ po, “Denbe det kura ma wor po nurde haŋ. Nananinijya nen almemya tumŋaŋ buluŋ hetek gobe igij moŋ. Niŋgeb al unkuŋen gare po kamyen gab kanduk kurun goyen kentek moŋ,” yinyij. Kaiafas gobe Yesu hinhin goyenter pris marte kurunminj heŋ meten ten hijen al.

⁵¹Be, Kaiafas gore mere tiyyij gobe mali dufayminde ma mere tiyyij. Yeŋbe dama goyenter pris buda gote kurunminj heŋ meten ten hinhin geb, Yesu goyen Yuda mar nij ten kamyen yeŋbe gogo mata kame forok yetek goke tagalyij. ⁵²Irde Yuda mar muŋ po moŋ, Al Kurunyen dirŋen weŋ hoyande hoyande haŋ wor yawaŋ tumŋaŋ gabu yirde unkuŋen po iryen goke ten kamyen goyen wor tagalyij. ⁵³Niŋgeb gor matbe mel gobe Yesu daha mat kura mayteke kamyen yeŋ beleŋ nij naŋkenen hinhan.

⁵⁴Niŋgeb Yesube goke tenbe Yuda mar dilinjan ma kuŋ hinhin. Gwaha titenbe yubul ten sawsawa naŋa bindere tiyuŋ kura Efraim inen hanjende komatminjya kuŋbe gor hinhan.

⁵⁵Be, Yuda marte gabu nalu kurun kura Pasoba goyen binde binde heŋ hinhin. Irkeb al budam Pasoba nalu ma forok yekeya ulij wuk yird yird mata titek yeŋbe Yerusalem hurkuŋ hinhan. ⁵⁶Irkeb Yuda marte doyaŋ marbe Yesu nij hugijen naŋkenen hinhan. Irdeb yingen ulij kadom gusuŋaŋ gird tenbe, “Dahade nurde haŋ? Pasoba gabu nalure gayen ma po wayyen yeŋ nurde haŋ?” yaminj. ⁵⁷Goyenbe pris buda gote karkuwaŋminjya Farisi marya beleŋbe al momoŋ yiraminj. “Al kura Yesu goyen gor hi yeŋ nurdeb waŋ momoŋ dirkeb kuŋ ten fere titek,” yinaminj.

Maria beleŋ he fimiŋ hamiŋ kusamuŋ goyen Yesu kahaŋde wogoryiŋ
(*Mat 26:6-13; Mak 14:3-9*)

12 ¹Be, Pasoba nalu goyen nalu 6 po heŋ gab forok yetek hekeb Yesu go Lasarusyen tiyuŋ Betani kuŋ forok yiriŋ. Lasarusbe kamtiŋde mat Yesu beleŋ isan hiriŋ al go goyen. ²Be, gorbe Yesu niŋ teŋ biŋge kaŋbe Marta beleŋ biŋge go gale heŋ hinhin. Goya goyenbe Lasarusbe biŋge niniŋ yeŋ gor gabu iramiŋ mar goyen biŋge nen nen gasuŋde keperde hinhin. ³Be, mel go gwaha teŋ hikeyabe Maria beleŋ nat he fimiŋ hamiŋ kusamuŋ wor po, irde damumbe hende wor po goyen tawaŋbe tumŋaŋ po Yesu kahaŋde wogordeb tonan yuwalŋeŋ beleŋ po utma tiyyiŋ. Irkeb he fimiŋ wok iryiŋ gote hamiŋ igiŋ muŋ gore po ya go ep iryiŋ.

⁴Goyenbe Yesuyen komatmiŋ kura Yudas Iskariot beleŋ Maria mata tiyyiŋ goke igiŋ ma nuryiŋ. Al gobe kame Yesu goyen asogo haniŋde kiryiŋ al go goyen. ⁵Be, al goreb, “Nat he fimiŋ gabe al kura dama uŋkureŋ meten teŋ hora tiyyen go goya tuŋande. Niŋgeb det fimiŋ ga damu tikeb gote muruŋgem teŋ al buniŋeŋ yuntewoŋ,” yiriŋ. ⁶Goyenbe Yudasbe al buniŋeŋ goke wor po ma nurde hinhin. Yeŋbe kawe al geb, gogo gwaha mat mere tiyyiŋ. Yeŋbe Yesuya komatmiŋya gote hora doyan irde hiyen al gega, haŋkayeŋ haŋkayeŋ hora go kawemde nene hiyen. ⁷Be, Yudas go gwaha yekeb Yesu beleŋ wol heŋbe, “Tubul tinaŋ. Yeŋ beleŋ haŋka det fimiŋ hamiŋ igiŋ muŋ go teŋ gwaha nira gobe kame mete nird nird ge sam nirnayiŋ goke gitik teŋ teŋ ge gwaha nira. ⁸Al buniŋeŋbe denya hugiŋeŋ hinayiŋ. Goyenpoga nebe denya hugiŋeŋ ma hitek geb,” yinyiŋ.

⁹Be, goya goyenbe Yuda mar buda kurun beleŋ Yesu go ya goyenter hi yeŋ nurdeb wayamiŋ. Goyenbe Yesu yeŋ ge po moŋ, Lasarus kamtiŋde mat huwariŋ goyen manan kinniŋ yeŋ wayamiŋ. ¹⁰⁻¹¹Yuda mar budam Lasarus go keneŋbe Yesu hitte kuŋ dufaymiŋ yeŋ ge tareŋ irde hinhan. Niŋgeb pris buda gote karkuwaŋmiŋ beleŋ Lasarus manan mayteke kami yeŋ mere sege iramiŋ.

Mesaia Yerusalem kuriŋ
(*Mat 21:1-11; Mak 11:1-11; Luk 19:28-40*)

¹²Be, ferd fay urkeb al buda kurun Pasoba gabu nalu kurun goke Yerusalem wayamiŋ mar gore Yesube Yerusalem kuŋ hinhin goyen mere momoŋmiŋ nuramiŋ. ¹³Irdeb patila yuwalŋeŋ yufuŋ teŋ yad kuŋbe tupi teŋ waniŋ yeŋbe kuware gaha yamiŋ:

“Al Kurun turuŋ irniŋ ko!

Doyan Al Kurunyen denjemde waŋ hi al gobe Al Kurun beleŋ guram irde saŋiŋ iryeŋ!

Israel marte Doyan Al Kurunbe Al Kurun beleŋ guram iryen!”

yamiŋ.

Tikiŋ 118:25-26

¹⁴Be, Yesu go Al Kurunyen asanđe katiŋ gwahade po, doŋki foŋeŋ kura keneŋbe go hende kipiryiŋ. Mata tiyyiŋ goke teŋ asanđe katiŋbe gahade:

¹⁵“Deŋ Saion taunde niŋ mar, kafura ma henayiŋ.

Doyan Al Kurunŋiŋ kurun doŋki foŋeŋ hende waŋ hi go kennanŋ,”

yitiŋ hi.

Sekaraia 9:9

¹⁶Goyenbe haŋkapyabe mata goyen goke komatmiŋ yagobe bebak ma tiyamiŋ. Goyenbe kame Yesu go Al Kurun hitte mulgaŋ heŋ hurkun deŋe turunŋ yaŋ tiriŋ kamere gab Yesu mata tiyyiŋ goke Al Kurunyen asanđe katiŋ hi goyen bebak tiyamiŋ. Irde al buda kurun gore yeŋ ge mata tiyamiŋ go wor gwahade po katiŋ hi goyen go bebak tiyamiŋ.

¹⁷Be, al buda Yesuya hikeya Lasarus kamiŋ goyen yeŋ beleŋ yeke horabok metere mat huwariŋ go kenamiŋ mar gore gote mere momoŋ tagalde tukamiŋ. ¹⁸Irkeb al budam wor po mata tiŋeŋ turunŋ yaŋ forok iryiŋ goyen nuramiŋ geb, kun tupi tiniŋ yeŋ kwamiŋ. ¹⁹Niŋgeb go yeneŋbe Farisi mar go yiŋgeŋ uliŋ mere teŋbe, “Ga kennanŋ! Al buda kurun gabe dubul teŋ yeŋ po gama irde pasi hiniŋ tahaŋ geb!” yamiŋ.

Yesube kamiyeŋ goke tagalyiŋ

²⁰Be, Pasoba gabu nalure Al Kurun doloŋ irniŋ yeŋ Yerusalem hurkamiŋ mar bana goŋbe Grik mar manan hinhan. ²¹Mel gore Galili nana bana niŋ taun kura Betsaida niŋ al Filip hitte wayamiŋ. Waŋbe, “Neŋbe Yesu kinniŋ wor po yeŋ nurde hite,” inamiŋ. ²²Irkeb Filip beleŋ Andru hitte kun momoŋ iryiŋ. Irkeb Andruya Filipya tumŋande kun Yesu momoŋ iraryum. ²³Irkeb Yesu beleŋ wol heŋbe, “Ne Al Urmiŋ gayen deŋe turunŋ yaŋ tetek nalube gago forok yihi. ²⁴Fudinde wor po diniŋ hime, wit bilmiŋbe megeŋ bana kurkun gabe kawaŋ heŋ igineŋ paya hiyyeŋ. Munan gwaha ma tiyyeŋbe paya ma hiyyeŋ. ²⁵Al kura yiŋgeŋ ge po nurde hi al gobe Al Kurunya ma hiriryen. Munan al kura megen gar heŋya yiŋgeŋ ge ma nurde Al Kurun niŋ po nurde hi al gobe yeŋya hugineŋ hiriryen. ²⁶Al kura ne niŋ meteŋ teŋ hime yeŋ nurde hi albe merene po gama irde hiyeŋ. Irdeb ne heŋde gorbe meteŋ alne wor gor hiyeŋ. Adonebe ne niŋ meteŋ teŋ hiyeŋ al goyen turun iryen.

²⁷“Be, bener kandukŋeŋ wor po nurhem geb, daha yeweŋ? ‘Ado, ulner kanduk forok yeweŋ tiya go faraŋ nurke ma keneŋ,’ ineŋ? Moŋ, nebe kanduk goyen go po teweŋ yeŋ wamiŋ geb. ²⁸Ado, deŋgebe turunŋ yaŋ hewoŋ yeŋ nurde hime,” yiriŋ. Irkeb nanŋinde mat al melak kura, “Deŋnebe bikkeŋ turunŋ yaŋ irmiŋ, irde sopte gwaha ireŋ,” gwahade forok yiriŋ. ²⁹Irkeb al buda gor hinhan go mere goyen nurdeb, “Daga mere tiya,” yamiŋ. Munan kurabe, “Al Kurunyen miyoŋ beleŋ mere ira,” yamiŋ. ³⁰Irkeb Yesu beleŋ, “Mere forok yihi gabe deŋ ge teŋ forok yihi.

Ne niŋ moŋ geb. ³¹Be, Al Kurun beŋ megen niŋ alya bereya merem yaŋ yirtek nalube haŋka gago. Irdeb megen gar niŋ doyaŋ al Satanbe takira timeke tareŋ miŋmoŋ heweŋ tiya. ³²Goyenbe ne kuruse hende nade nisaŋ heke gab alya bereya megen haŋ kurun gayen nigeŋ hitte yawayeŋ,” yinyiŋ. ³³Gwaha yinyiŋ gobe kame mata dahade mat kamyen goyen yikala yire yeŋbe gogo yinyiŋ. ³⁴Irkeb al buda gore, “Neŋbe Moseyen sabarebe Mesaia be hugineŋ hiyeŋ yeke nurde hityen. Goyenbe dahade niŋgeb, ‘Al Urmiŋbe he hende kamyen,’ yeŋ ha? Al Urmiŋ gobe ganuŋ?” yeŋ hitem po gusuŋaŋ iramiŋ. ³⁵Irkeb Yesube mel goya sobamde ma hiyeŋ goke maya mere mat wol heŋbe, “Hulsibe deŋya ulyaŋde ma hiyeŋ. Niŋgeb huls ihiya gayenter po kuŋ hinayiŋ. Heŋ ga moŋ kidoma aw dureŋ tiya geb. Al kura kidoma bana kuŋ hiyeŋ al gobe gor kuŋ hime yeŋ ma po nurdeya kuŋ hiyeŋ. ³⁶Hulsi goyen deŋya hikeyabe yeŋ ge dufaytiŋ tareŋ irnayiŋ. Gogab deŋbe huls i bana heŋ mata igiŋ teŋ teŋ mar henayiŋ,” yinyiŋ. Be, Yesu go meremiŋ pasi irdeb al buda go yubul teŋ kuŋbe nennak yeŋ bana kuriŋ.

Yuda marbe Yesu pel irtek po hamiŋ

³⁷Be, Yesube mata tiŋeŋ turuŋ yaŋ goyen Yuda mar diliŋyaŋ wor po forok yirde hinhiŋ gega, yeŋ ge dufaymiŋ saŋiŋ ma irde hinhan. ³⁸Go teŋ hinhan gobe Al Kurunyen mere basaŋ al Aisaia beŋ kame gwahade forok yiyyeŋ yeŋ kayyiŋ goyen po forok yeŋ hinhan. Merebe gahade:

“Doyaŋ Al Kurun, mere tagaltekeb ganuŋ beŋ fudinde yeŋ nurde haŋ? Hubu wor po!

Irdeb ganuŋ mar hitte Doyaŋ Al Kurun beŋ tareŋmiŋ goyen yikala yiryen? Hubu wor po!” yitiŋ. *Aisaia 53:1*

³⁹Niŋgeb Aisaia beŋ yitiŋ gwahade goyen po, mel gobe dufaymiŋ yeŋ ge tareŋ ma po iramiŋ. Mel gote matamiŋ goke Aisaia beŋ mere hoyan kura gahade kayyiŋ:

⁴⁰“Yeŋ beŋ mel gote diliŋbe titmiŋ yiryiŋ. Irde biŋbe pet tiyyiŋ.

Niŋgeb diliŋ gore epte ma naŋkennayiŋ.

Irde biŋ go gereŋ ma yeke epte ma bebak tinayiŋ.

Irde ne hitte mulgaŋ ma henayiŋ.

Moŋ manhan ne hitte mulgaŋ heke sope yirmewoŋ,” yitiŋ. *Aisaia 6:10*

⁴¹Aisaia be Al Kurun beŋ Yesu deŋem turuŋ yaŋ irtiŋ goyen bikkeŋ keneŋbe yeŋ ge gogo tagalyiŋ.

⁴²Be, al budam Yesu gwaha mat pel iramiŋ gega, doyaŋ mar budambe yeŋ ge dufaymiŋ saŋiŋ iramiŋ. Goyenbe Farisi mar beŋ nurdeb dakira tike gabu yamiŋde epte ma kutek yeŋ kafura hamiŋ. Goke teŋbe Yesu niŋ dufaymiŋ tareŋ iramiŋ goyen kawan ma tagalamiŋ. ⁴³Mel gobe al beŋ turuŋ yird yird niŋ po amaŋeŋ nurde haŋyen. Irde Al Kurun beŋ turuŋ yird yird niŋ ma nurde haŋyen geb, gogo kawan ma tagalamiŋ.

⁴⁴Be, Yesu belen kuware gahade tagalyin: “Al kura ne nin dufaymin sanin iryenbe ne nin po ma dufaymin tarej iryen. Nad nerke wamirin al goke manan dufaymin sanin iryen. ⁴⁵Irde al kura ne ninyen al gobe ne po ma ninyen. Nad nerke wamirin al goyen wor kinyen. ⁴⁶Nebe hushi melak hen hi go gwahade goyen melak hewe yen megen gar wamirin. Gogab al kura ne nin dufaymin tarej iryen gobe kidomare ma hiyen.

⁴⁷“Al kura merene nurde ga binde ma kerde hiyen al gobe ne belen merem yan ma iren. Nebe megen nin alya bereya gayen merem yan yire yen ma wamirin. Al Kurun hitte yumulgan tiye yen wamirin. ⁴⁸Gega ne harhok nunen merene ma nurde han mar goyen merem yan yiryen albe hi. Ningeb nalu funandebe mere tagalde himyen gore wor po merem yan yiryen. ⁴⁹Gwaha, nebe nigen dufayner ma mere ten hime. Adone nad nerke wamirin al goreb mere gwahade tiyayin, irde gwaha mat yawayin goyen ninen hiyen. ⁵⁰Yen belen ninen hiyen mere gobe al belen gama irdeb yenna huginen hinayin yen nurde hime. Ningeb mere ten himyen kurun gabe Nanne belen gwaha yawayin ninen hiyen go mun po yen himyen gogo,” yinyin.

Yesu belen komatmin yagot kahan halde yunyin

13 ¹Be, gabu nalu kurun Pasoba go gise gwahade hiri. Irkeb Yesu go megen ga tubul ten Nanin hitte kun kun nalumin forok yihi yen nuryin. Yenbe alya bereyamin megen han mar goyen bubulkune wor po yen nurde yunenbe igin yen ge ten kame yen nurde hinhin geb, dufaymin goyen yikala yiriyin.

²Be, wawunbanare nin bingge nene hinhan. Irkeb Ungurabe Saimon Iskariot urmin Yudas belen Yesu asogo haniinde kiryen yen bikken bin tirin. ³Yesube det kurun gayen doyan yird yird tarej Nanin belen untin goyen nurde hinhin. Irde yenbe Al Kurun hitte mat watin, irde sopte yen hitte mulgan hiyyen goyen wor nurde hinhin. ⁴Ningeb bingge nen hinhande mat huwardeb ulinhormin hende nin goyen tugu tenbe ulin utma ten tende nin amil ten mal temdere giti iryin. ⁵Gwaha ten gab koronde fe wogordeb komatmin yagot kahan halde yunyin. Irdeb amil gore po fe goyen utma ten yunyin.

⁶Be, gwaha ten kun kunge Saimon Pita hitte hiri. Irkeb, “Doyan Al Kurun, ge gayenbe kahanne halen ten ha?” inyin. ⁷Irkeb wol henbe, “Mata tihim gote min bebak ma taha. Goyenbe kamebe bebak tiyayin,” inyin. ⁸Irkeb Pita belen, “Mon, kahanne epte ma halayin geb,” inyin.

Irkeb Yesu belen wol henbe, “Kahange ma halenbe epte ma metenje kurun gote iginen tawayin,” inyin. ⁹Gwaha inkeb Pita go, “Doyan Al Kurun, gwahade kenem kahanne po ma halayin. Hanneya tonañneya manan tumnan halde nunayin,” inyin. ¹⁰Irkeb wol henbe, “Al fe gimtin gobe ulinde tiki minmon geb, kahan po haltek hi. Gwahade goyen po

deŋbe bikkeŋ Al Kurun dilingde wukkeŋ haŋ. Goyenbe deŋ tumŋaŋ moŋ geb,” inyiŋ. ¹¹Al gore asogo haniŋde niryeŋ yeŋ bikkeŋ nurde hinhin geb gogo, “Deŋ tumŋaŋbe wukkeŋ haŋ gega, al unŋkureŋ po gabe gwahade ma hi,” yinyiŋ.

¹²Be, komatmiŋ yagot kahaŋ halde pasi irdeb uliŋhormiŋ hende niŋ tugu titiŋ goyen sopte teŋ hor irdeb mulgaŋ heŋ gasuŋmiŋde kuŋ kipiŋyiŋ. Irdeb, “Deŋ ge teŋ mata tihim gate miŋ bebak tahaŋ?” yeŋ gusuŋaŋ yiryiŋ. ¹³Irdeb gaha yinyiŋ: “Deŋ beleŋ Tisa nineŋ haŋyeŋ, munaŋ kurarebe Doyaŋ Al Kurun nineŋ haŋyeŋ. Nebe al gwahade geb, deŋ beleŋ gwaha nineŋ haŋ gob fudinde. ¹⁴Niŋgeb gayenterbe Tisaya Doyaŋ Al Kurunya nineŋ haŋyeŋ gare kahaŋtiŋ halde dunhem geb, deŋ wor kadom kahaŋ halde guneŋ teŋ hinayiŋ. ¹⁵Nebe mata gwaha teŋ hinayiŋ yeŋbe gago dikala dirhem. Niŋgeb deŋ wor dindikeŋbe kadtiŋyeŋ meteŋ al yeŋ nurde kadom faraŋ gurd teŋ hinayiŋ. ¹⁶Fudinde wor po diŋeŋ hime, meteŋ al kura doyaŋ almiŋ folek ma haŋ, irde mere basaŋ al gobe hulyaŋ iryeŋ al go folek ma haŋ. ¹⁷Deŋbe saba gayen bebak tahaŋ. Niŋgeb saba gayen gama irde mata teŋ hinayiŋbe Al Kurun beleŋ guram dirde igiŋ igiŋ diriŋeŋ,” yinyiŋ.

¹⁸Be, Yesu go sopte gaha yinyiŋ: “Nebe deŋ tumŋaŋ goke ma yeŋ hime. Neb basaŋ yirmiriŋ mar gobe nurde yuneŋ hime. Goyenbe mere Al Kurunyaŋ asaŋde katiŋ hi gobe forok po yiyyeŋ. Merebe gahade: ‘Al kura neya tumŋaŋ biŋge nereŋ al gore tigiri teŋ asogo niryeŋ,’ yitiŋ hi. ¹⁹Mata goyen forok ma yeŋ hikeya go wa gago diŋeŋ hime. Gogab mata go forok yekeb nebe Mesaia yeŋ dufaytiŋ saŋiŋ irnayeŋ. ²⁰Fudinde wor po diŋeŋ hime, al kura ne beleŋ al yad yermeke kunayiŋ mar gote saba fudinde yeŋ nurnayiŋbe merene nurde haŋ yeŋ nurd yuneŋ. Irdeb al kura merene fudinde yeŋ nurnayiŋbe nad nerke wamiŋiŋ al gote mere nurde haŋ yeŋ nurd yuneŋ,” yinyiŋ.

²¹Be, gwaha yineŋ pasi heŋbe biŋde kandukŋeŋ wor po nurdeb kawan po, “Fudinde wor po diŋeŋ hime, kuratiŋ kura beleŋ pel nirde asogo haniŋde nereŋ tiya,” yinyiŋ. ²²Irkeb komatmiŋ beleŋ kukuwamŋeŋ nurdeb ganuŋ niŋ kura yihi yeŋ yingeŋ uliŋ kadom geneŋ tiyamiŋ. ²³Be, komatmiŋ kura Yesu beleŋ bubulkunne wor po yeŋ nurd uneŋ hiyeŋ al gobe Yesu bindere gegelhek mat bulgaŋ yitiŋ hinhin. ²⁴Irkeb Saimon Pita beleŋ al go haniŋ beleŋ po tuŋaŋ irdeb, “Ganuŋ niŋ yeŋ ha yeŋ gusuŋaŋ ira,” inyiŋ. ²⁵Irkeb al gore Yesu hinhin beleŋ ge tawuŋ heŋbe, “Doyaŋ Al Kurun, ganuŋ niŋ yeŋ ha?” inyiŋ. ²⁶Irkeb Yesu beleŋ wol heŋbe, “Al gobe beret parwek gayen koroŋ bana fe uliŋ irde ga uneŋ al goyen,” inyiŋ. Irdeb beret parwek go teŋ koroŋ bana fe uliŋ irde Saimon Iskariot urmiŋ Yudas unyiŋ. ²⁷Be, Yudas go beret go tekeb goyare po Satan beleŋ ketal uryiŋ. Irkeb Yesu beleŋ, “Mata kura tiyeŋ teŋ ha gobe araŋeŋ po tiyayiŋ,” inyiŋ. ²⁸Goyenbe yeŋya gor biŋge nene hinhan mar goreb miŋ daniŋ

Yesu belen Yudas gwaha ina yen bebak ma tiyamin. ²⁹Yudasbe mel gote hora doyan irde hinhin al geb, al kurabe Yesu belen Pasoba binje damu ten ten goke inen hi yen nuramin. Kurabe hora ten al buningen yunen yunen nin inen hi yen nuramin. ³⁰Be, Yudas go beret tenbe goyare po kat sinjare kurin. Gobe wawunje tiyyin.

Yesu belen saba tarej gergen goyen komatmin yunin

³¹Be, Yudas go kukeb Yesu belen, “Be, hanjabe ne Al Urmin gayen denge turun yan goyen tetek hihim. Irde ne belen mata tiyen goreb Al Kurun denge turun yan tiyyen. ³²Ningeb Al Kurun belen ne hitte mat denge turun yan tiyyenbe yen belen wor yingen hitte mat denge turun iryen. Irdeb aran po iryen. ³³Dirinne yago, nebe denja sobamde ma hitek geb. Denbe ne nin nanjennayin gega, Yuda mar yinmin gwahade goyen po, ne kwenje gorbe den epte ma kunayin dinen hime gago. ³⁴Nebe saba gergen kura gago diren tihim: kadtin ge amanen nurd gunen ten hinayin. Ne belen den ge amanen nurde himyen gwahade goyen po, den wor ditin ge kadom amanen nurd gunen ten hinayin. ³⁵Gwahade kadtinya kadom amanen nurd gunen ten hinayinbe al hoyan kurun gore denenbe nere komatne yen nurde dunen hinayin geb,” yinyin.

³⁶Gwaha yinkeb Pita belen, “Doyan Al Kurun, gebe dare kwayin?” inen gusunjan iryin. Irkeb Yesu belen wol henbe, “Hanka wor pobe kwenje gor epte ma kwayin. Gega kamebe igin kwayin,” inyin. ³⁷Irkeb Pita belen, “Doyan Al Kurun, dahade ningeb hanka gayen epte ma gama giren? Nebe ge nin ten igin kamen,” inyin. ³⁸Irkeb wol henbe, “Ge gayen fudinde wor po ne nin ten igin kamayin? Fudinde wor po ginhem. Hanka wawun tatirok mere ma tikeya wawun karwore ne nin yen, ‘Al gob ma nurde unen hime,’ yawayin,” inyin.

Yesu belen komatmin sanin yiryn

14 ¹Be, Yesu go sopte po, “Ne dubul ten kwen goke kanduknen ma nurnayin. Al Kurun nin hekken nurde hinayin. Irdeb ne nin wor hekken nurde hinayin. ²Nanner yarebe hen hen gasunbe budam han. Ningeb gor kun gasuntin sope yiren tihim. Gasun go budam mon manhan gwahade ma dinmewon. ³Kun gasuntin sope yirde ep irdeb mulgan hen wan ne henje gor duken. Gogab den manan ne henje gor hinayin. ⁴Denbe ne kwen ten himere gor kun kun belenbe nurde han gogo,” yinyin. ⁵Irkeb Tomas belen, “Doyan Al Kurun, nenbe gor kwen taha yen ma nurde hite. Ningeb belen gob daha mat nurtek?” inyin. ⁶Irkeb wol henbe, “Nebe Al Kurun hitte kun kun belen. Irde nebe mere fudinde gote min al, irde Al Kurunya huginen hen hen gote min al wor po. Ningeb ne minmonbe al kura Adone hitte epte ma kunayin. ⁷Denbe ne gayen kenkela nurde nunen hanjen manhan Adone wor nurd unwon. Goyenbe

gayenter matbe ne gayen nurd nunej hañ geb, Adone wor nurde unej hinayij. Goke tej denbe bikkeñ nurd unej hañ yeñ nurde hime.” yiniyij.

⁸Irkeb Filip beleñ, “Doyañ Al Kuruj, Nanake dikala dira. Dikala dirke keneñbe ep gogo yeñ nurtek,” iniyij. ⁹Irkeb wol heñbe, “Filip, nebe denya ulyañde hityen gega, ma po nurd nunej ha? Al kura ne neneñ hiyen al gobe Nanne manañ keneñ hiyen. Ningeb dahade geb, ‘Ado dikala dira,’ ninenj ha? ¹⁰Nebe Nanneya hirekeb Nannebe neya har gobe fudinde yeñ ma nurde ha? Ne beleñ mere dirde himyen gobe dufayner ma dinen himyen. Meten tej himyen kuruj gobe Adone, ne hitte hi gote meten geb, yeñ beleñ neya heñ metenmin tej hiyen. ¹¹Nebe Nanneya har, irde Nannebe neya har yemeke goke fudinde yeñ nurnayij. Munañ gwaha ma teñbe mata tiñen turuj yañ wor po forok yirmeke yeneñ hanjen goke nurde gab mere tej hime gayen fudinde yeñ nurnayij. ¹²Fudinde wor po dinen hime, al kura ne niñ dufaymin taren iryenbe ne beleñ mata forok yirde himyen goyen yeñ wor forok yirde hiyen. Irde nebe Nanne hitte kweñ geb, al gobe ne beleñ mata tej himyen gote folek wor po tej hiyen. ¹³Irdeb deñner^j det kura niñ gusunañ hekeb ne beleñ wol heñ dunen. Gogab Adonebe Urmin ne gayen hitte mat deñem turuj yañ hiyyen. ¹⁴Deñbe det kura niñ nurdeb ne deñner po gusunañ nirnayij. Irkeb det goke nurnayij goyen dunen.

¹⁵“Be, denbe ne niñ amañen nurnayinbe ne beleñ mata gwaha gwaha tinañ dinen hime goyen gama irde tej hinayij. ¹⁶Ne beleñ Nanne gusunañ irmekeb Farañ Al hoyañ dunen. Irkeb yeñbe denya huginen hinayij. ¹⁷Yeñbe Holi Spirit. Yende merebe fudinde wor po. Gega megen niñ alya bereyabe epte ma kennayij, irde ma nurd unej hañ geb, meremin fudinde yeñ ma nurnayij. Goyenpoga denbe yeñya hinayij, irde yeñbe deñ bana hiyen geb, nurd unej hinayij. ¹⁸Nebe kweñ gega, kagew yara ma dubul tiyen. Deñ hitte sopte mulgañ heñ wayen. ¹⁹Heñ ga moñ megen hañ mar gare ma nennayij. Goyenbe denbe nennayij. Irde nebe kameñ gega, sopte huwarden heñ geb, deñ wor gwahade po hinayij. ²⁰Gwaha tiyen nalu goyen wakeb Nanneya har goyen bebak tinayij. Irde denya hite gwahade po, deñ wor neya hañ goyen bebak tinayij. ²¹Al kura sabane nurde gama irde hi al gobe ne niñ amañen nurde hi. Irde ne niñ amañen nurde hi al gobe Adone beleñ yeñ goyen bubulkunne wor po yeñ nurde unej hi. Irde ne wor yeñ goyen gwahade po nurde unenbe nebe al gwahade yeñ nigenj ikala ireñ,” yiniyij. ²²Irkeb Yudas beleñ, “Goyenbe, Doyañ Al Kuruj, dahade geb neñ hitte po nebe al gwahade yeñ dikala dirdeb megen niñ marbe gigenj ma yikala yirayij?” iniyij. Yudas gobe Yudas Iskariot moñ, al hoyañ po. ²³Be, Yudas gore

^j 14:13 “Deñner” gabe dulin Yesu denge urde gusunañ ird ird niñ ma yeñ hi. Neñbe Yesuyen alya bereya ningeb, yeñya awalikde henya gusunañ heñ heñ niñ yeñ hi.

gwaha inkeb Yesu beleŋ wol heŋbe, “Al kura ne niŋ amanŋ nurde haŋ marbe sabane gama irnayiŋ. Irkeb Nanne beleŋ bubulkuŋne wor po yeŋ nurd yunyeŋ. Irdeb neya Nanneya tumŋaŋ yeŋ hitte kuŋbe yeŋya hitek. ²⁴Munaŋ al kura ne niŋ amanŋ ma nurde haŋ marbe sabane ma gama irnayiŋ. Mere deŋ beleŋ nurde haŋ gabe bener niŋ moŋ, Nanne nad nerke wamiriŋ al gote mere geb.

²⁵“Mere dirde hime kurunŋ gabe tumŋaŋ heŋya gago momoŋ dirde hime. ²⁶Goyenbe kame Faraŋ Al, Holi Spirit goyen Al Kurunŋ beleŋ teŋ kerke kateŋ gasuŋne tiyyeŋ. Irdeb deŋ nurtek mere kurunŋ goyen yeŋ beleŋ gab saba dirde hiyeŋ. Irde ne beleŋ det momoŋ dirde himyen kurunŋ goyen wor bebak dirde hiyeŋ. ²⁷Al biŋ kamke igiŋ heŋ heŋ mata goyen deŋ hitte tubul tihim. Al biŋ kamke heŋ heŋ gobe nigen goyen duneŋ. Nebe megen niŋ mar beleŋ duneŋ hanŋen gwahade ma duneŋ. Niŋgeb kame mata forok yiyyeŋ goke kandukŋeŋ ma nurnayiŋ, irde kafura ma henayiŋ. ²⁸Nebe kweŋ, irdeb sopte mulgaŋ heŋ deŋ hitte wayeŋ yeŋ himeke nuraŋ. Niŋgeb ne niŋ amanŋ nurde haŋ manhan Nanneb ne folek go hitte kweŋ tihim goke amaŋ hewoŋ. ²⁹Haŋka gago mata go forok ma yeŋ hikeya goke dinhem. Gogab mata go forok yeke keneŋbe fudinde yeŋ dufaytiŋ tareŋ irnayiŋ. ³⁰Megen gar niŋ doyaŋ al Satanbe wayeŋ tiya. Niŋgeb sobamde ma heŋ mere direŋ geb. Goyenbe Satanbe saŋiŋmiŋdebe epte ma daha wet kura niryeŋ. ³¹Gega nebe Nanneŋ amanŋ nurde uneŋ hime geb, yeŋ beleŋ gwaha gwaha tiyayiŋ ninyiŋ goyen po tiyeŋ. Gogab al beleŋ ne gayen yeŋbe al gwahade yeŋ bebak tinayiŋ. Be, wake gasuŋ ga tubul teŋ kuniŋ,” yinyiŋ.

Yesube wain he, irde yende alya bereyabe gote haniŋ

15 ¹Be, Yesu go sopte gaha yinyiŋ: “Nebe wain he fudinde wor po. Munaŋ Nannebe wain meteŋ gote miŋ al. ²Yeŋbe wain haniŋ kura ne hitte mat kutiŋ goyen igineŋ ma heŋ hitiŋbe walde yemeyde hiyen. Munaŋ wain haniŋ igineŋ heŋ hitiŋ gobe sopte igineŋ kurunŋ po ferde hiyeŋ yeŋ haniŋ sope yirde hiyen. ³Deŋbe saba dirde himyen goreb bikkeŋ po he haniŋ haraŋ hitiŋ gwahade goyen dirtiŋ haŋ. ⁴Niŋgeb deŋbe neya po hinayiŋ. Irkeb ne gayen deŋya heŋ. He haniŋ kura pigiŋde basaŋ ma hitiŋ hiyeŋbe yiŋgeŋ epte ma igineŋ hiyyeŋ. Gwahade goyen po, neya ma hinayiŋbe, mata igiŋ kura ma forok yirnayiŋ.

⁵“Nebe wain he, irde deŋbe gote haniŋ. Niŋgeb al kura neya hike nebe yeŋya heŋ al gobe gote igineŋ, mata igiŋ igiŋ budam forok yirde hiyeŋ. Munaŋ neya ma heŋ hoyaŋ muŋ po pat yitiŋ hiyeŋbe mata igiŋ kura ma po teŋ hiyeŋ. ⁶Al kura neya ma hi al gobe he haniŋ kura walde temeyke kamtiŋ hiyeŋ go gwahade hi. He haniŋ gwahade gobe yade kakde yemeyke humga kuŋ hanŋen. ⁷Munaŋ deŋ gayen neya hinayiŋ, irde merene manaŋ deŋ bana hiyeŋbe det kura niŋ nurde gusuŋaŋ henayiŋ.

Irdeb det gobe yade hinayin. ⁸Gwaha tenbe mata igin igin kurun forok yirde hikeb gore Nanner denbebe turun yan hen hiyen. Gwaha ten hinayin gabe al hoyan belen nere komat yen denen hinayin.

⁹“Be, Nanne belen ne gayen bubulkuŋne wor po yen nurde nunen hiyen gwahade po, ne wor den gayen bubulkuŋne wor po yen nurde dunen hime. Ningeb den ge amanen nurde dunen hime bana gon hen mata ten hinayin. ¹⁰Nebe Adoner saba gama irde himekeb ne gayen bubulkuŋne wor po yen nurd nunen hiyen bana gon hime. Gwahade goyen po, den belen wor sabane gama irnayinbe den gayen bubulkuŋne wor po yen nurde dunen hen goyen bana hinayin. ¹¹Mere ga momon dirde hime gabe aman dufayne manan hime gwahade goyen po, den wor gotin yan hinayin, irde aman dufaytin goyen kurun wor po hewon yen gago momon dirde hime. ¹²Sabanebe gahade: ne belen den gayen bubulkuŋne wor po yen nurd dunen himyen gwahade goyen po, den wor kadtin yago nin amanen nurd gunen ten hinayin. ¹³Ningeb kadtin ge amanen nurd nurd mata fudinde wor pobe kadtin ge nurde faran yurde kamnayin gogo. ¹⁴Denbe sabane gama irde hinayinbe duwanne yago wor po henayin. ¹⁵Meten albe doyan almin belen meten daha ten hi goyen ma nurde hi. Goyenbe denbe nurde han geb, meten marne ma dinen. Gwaha dintinbe duwanne yago dinen. Nebe Al Kurun belen saba nirtin kurun goyen momon dirde himyen geb, gogo duwanne yago dinen hime. ¹⁶Den belen basina ma niram. Gwaha nirtinbe kun igin huginen hitek mata igin goyen forok yirnayin yen basina dirmirin. Gwaha ten hen yabe ne denner det kurun gusun hekeb, Nanne belen igin ala po dunyen. ¹⁷Ningeb kadtin ge kadom amanen nurd gunen ten hinayin. Sabanebe gago geb,” yinyin.

Megen nin marbe Yesuyen komatmin haram yirde hinayin

¹⁸Be, Yesu go sopte po gaha yinyin: “Megen nin mar belen haram dirkebe, ‘Nen gago po ma dirhan. Doyan alninin wa haram iramin go,’ yen nurde hinayin. ¹⁹Denbe megen nin mar manhan megen nin mar belen awalik igin igin po dirde hiwon. Gega denbe megen nin mar bana mat basina dirmirin geb, denbe megen nin mar mon. Goke tenbe megen nin mar belen den gayen igin ma nurd dunen han gogo. ²⁰Ne belen, ‘Meten albe doyan almin epte ma fole iryen,’ dinmin gobe bitin sir ma yiyyen. Ningeb dinmin gwahade po, mel gore ne bulun bulun nirnayinbe den wor bulun bulun gwahade po dirnayin. Munan mel gore sabane nurde gama irnayinbe dende saba nin wor gwahade po tinayin. ²¹Mel gobe nad nerke wamirin al goyen ma nurde unen han geb, ne nin igin ma nurdeb den manan bulun bulun dirnayin. ²²Ne belen wan saba ma yirmin manhan mata bulun minmon hiwon. Goyenbe ne wan saba yirmin geb, epte ma nenbe mata buluninin minmon yetek han. ²³Al kura

buluŋeŋ wor po nurd uneŋ hi al gobe Adone wor buluŋeŋ wor po nurd uneŋ hi. ²⁴Ne beleŋ mata tiŋeŋ turuŋ yaŋ wor po al kura beleŋ epte ma forok yirtek goyen mel gote diliŋ mar ma forok yirmiŋ manhan mata tiŋeŋ ne beleŋ yirmiŋ go pel iraŋ gote mata buluŋ miŋyaŋ ma hiwoŋ. Goyenbe mel gobe mata tiŋeŋ goyen yenaŋ gega, neya Adoneya tumŋaŋ buluŋeŋ wor po nurd duneŋ haŋ. ²⁵Goyenbe mata gwaha teŋ haŋ gobe yende sabare Mose beleŋ, ‘Mel gobe miŋ miŋmoŋ buluŋ nurd nuneŋ haŋ,’ gwahade kayyiŋ goyen go po teŋ haŋ.

²⁶“Be, Faraŋ durd durd Albe wayyeŋ. Yeŋbe Holi Spirit, meremiŋbe fudinde wor po, irde Adone hitte mat wayyeŋ. Ne beleŋ Al Kuruŋ hitte mat teŋ kermeke waŋbe ne niŋ momoŋ dirde hiyeŋ. ²⁷Irkeb deŋ wor ne niŋ al momoŋ yirde hinayiŋ. Deŋbe meten miŋ urmiriŋde mat po neya hityen geb, deŋ wor gwaha tinayiŋ,” yinyiŋ.

16 ¹Be, Yesu go sopte gaha yinyiŋ: “Mere dirhem kuruŋ gabe dufaytiŋ ne niŋ tareŋ irtiŋ goyen yubul ma tinayiŋ yeŋbe gago dinhem. ²Be, Yuda mar beleŋ yende gabu yare dakira tike epte ma kunayiŋ. Fudinde, al kurabe Al Kuruŋ niŋ keŋkela meten tihit yeŋbe mudunke kamnayiŋ nalu goyen forok yiyyeŋ. ³Go mar gobe neya Nanneya ma nurde duneŋ haŋ geb, mata gogo teŋ hinayiŋ. ⁴Nebe naŋa hakot po momoŋ dirde hime gago. Gogab nalu goyen forok yekeb bikkeŋ hayhay diriŋ go gago forok yeŋ haŋ yeŋ bitiŋ bak yenayiŋ. Haŋkapyabe tumŋaŋ hinhet geb, momoŋ ma dirmiriŋ,” yinyiŋ.

Holi Spirityen meten

⁵Be, Yesu go sopte gaha yinyiŋ: “Haŋkabe nad nerke wamiriŋ al hitte kweŋ tihim. Goyenbe deŋ gayen al kura beleŋ, ‘Dare kweŋ teŋ ha?’ yeŋ gusuŋaŋ ma nirhaŋ. ⁶Mere dirhem garebe bunineŋ dufay beleŋ po dukdawaŋ dira. ⁷Goyenbe fudinde wor po dinen hime, deŋ gayen igiŋ hewoŋ yeŋ nurdeb gago kweŋ tihim. Ne ma kweŋbe Faraŋ Durd Durd Al go deŋ hitte ma wayyeŋ. Gega ne kweŋ gab Faraŋ Durd Durd Al go teŋ kermeke wayyeŋ. ⁸Yeŋ beleŋ waŋbe megen haŋ marbe mata buluŋ miŋyaŋ goyen yikala yirkeb yeneŋ bebak teŋ hinayiŋ. Irde damiŋbe Al Kuruŋ diliŋde mata huwak, irde kame Al Kuruŋ beleŋ merem yaŋ yiryen goke wor momoŋ yirde hiyeŋ. ⁹Mata buluŋmiŋbe ne niŋ dufaymiŋ saŋiŋ ma irde haŋ gogo yeŋ yikala yiryen. ¹⁰Nebe kamen, irde huwareŋ, irdeb Al Kuruŋ hitte hurkumeke al kura ma nennayiŋ. Mata kuruŋ go tiyen gote miŋ goyen Faraŋ Al beleŋ yikala yirkeb Al Kuruŋbe huwak yeŋ bebak tinayiŋ. ¹¹Irde megen niŋ marte doyaŋ al Satanbe bikkeŋ Al Kuruŋ beleŋ merem yaŋ iryiŋ geb, kame megen niŋ alya bereya tumŋaŋ merem yaŋ yiryen goyen yikala yiryen.

¹²“Be, nebe det budam wor po momoŋ dirtek haŋ gega, deŋbe epte ma merene tumŋaŋ bebak tinayiŋ. Niŋgeb tumŋaŋ ma momoŋ direŋ.

¹³ Goyenbe Holi Spirit, mere fudinde po yeŋ hi al gore waŋ gab mata fudinde teŋ teŋ beləŋ kurun go dikala diryeŋ. Yeŋbe yiŋgeŋde dufayde ma mere tiyyeŋ. Al Kurun beləŋ mere momoŋ irke go po momoŋ diryeŋ. Irde mata kame forok yetek goyen manaŋ momoŋ diryeŋ. ¹⁴ Merenebe yeŋ beləŋ gab basaŋ heŋ momoŋ dirde hiyeŋ. Gwaha matbe deŋne turun yeŋ irde hiyeŋ. ¹⁵ Al Kurunyeŋ dawet kurun gobe tumnaŋ nigen ala. Gwahade geb Holi Spirit beləŋ detne kurun goyen dikala dirde hiyeŋ yihim gogo,” yinyiŋ.

Yesu niŋ biŋ misiŋ nurnayiŋ gega, kamebe amaŋ henayiŋ

¹⁶ Be, Yesube sopte po yiriŋ. “Muŋ kura heŋbe ma nennayiŋ gega, gor mat hitneŋ teŋbe sopte nennayiŋ,” yinyiŋ. ¹⁷ Irkeb komatmiŋ yago kura beləŋ, “Daha yihim yeŋbe, ‘Muŋ kura heŋbe ma nennayiŋ gega, gor mat hitneŋ teŋbe sopte nennayiŋ,’ yeŋ hi? Irde, ‘Nanne hitte kweŋ tihim,’ yeŋ hi?” yeŋ kadam gusuŋaŋ gird tiyamiŋ. ¹⁸ Mel gobe goke gusuŋaŋ po heŋ heŋbe, “Yeŋ beləŋ, ‘Muŋ kura heŋbe,’ gwaha yeŋ hi gobe daniŋ wor po yeŋ yeŋ hi? Neŋbe gwaha yeŋ hi yeŋ bininiŋ bak ma yeŋ hi,” yeŋ kadam gusuŋaŋ gird tiyamiŋ.

¹⁹ Be, Yesu go mere tiyyiŋ goke komatmiŋ yago beləŋ gusuŋaŋ irtek heke yeneŋbe, “Deŋ gayen ne beləŋ, ‘Muŋ kura heŋbe ma nennayiŋ gega, gor mat muŋ kura hitneŋ teŋbe nennayiŋ,’ yihim goke gusuŋaŋ nirniŋ teŋ haŋ? ²⁰ Fudinde wor po diŋeŋ hime, megen niŋ marbe ne kameŋ goke amaŋ hekeb deŋbe ne niŋ buniŋeŋ nurde esiŋayiŋ. Fudinde, deŋ beləŋ ne kammeke goke kandukneŋ nurnayiŋ. Goyenbe kamebe amaŋ henayiŋ. ²¹ Bere kura diriŋ kawaŋ kertek nalumiŋ forok yekeb diriŋ kawaŋ kere yeŋbe uliŋ misiŋ kurun katyeŋ. Goyenbe diriŋmiŋ go kawaŋ hekeb goke amaŋeŋ nurdeb uliŋ misiŋ katyeŋ goke biŋ sir yiyyeŋ. ²² Niŋgeb gwahade po deŋ wor haŋka gabe kandukneŋ nurde haŋ. Gega sopte waŋ denmekeb goyenter mat amaŋ wor po heŋ hinayiŋ. Irkeb al kura beləŋ amaŋtiŋ goyen epte ma goraŋ diryeŋ. ²³ Goyenterbe det kura niŋ ne ma gusuŋaŋ nirnayiŋ. Fudinde wor po diŋeŋ hime, deŋner det kura niŋ Nanne gusuŋaŋ irnayeŋ kurun gobe dunyeŋ. ²⁴ Meheŋde ne gama niraŋiŋde mat waŋ waŋ haŋkabe ne deŋner det kura niŋ ma gusuŋaŋ irde haŋyeŋ. Goyenbe haŋka matbe ne deŋner gusuŋaŋ irde hinayiŋ. Irkeb det niŋ gusuŋaŋ irde hinayiŋ kurun goyen duneŋ hiyeŋ. Irkeb goke amaŋeŋ wor po nurde hinayiŋ.

²⁵ “Nebe maya mere mat mere dirde himyen. Goyenbe nalu kura forok yekeb sopte ma maya mere mat mere dirde heŋ. Nanneŋbe kawaŋ po mere dirde heŋ. ²⁶⁻²⁷ Al Kurunbe deŋ gayen bubulkuŋne wor po yeŋ nurde duneŋ hi. Niŋgeb go nalurebe ne deŋner dindikeŋ gusuŋaŋ irde hinayiŋ. Ne beləŋ po deŋ ge teŋ Nanne gusuŋaŋ ireŋ ma diŋeŋ hime. Deŋbe ne niŋ amaŋeŋ nurde haŋyeŋ, irdeb nebe Al Kurun hitte mat

wamiriŋ goyen fudinde yeŋ nurde haŋyen geb, Adone beleŋ deŋ gayen bubulkuŋne wor po yeŋ nurd duneŋ hi geb, gago dineŋ hime. ²⁸Nebe Adone hitte mat megen gar wamiriŋ. Irdeb haŋka gab megen ga tubul teŋ Nanne hitte mulgaŋ heweŋ tihim,” yiniŋ.

²⁹Irkeb komatmiŋ beleŋbe, “Be, mere dirha gabe ufurkuŋ mat ma dirde mere keŋkelak po dirha. ³⁰Gebe det kuruŋ ga nurde ha geb, al kura beleŋ dufay guntek moŋ yeŋ genhet. Niŋgeb gebe Al Kuruŋ hitte mat wayariŋ goyen fudinde yeŋ nurde hite,” inamiŋ. ³¹Irkeb Yesu beleŋ wol heŋbe, “Be, haŋka gab dufaytiŋ tareŋ irhet yahaŋ. Gega keŋkela heŋ ga hinayiŋ! ³²Deŋ gayen burgagaw kertek nalu forok yeweŋ tiya geb. Go nalu gobe gago bikkeŋ forok yihi. Irkeb nubil teŋ burgagaw kerde tiyuŋtiŋyaŋ tiyuŋtiŋyaŋ kunayiŋ. Goyenbe nebe nuŋkureŋ ma hime, Nanneya tumŋaŋ har. ³³Mere gabe neya heŋ bitiŋ kamke igiŋ hinayiŋ yeŋbe gago momoŋ dirhem. Megen garbe kanduk yeneŋ hinayiŋ. Goyenbe ne beleŋ megen niŋ tareŋ go fole irmiŋ geb, kanduk goke yul ma yenayiŋ, saŋiŋ po heŋ hinayiŋ,” yiniŋ.

Yesu beleŋ komatmiŋ ge teŋ Al Kuruŋ gusuŋaŋ iryiŋ

17 ¹Be, Yesu go gwaha yineŋbe kotaŋ kaŋ Al Kuruŋ gaha inyiŋ: “Ado, nalube gago forok yihi. Urge deŋem turuŋ yaŋ goyen kawan irayiŋ. Gogab ne Urge gare wor deŋge turuŋ yaŋ goyen kawan ireŋ. ²Ge beleŋ megen niŋ alya bereya kuruŋ gayen doyaŋ yird yird tareŋ gobe ne nunariŋ. Gogab alya bereya ne nunariŋ goyen geya hugineŋ heŋ heŋ goyen yuneŋ. ³Geya hugiŋ heŋ heŋ gote beleŋbe gahade: al beleŋ Al Kuruŋ fudindebe ge guŋkureŋ po ha yeŋ nurd guneŋ haŋ, irde ne Yesu Kristu gayen ge beleŋ nad nerke wamiriŋ yeŋ nurd nuneŋ haŋ gobe geya hugineŋ heŋ heŋ gote beleŋ. ⁴Nebe megen gar meten nunariŋ gobe pasi irmiŋ. Gwaha matbe saŋiŋge turuŋ yaŋ goyen al yikala yirmiŋ. ⁵Niŋgeb, Ado, haŋkabe ge hitte kweŋ tihim geb, megen ga ma forok yiriŋya geya heŋya saŋiŋne turuŋ yaŋ hinhem gwahade goyen po nirayiŋ.

⁶“Be, nebe megen niŋ mar hitte mat alya bereya basaŋa yirde nunariŋ mar goyen hitte gebe al gwahade yeŋ kawan po yikala yirde himyen. Mel gobe gere. Ge beleŋ ne nunkeb merege momoŋ yirmeke nurdeb gama irde haŋyen. ⁷Gayenterbe det kuruŋ ge beleŋ nunariŋ gobe ge hitte mat po watiŋ yeŋ nurde haŋ. ⁸Ge beleŋ mere gwahade yinayiŋ ninariŋ goyen yinmekeb fudinde yeŋ nurde haŋ. Irdeb nebe ge hitte mat wamiriŋ gobe fudinde wor po yeŋ nurde haŋ. Mel gabe ge beleŋ nad nerke wamiriŋ goyen wor fudinde yeŋ nurde haŋ.

⁹“Nebe mel gayen faraŋ yurayiŋ yeŋ gusuŋaŋ girde hime. Megen niŋ mar goke ma gusuŋaŋ girde hime. Ge beleŋ ne nunariŋ mar gobe gere niŋgeb, yeŋ ge po teŋ gusuŋaŋ girde hime. ¹⁰Nere alya bereya

kuruj gobe gere, irde gere alya bereya kuruj go wor nere. Ningeb mel gare deŋne turuj yaŋ wor po goyen kawan irde haŋyen.

¹¹Nebe megen gar ma heŋ tihim, ge hitte hurkeŋ. Goyenbe mel gabe megen gar hinayiŋ. Ado, gebe al wukkeŋ wor po, mata buluŋgem moŋ. Gebe tareŋge yaŋ, irde tareŋge goyen ne nunariŋ. Ningeb saŋiŋger mel ga doyaŋ yirde hike al buluŋ beleŋ epte ma buluŋ yirnayiŋ. Gogab geya neya unŋkureŋ har gwahade goyen po, yeŋ wor awalikde po hinayiŋ. ¹²Neb mel gaya tumŋaŋ heŋyabe tareŋ nunariŋ gore po doyaŋ yirde petpet yirde himekeb igiŋ hinhan. Irdeb al kura ma timiymin. Goyenpoga al kura bikkeŋ gwaha tiyyeŋ yeŋ asanger katiŋ goyen fudinde forok yeŋ yeŋ ge teŋbe al unŋkureŋ po ga mabok hiyuŋ.

¹³“Be, gabe ge hitte hurkutek heŋ hime. Goyenbe amaŋ heŋ himyen gwahade po mel gayen wor amaŋ heŋya hiwoŋ yeŋ mere kuruj gago girhem. ¹⁴Mel gabe merege momoŋ yirmeke gama irde haŋyen. Irkeb megen niŋ mar beleŋ haram yirde haŋyen. Gobe neb megen niŋ al moŋ gwahade goyen po, yeŋ wor megen niŋ al moŋ geb, gogo haram yirde haŋyen. ¹⁵Goyenbe mel gayen megen gar mat yade siŋa yirke kanduk kura ma yeneŋ hinayiŋ yeŋ ma gineŋ hime. Gwaha titŋeŋbe al buluŋ beleŋ buluŋ yird yird niŋ pet pet yirde hayiŋ yeŋ gusuŋaŋ girde hime. ¹⁶Nebe megen niŋ moŋ gwahade goyen po, mel gayen wor megen niŋ mar moŋ. ¹⁷Meregebe fudinde wor po. Ningeb mereger mel ga saba yirke delger wukkeŋ henayiŋ. ¹⁸Ge beleŋ nad nerke megen gar wamiriŋ gwahade goyen po, ne beleŋ wor mel gayen yad yermeke megen niŋ alya bereya hitte kunayiŋ. ¹⁹Nebe mel gayen manaŋ gere kudiŋeŋ wor po henayiŋ yeŋ nurdeb yeŋ ge teŋ nigeŋ gayen wa guneŋbe gigen kudiŋeŋ wor po hitiŋ hime.

²⁰“Be, gusuŋaŋ girde hime gabe mel gake po moŋ. Kame mel gare mere tagalke meremiŋ nurde ne niŋ dufaymin tareŋ irnayiŋ mar goke wor gusuŋaŋ girde hime. ²¹Gogab, Ado, gebe neya hirekeb ne wor geya har gwahade goyen po, mel gayen wor gwahade po heŋ awalikde hinayiŋ. Irdeb mel gabe deyyat awalik bana hiwoŋ yeŋ gusuŋaŋ girde hime. Irkeb ge beleŋ nad nerke wamiriŋ goyen megen niŋ mar beleŋ fudinde yeŋ nurnayiŋ. ²²Ge beleŋ deŋne turuj yaŋ iraŋ gwahade po, ne wor mel ga gwaha yirhem. Gogab deyyabe unŋkureŋ har gwahade goyen po, yeŋ wor gwahade po heŋ awalikde hinayiŋ. ²³Mel gore fudinde wor po awalikde hiwoŋ yeŋ nurdeb gebe neya hireŋ, irkeb nebe yeŋya hitek. Gogab al hoyaŋ gore ge beleŋ nad nerke wamiriŋ yeŋ nurnayiŋ. Irde ge beleŋ ne niŋ amaŋeŋ nurde ha gwahade goyen po, mel gayen wor amaŋeŋ nurde yuneŋ ha goyen megen niŋ alya bereya beleŋ nurnayiŋ.

²⁴“Ado, ge belej al ne niŋ nunariŋ mar gobe ne heŋ gasuŋde kuŋ gor hiwoŋ yeŋ nurde hime. Irdeb megeŋ ga ma forok yekeya ne gayen bubulkuŋne wor po yeŋ nurd nuneŋbe deŋne turuŋ yaŋ irariŋ goyen mel gare kenwoŋ yeŋ nurde hime. ²⁵Ado, gebe Al Huwak wor po. Megen niŋ marbe ma nurd guneŋ haŋ. Goyenbe nebe nurde guneŋ hime. Irde neya haŋ mar gayen wor ge belej nad nerke wamiriŋ goyen fudinde yeŋ nurde haŋ. ²⁶Ne belej gebe al gwahade yeŋ mel gar haŋ gayen yikala yirde himyen. Irde kame wor gwahade po yikala yirde heŋ. Gogab ge belej bubulkuŋne wor po yeŋ nurd nuneŋ hayen gwahade po, yeŋ wor gwahade po nurd yuneŋ hayiŋ. Irke nigeŋ gayen wor yeŋya hitek,” inyiŋ.

Yesu asogo haniŋde kiryiŋ

(Mat 26:47-56; Mak 14:43-50; Luk 22:47-53)

18 ¹Be, Yesu go Al Kuruŋ mere iryiŋ goyen pasi heŋbe komatmiŋ yagoya Pasoba biŋge nene hinhan gasuŋ go tubul teŋ kwamiŋ. Kuŋ naŋa dukuŋ kura Kidron ineŋ hanŋyen goyen fole irde kurhan kwamiŋ. Siŋa kurhan goŋbe olip he dugu kura hiyen geb, Yesuya komatmiŋya go gor kwamiŋ.

²Be, Yesu asogo haniŋde kiryeŋ al Yudas gobe Yesuya komatmiŋ yagoya haŋkayeŋ haŋkayeŋ gor gabu irde hanŋyen goyen nurde hiyen geb, Yesube gor hi yeŋ nuryiŋ. ³Niŋgeb Yudas go Roma niŋ fuleŋa marya Al Kuruŋ doloŋ ird ird mata doyaŋ mar pris buda gote karkuwaŋmiŋya Farisi marya belej hulyaŋ yiramiŋ mar goyen yade Yesu hinhinde gor wayyiŋ. Mel gobe hulsiya fuleŋare niŋ detya yade wayamiŋ.

⁴Be, Yesu go uliŋde mata gwahade forok yeweŋ tiya yeŋ nurde hinhin geb kuŋbe, “Ganuŋ niŋ wor po nurde wayhaŋ?” yineŋ gusuŋaŋ yiriŋ. ⁵Irkeb mel gore, “Nasaret niŋ al Yesu,” inamiŋ. Irkeb wol heŋbe, “Al gobe ne gago,” yinyiŋ. Yesu asogo haniŋde kiryiŋ al Yudas gobe go mar goya hinhan. ⁶Be, Yesu belej, “Al gobe ne gago,” yinkeb mel gobe tulfut yeŋbe harhok mat mulgaŋ heŋ megen katamiŋ. ⁷Irkeb sopte gusuŋaŋ yirdeb, “Ganuŋ niŋ wor po nurde wayhaŋ?” yinyiŋ. Gwaha yinkeb mel goreb, “Nasaret niŋ al Yesu,” inamiŋ. ⁸Irkeb wol heŋbe, “Al goyenbe ne gago dinhem. Ne niŋ naŋkeneŋ haŋ kenem al neya haŋ gabe yubul tike kunaŋ,” yinyiŋ. ⁹Mere tiyyiŋ gobe haŋkapy Galili hinhinyabe, “Nebe al kura ge belej nuntiŋ goyen kura ma pel irmiŋ,” yiriŋ goyen gogo forok yiriŋ.

¹⁰Be, goya goyenbe Pitabe fuleŋare niŋ bidila dirŋeŋ miŋyaŋ geb, bidilamiŋ go marde teŋbe pris buda gote kuruŋmiŋde meteŋ al kura gote kirmiŋ yase sapa iryiŋ. Meteŋ al gote deŋembe Malkus. ¹¹Be, Pita go gwaha tikeb Yesu belej, “Bidilage go fokmiŋ bana hawa! Gebe ne gayen Adone belej kanduk tawayiŋ ninyiŋ goyen go ma tiyyeŋ yeŋ nurde ha? Moŋ, teweŋ geb,” inyiŋ.

Yesube pris buda gote kurunminj Anas hitte tukaminj

¹²Be, Roma nin fulenja marya gote doyanj alyabe^k Yuda marte doyanj mar belej hulyanj yirke wayaminj mar belej Yesu taminj. Irdeb haniñ fere tenbe ¹³Anas hitte wa tukaminj. Anasbe Kaiafas tenjak. Irde Kaiafasbe goyen damare gobe yen belej pris buda gote kurunminj heñ metenj tenj hinhin. ¹⁴Kaiafas goreb hanjkapya, “Nananiniñya nenj almemya tumñanj buluj hetek gobe iñij moñ. Niñgeb al unjkurenj gare po kamyenj gab kanduk kuruj goyen ma kentek,” yinyinj al go goyen.

Pita belej hanjkapya Yesu niñ helwanj hiriñ (*Mat 26:69-70; Mak 14:66-68; Luk 22:55-57*)

¹⁵Be, Saimon Pitaya Yesuyen komatminj hoyanya kura goyen Yesu fere tenbe tenj kwaminj goyen gama iraryum. Komatminj kura gobe pris buda gote kurunminj belej nurd unenj hiyen geb, al gobe pris buda gote kurunminj ya kuruj koya milgu irtinjana banja gonj sawsawa al gabu irde hanjyende gor Yesu tenj hurkukeb yenj wor kame gama yirde hurkurin. ¹⁶Be, Pitabe ya go milgu irtinjana koya gote yamere gor huwarde hinhin. Irkeb kadom, pris buda gote kurunminj belej nurd unenj hiyen al goreb mulganj heñ katenbe yamere gor metenj tenj hinhin bere goyen mere irdeb Pita go tenj koya binde hurkurin. ¹⁷Be, Pita go hurkunj hikeb yamere hinhin bere gore, “Yesu inenjan hanjen al gote komatminj kurabe ge gago?” inenjan gusunjan irinjan. Irkeb Pita belej wol henbe, “Moñ, ne moñ,” ininjan. ¹⁸Be, nana menek wor po hiriñ geb, ya goyenter ninj metenjan marya Al Kurunjen ya balem doyanjan marya go ulinjan uka yirninjan yenj kak kawaldebe goyen kalyanjan kerde huwarde hinhan. Irkeb Pita mananjan yenja gor huwarde kak katenjan hinhin.

Pris buda gote kurunminj belej Yesu gusunjan irinjan (*Mat 26:59-66; Mak 14:55-64; Luk 22:66-71*)

¹⁹Be, mel go gwaha tenj hikeyabe pris buda gote kurunminj belej Yesu go komatminjan sabaminjan ninjan gusunjan irinjan. ²⁰Irkeb Yesu belej wol henbe, “Nebe megen ninjan alyabe bereyabe kawan po mere yirde hinhem. Nebe Yuda marte gabu yayanjan, irde kurabe Al Kurunjen ya balem bana gor saba yirde hinhem. Yuda mar dare gabu irde hanjyende goyanjan huginjan kunjan kawan po saba yirde hinhem. ²¹Gega daniñ gusunjan nirde ha? Merene nurde hinhan mar hitte kunjan gusunjan yirayinjan. Yenjan gab mere tenjan hinhem goyen nurde hanjan geb,” yinyinjan.

²²Be, Yesu go gwaha yinkeb Al Kurunjen ya balem doyanjan al kura yenjan binde hinhin goreb kiminjan senjan urinjan. Irdeb, “Pris buda gote kurunminjan

^k 18:12 Roma nin fulenja marte doyanjan al gayenbe fulenja mar 1,000 gote doyanjan al.

gayen gwaha mat ma mere irde hanjen gega, daha inhabe gago?” iniyin. ²³Irkeb wol heñbe, “Mere bulun kura tihim kenem mere daminbe bulun goyen momon nira. Gega mere tihim gayen fudinde tihim kenem danin mununha?” iniyin.

²⁴Be, Anas beleñ Yesu go haniñ fere titinñde gwahade po pris buda gote kurunmin hoyan kura Kaiafas hitte wor ten kunan yinke ten kwamin.

Pita go sopte Yesu niñ helwan hiriñ
(*Mat 26:71-75; Mak 14:69-72; Luk 22:58-62*)

²⁵Be, Saimon Pita go huwarde kak katen hikeyab al kura beleñ, “Al gote komatmin kurabe ge gago?” inen gusunan iramin. Irkeb Pita go wol heñbe, “Mon, ne mon geb,” inen helwan hiriñ. ²⁶Irkeb pris buda gote kurunmin gote meten al kura, Pita beleñ kirmin sapa iryin al gote kadom goreb, “Gebe Olip dugure gor yenya hike genhem,” iniyin. ²⁷Gwaha inkeb Pita go teban helwan hiriñ. Irkeb goya goyen po tatirok mere tiyyin.

Yesube Pailat diliñ mar huwaryin
(*Mat 27:1-2,11-31; Mak 15:1-20; Luk 23:1-5,13-25*)

²⁸Be, Yuda marte doyan mar beleñ Yesu ten Kaiafasyen yare mat Roma gabman al Yuda mar doyan yirde hiyen al gote ya kurunde tukamin. Goya goyabe nana fay urde wuk yirin. Irkeb Yuda mar go, “Monjo al min hoyande yare kunbe Al Kurun diliñde tikiñ minyan hetek,” yen yingenñde saba gama irnin yenbe Roma gabman al gote ya binde ma hurkamin. Gobe Pasoba bingene nen nalu kurun goyen netek yen nurde tiyamin. ²⁹Ningeb Pailat yingen sinare katenbe, “Da misinde al ga merem yan irnin yen tawayhan?” yinen gusunan yiryin. ³⁰Irkeb al buda gore wol heñbe, “Al gayenbe mata bulun kura ma tiyun manhan ge hitte gaha ma tawatewon,” inamin. ³¹Irkeb wol heñbe, “Dindiken tukun matatinde ga merere kernañ,” yinyin. Irkeb mel gore, “Goyenbe nenbe al maymay sanjinninin minmon,” yamin. ³²Mata gobe Yesu beleñ gwaha mat kamen yen bikken mere tiyyin goyen go fudinde heñ heñ niñ gogo tiyamin.

³³Be, Pailat go mulgan heñ yamin kurunde hurkunbe Yesu hoy iryin. Irke hurkukeb gusunan iryin. “Ge gayen Yuda marte doyan al kurun?” iniyin. ³⁴Irkeb Yesu beleñ, “Mere taha gobe dufayger po forok yihi ma al hoyan beleñ momon giran?” iniyin. ³⁵Irkeb Pailat beleñ wol heñbe, “Nebe Yuda mar al mon. Ningeb daha mat nuren? Merere girnin yen gawayhan marbe gigen al goya pris buda gote karkuwanminya gore po gawayhan. Ningeb gebe daha wor po tiyan?” iniyin. ³⁶Gwaha inkeb, “Ne beleñ alya bereya doyan yirtek gobe megen gar niñ mon. Megen gar niñ manhan Yuda marte doyan mar beleñ nad fere tiniñ yen wakeb meten marne beleñ ne basina fulen tiwon. Goyenpoga gwahade mon geb, gogo gwaha ma tahan,” iniyin. ³⁷Irkeb Pailat beleñ, “Be, gwahade geb, gebe doyan

al kurun!” inyiŋ. Irkeb wol heŋbe, “Doyaŋ al kurun ninha gobe fudinde ninha. Fudinde, nebe miŋ goyen goke wor po megen gar wamiriŋ. Irde mere fudinde goyen tagaleŋ yeŋ wamiriŋ. Niŋgeb al kura mere fudinde niŋ amaŋeŋ nurde haŋ marbe tumŋaŋ merene nurde haŋ,” inyiŋ. ³⁸Irkeb Pailat beleŋ, “Mere fudinde gobe da?” ineŋ gusuŋaŋ iryiŋ. Gwaha ineŋbe Yuda mar hitte siŋare sopte kateŋbe, “Nebe al ga gwaha mat kura mere uliŋde irtek yeŋ ma kenhem. ³⁹Goyenbe dende matarebe Pasoba gabu nalu kurundeb ne beleŋ mata buluŋ mar koyare haŋyen goyen unŋkureŋ kura teŋ siŋa irde duneŋ himyen. Niŋgeb, ‘Yuda marte doyaŋ al kurun’ ineŋ haŋyen al gayen tubul timeke siŋare kuyeŋ yeŋ nurde haŋ?” yinyiŋ. ⁴⁰Irkeb al buda kurun go tareŋ po, “Moŋ, yeŋ moŋ! Neŋbe Barabas dunayiŋ,” inamiŋ. Barabasbe Roma gabman asogo irde hiyen goke teŋ koyare keramiŋ hinhin.

19 ¹Be, mel gore gwaha yekeb Pailat go Yesu go teŋ usulak tinaŋ yeŋ fuleŋa marmiŋ yinke usulak tiyamiŋ. ²Irdeb doyaŋ al kurunyen tonan umŋa irhet yeŋ kaŋ hirwaŋeŋ yaŋ kura goyen teŋ tukuli teŋbe tonaŋde keramiŋ. Irdeb doyaŋ al kurunyen amil umŋam bukkenya digulakya suluk irke bukken yaŋ hitiŋ goyen tawaŋ hor irde unamiŋ. ³Irdeb Yesu hitte kuŋ, “Gebe Yuda marte doyaŋ al kurun. Hugiŋeŋ hayiŋ!” ineŋ tebaŋ irde giwgiw irde hinhan. Irdeb kimiŋde wolseren uramiŋ.

⁴Be, Pailat go sopte siŋare kateŋbe Yuda mar goyen, “Mel, nebe mere miŋ goke kura al gayen merem yaŋ irtek yeŋ ma nurdeb gago deŋ hitte taktehem,” yinyiŋ. ⁵Irdeb Yesu go doyaŋ al kurun umŋa irtiŋ yaŋ irhet yeŋbe amil umŋam bukkenya digulakya suluk yirke bukken yaŋ hitiŋ kura hor irde uneŋ, kaŋ hirwaŋeŋ yaŋ tukuli teŋ tonaŋde kirtiŋde po siŋare kateŋ hike keneŋbe, “Al gobe gago,” yinyiŋ.

⁶Be, pris buda gote karkuwaŋminiŋya Al Kurunyen ya balem doyaŋ marya beleŋ Yesu go keneŋbe, “Kuruse hende mayke kami! Kuruse hende mayke kami!” yeŋ hekhok tiyamiŋ. Irkeb Pailat beleŋ wol heŋbe, “Nebe mere miŋ goke kura merem yaŋ irtek ma kenhem geb, dindikeŋ ga tukun kuruse hende maynayiŋ,” yinyiŋ. ⁷Irkeb Yuda mar gore wol heŋbe, “Al gore yinŋeŋ ge yeŋ, ‘Nebe Al Kurun Urmiŋ,’ yeŋ hiyen geb, nende sabarebe al gwahade gobe kamyen,” inamiŋ.

⁸Be, Pailat go gwaha yeke nurdeb kafura wor po hiriŋ. ⁹Irdeb ya biŋde sopte mulgaŋ heŋ hurkunbe, “Gebe dare niŋ?” ineŋ gusuŋaŋ iryiŋ. Goyenbe Yesube wol ma hiriŋ. ¹⁰Irkeb Pailat beleŋ, “Mere nirtek ma gira? Kuruse hende mayke kami yeweŋ gobe gwaha girnayiŋ. Munan tubul tike kwi yeweŋ go wor gwahade po girnayiŋ goyen go ma nurde ha?” inyiŋ. ¹¹Irkeb Yesu beleŋ wol heŋbe, “Al Kurun beleŋ ge goyen doyaŋ nird nird saŋiŋ goyen ma guntiŋ manhan ge beleŋ gaha ma doyaŋ nirwoŋ. Niŋgeb ne nade hanger nera al gote mata bulunbe gere folek geb,” inyiŋ.

¹²Be, mere go nurdeb Pailatbe Yesu go daha mat kura tubul timeke kwi yeŋ nuryiŋ gega, Yuda mar gob hewhow po teŋ, “Al kura al gayen tubul tike kuyenbe al gobe Roma gabman doyaŋ al kuruŋ Sisaryen kadam moŋ, asogom geb,” inamiŋ. ¹³Gwaha yeke Pailat go nurdeb Yesu go siŋare takteŋbe ya kuruŋ gote koya bana sawsawa mere nurd nurd gasuŋ kura “Belen Hora Po Irtiŋ” ineŋ hanjende gor kipiryiŋ. Gasuŋ gobe Hiburu mere matbe Gabata. ¹⁴Be, nalu gobe Pasoba biŋge gitik teŋ teŋ nalu, irde naŋabe baŋkahal gwahade heweŋ tiyyiŋ. Munan fay urkeb Sabat nalu heke Pasoba biŋge netek hiyyeŋ. Be, Pailat belen Yuda mar goyen, “Doyaŋ al kurunŋteŋbe gago,” yinyiŋ. ¹⁵Goyenbe go mar goreb, “Mayke kami! Mayke kami! Kuruse hende mayke kami!” ineŋ hewhow tiyamiŋ. Irkeb Pailat belen, “Doyaŋ al kurunŋteŋ gayen ne belen kuruse hende maymeke kami yeŋ nurde haŋ?” yineŋ gusuŋaŋ yiryiŋ. Irkeb pris buda gote karkuwaŋmiŋ belen wol heŋbe, “Neŋbe doyaŋ al kurunŋniniŋ hoyan kura ma hi. Nendebe Sisar unŋkureŋ po hi,” inamiŋ.

¹⁶Be, Pailat go gwaha kura irtek miŋmoŋ hekeb bada heŋ kuruse hende mayke kami yeŋ mel goke pel iryiŋ. Irkeb fulenja mar belen Yesu tamiŋ.

Yesu kuruse hende kamiŋ

(Mat 27:32-44; Mak 15:21-32; Luk 23:26-43)

¹⁷Be, Yesu go kuruse go teŋbe naŋa deŋe kura Al Tonaŋ Kiŋkiniŋde gor kuriŋ. Deŋe gobe Hiburu mere matbe Golgota. ¹⁸Gorbe Yesu go kuruse hende mayamiŋ. Yenyaŋbe al irawa hoyan kura goyen wor yingenŋde yingenŋde kuruse hereŋ gasa yirdeb kurabe Yesuyen kuruse yase belen kerde kurabe tapa belen keramiŋ. Yesu yingenŋbe kahalte keramiŋ.

¹⁹Be, Pailat belen mere kura kaŋbe kuruse hende Yesu tonaŋ belen kernaŋ yinke keramiŋ. Merebe gahade:

NASARET NIŊ AL YESU. YUDA MARTE DOYAŊ AL KURUŊ.

²⁰Be, Yesu kuruse hende mayamiŋ gasuŋ gobe Yerusalem bindere hinhin. Niŋgeb Yuda mar budam mere go kenamiŋ. Mere gobe Hiburu mere, Latin mereyabe Grik mereya mat kayamiŋ. ²¹Irkeb pris buda gote karkuwaŋmiŋ belen mere katiŋ goke igiŋ ma nurdeb Pailat goyen, “Yuda marte doyaŋ al kurunŋ ma kayayiŋ. ‘Al garebe yingenŋ ge yeŋ ‘Nebe Yuda marte doyaŋ al kurunŋ,’ yeŋ hi,’ gwahade kayayiŋ,” inamiŋ. ²²Goyenbe Pailat belen wol heŋbe, “Mere kayhem gobe gwahade po hiyeŋ,” yinyiŋ.

²³Be, fulenja mar go Yesu teŋ kuruse hende kerdebe uliŋ umŋamiŋ yade al sipte niŋ gale heŋbe nende gigen yawaramiŋ. Irdeb uliŋhormiŋ bande niŋ gobe tubul tiyamiŋ. Uliŋhormiŋ gobe sobam, biŋiŋde mat kurkuŋbe kahan patare goyenbe gada irtiŋ moŋ. Amil unŋkureŋ po teŋ uliŋhor goyen irtiŋ. ²⁴Be, fulenja mar gob uliŋhormiŋ goke yingenŋ uliŋ, “Ga goya erek ma irtek. Ganuŋ belen tiyyeŋ yeŋ nende matare tiliŋ

tanartek,” yamiñ. Mata gobe Al Kurunyen asande mata gwahade forok yiyyen yen katiñ gwahade po forok yiriñ. Merebe gahade:

“Mel gore ulne umña yingen uliñ pota yirdeb uliñhornenbe tiliñ
tanaramiñ,” yitiñ hi.

Tikiñ 22:18

Ningeb yitiñ gwahade po fulenña mar beleñ mata gogo tiyamiñ.

²⁵ Be, kuruse hinhin bindere gorbe Yesu miliñ, miliñde haymiñ Klopas berem Mariayabe Makdala niñ Maria gore gor huwarde hinhan. ²⁶ Irkeb Yesu go miliñ gor kinyiñ. Irde komatmiñ kura bubulkuñne wor po yen nurde uneñ hinhin al go bindere gor huwarde hike kinyiñ. Irdeb miliñ goyen inyiñ. “Bere, al gabe urge,” inyiñ. ²⁷ Irdeb komatmiñ gobe, “Gabe momke,” inyiñ. Be, gor mat hinhin kurun gobe komatmiñ gore Yesu miliñ go tej yamiñde tukuñ doyan irde hinhin.

Yesu kamyiñ

(Mat 27:45-56; Mak 15:33-41; Luk 23:44-49)

²⁸ Be, komatmiñ inyiñ kamereb metenmiñ kurun gob pasi irhem yen nurdeb Al Kurunyen asande mere katiñ goyen fudinde forok yiyyen goke tenbe, “Fe niñ nira,” yiriñ. ²⁹ Irkeb gorbe wain fimiñ mukkuwen wor po hitiñ hinhin geb, mel gore amil parwek kura tej wain bana gon fakamde hisop he kutum murunde bili irdeb isañ heñ Yesu dinonde kiryiñ. ³⁰ Irkeb Yesu go wain fimiñ go ninam urdeb, “Meteneb pasi irhem,” yiriñ. Be, mere go muñ po yenbe urgun kanbe kamyiñ.

³¹ Be, go nalu gobe Pasoba bingge gitik tej tej nalu. Munañ fay urkeb Sabat nalu heke Pasoba bingge netek hiyen. Ningeb Yuda mar go Sabat nalure al kuruse hende po hinayiñbe igiñ moñ yen nuramiñ. Irdeb Pailat gusunañ irdeb, “Kahan yufun tenbe al hakwa go yarañ tiniñ,” yamiñ. ³² Irkeb Pailat go fulenña marmiñ yinke Yesu ketalde kuruse hende hinhin al kura go hitte wa kuñbe kahan yufun tiyamiñ. Irde gab kura wor gwahade po iramiñ. ³³ Goyenbe wan Yesu hitte hamiñ gega, bikken kamtiñ kenenbe kahan ma yufun tiyamiñ. ³⁴ Gwaha irtiñenbe fulenña al kura beleñ hakde dari malare fakamke goyare po dariya feya bemel po sursur yiriñ. ³⁵ (Mata go kinyiñ al goreb goke al momoñ yirde hiyen. Meremiñbe fudinde. Yenbe fudinde po yen hime yen nurde hi. Yenbe den asañ ga kapyañ heñ hañ mar beleñ fudinde yen nurnayiñ yenbe gago momoñ dirde hi.) ³⁶ Be, mata go forok yiriñ gobe Al Kurunyen asande, “Kiñkiniñ unkuñen muñ kura ma yufun tinayiñ,” yitiñ gwahade goyen po forok yiriñ. ³⁷ Irde Al Kurunyen mere kurabe, “Yenbe hakde gegelhek beleñ fakamtiñ kennayiñ,” yitiñ mata gwahade goyen po forok yiriñ.

Yesu mete tiyamiñ

(Mat 27:57-61; Mak 15:42-47; Luk 23:50-56)

³⁸ Be, fulenña mar beleñ gwaha tiyamiñ kamereb Arimatea niñ Yosep beleñ Yesu uliñ hakwam niñ Pailat gusunañ iryiñ. Yosepbe Yesuyen

komat gega, Yuda marte doyan mar niŋ kafura heŋbe balmin po hinhin. Be, Pailat beley igiŋ inkeb kuŋ Yesu hakwam go yenya kwamin marya beley taran tenbe ten kwamin. ³⁹Yosep beley gwaha ten hikeya Nikodemus wor gor hinhin. Nikodemusbe hakot kura wawuŋ kuŋ Yesuya mere tiyaryum al go goyen. Yen beley he fimiŋ irawa suluk yirde guram irtiŋ hamiŋ igiŋ wor po goyen ten wayyiŋ. Guram gote kandukminiŋbe 30 kilogram gwahade. ⁴⁰Be, irem go Yesu hakwam go ten kuŋbe amil faykek mete ten tenŋe niŋ amil gore po bili iraryum. Irde gwaha ten heŋyabe he fimiŋ guram irtiŋ gore po sam iraryum. Irem gobe Yuda marte mata gama irdeb gwaha tiyaryum. ⁴¹Be, Yesu kuruse hende mayamiŋ gasuŋ go binderebe he dugu kura hinhin. He dugu bana goŋbe al hakwa yukun yerd yerd horabok bamba kura hinhin. Bamba gobe gergeŋ, al hakwa kura ma yerde hitiŋ. ⁴²Be, heŋ ga moŋ Sabat nalu forok yeweŋ tiya go yenbe bamba gobe bindere hinhin geb, irem go Yesu hakwam tukuŋ bana gor keraryum.

Yesube kamyinŋde mat huwaryin
(*Mat 28:1-8; Mak 16:1-8; Luk 24:1-12*)

20 ¹Be, Sabat nalu hubu heŋ fay urke Sande hiriŋ. Sande wampot muŋ, kidoma po hikeya Makdala niŋ Maria go bembare kuŋbe hora kurun horabok bamba yame pet titiŋ goyen ten siŋa irtiŋ kinyiŋ. ²Irdeb kup yen Saimon Pitaya kadom kura Yesu beley bubulkuŋne wor po yen nurde uneŋ hinhin al go hitte waŋbe, “Doyan Al Kurun hakwambe bembare mat ten kwahaŋ. Irdeb tukuŋ gor kura kerhan yen ma nurhet!” yiniŋ. ³Irkeb Pitaya kadom hoyan goya wor bembare kwaryum. ⁴Irem gobe kup yen kwaryum. Goyenbe kadom gore Pita fole irde yen wa bembare forok yiriŋ. ⁵Forok yen pew kaŋbe horabok bana nankenenbe amil fayken bili irtiŋ go po kinyiŋ. Goyenbe binde ma hurkuriŋ. ⁶Irkeb Saimon Pita, kame wayyiŋ goreb waŋ binde hurkuriŋ. Irdeb amil fayken go po gor hike kinyiŋ. ⁷Irde Yesu tonaŋ bili iramiŋ amil go wor kinyiŋ. Tonaŋ bili irtiŋ amil gobe uliŋ hakwam bili irtiŋ amil goya ma hinhin. Keŋkela po mupi irde hoyanŋde po kirtiŋ hinhin. ⁸Irkeb Yesuyen komat kura yen wa bembare forok yiriŋ al go wor binde hurkuriŋ. Hurkun gwahade po kenenbe fudinde wor po Yesube kamunŋde mat huwarun yen nuryiŋ. ⁹(Goyenpoga irem gobe Al Kurunyen asanŋde Yesube kamtinŋde mat huwaryen yitiŋ gokeb bebak ma po tiyaryum.)

Makdala niŋ Mariabe Yesu kinyiŋ
(*Mat 28:9-10; Mak 16:9-11*)

¹⁰Be, Yesuyen komatmiŋ waran go mulgan heŋ yamiŋde kwaryum. ¹¹Goyenbe Maria go bamba siŋare gor po heŋ esen hinhin. Esen heŋyabe pew kaŋ bamba bana goŋ nankiniŋ. ¹²Irdeb Al Kurunyen miyon irawa

ulin umga faykek hor yirtin goyen Yesu hakwam kirtin gasunde go keperde hike yinyin. Kurabe tona belen mat, kurabe kaha belen mat keperaryum.

¹³Be, irem goreb, “Bere, gebe dani esen ha?” inen gusungan iraryum. Irkeb bere gore wol henbe, “Doyan Al Kurunbe al kura belen ten kwahan. Irde tukun gor kura kerhan yen ma nurde hime,” yinyin.

¹⁴Gwaha ten fulgan kanbe Yesu go gor huwarde hike kinyin. Goyenbe bebakken Yesu yen ma kinyin. ¹⁵Irkeb Yesu belen, “Bere, gebe dani esen ha? Gebe ganun nin nankenen ha?” inen gusungan iryin. Gwaha inkeb bere goreb he dugu bana gon bamba hinhin gote doyan al yen nurdeb, “Be, ge belen al hakwam bamba bana hinhin go tukan kenem gor tukun kirmin yen momon nira. Irkeb tewen geb,” inyin. ¹⁶Irkeb Yesu belen, “Maria,” inyin. Irkeb bere go yen hinhin belen fulgan kan kenenbe Hiburu mere mat, “Raboni!” inyin. Raboni gote minbe Tisa.

¹⁷Be, Yesu belen, “Nanne hitte mulgan hen minmon. Ningeb sisa ma nurayin. Gwaha titnenbe kolne yago hitte kunbe momon yira. ‘Nebe mulgan hen Adone, denya neyat Al Kurun hitte kwen tihim,’ nina yinayin,” inyin. ¹⁸Irkeb Makdala nin Maria go mere go nurdeb Yesuyen komatmin hitte kurin. Kunbe, “Doyan Al Kurunbe kenhem,” yinyin. Irdeb mere gahade nina yen momon yiriyin.

Komatmin belen Yesu kenamin

(Mat 28:16-20; Mak 16:14-18; Luk 24:36-49)

¹⁹Be, Sande go wawunbana hen kidoma hewen tikeb Yesuyen komatmin gobe Yuda mar nin kafura henbe tumnan ya binde gabu irdeb yame bin mat tare po irdeb hinhan. Irkeb Yesu go wan mel go hinhan kahalte po huwardeb, “Bitin kamke igin po hinayin,” yinyin. ²⁰Gwaha yinenbe haniya gegelhekyare fakamamin delnen goyen yikala yiriyin. Irkeb komatmin go Doyan Al Kurun goyen kenenbe aman nin pultik wor po yamin.

²¹Be, Yesu belen sopte po, “Bitin kamke igin po hinayin. Nanne belen nad nerke wamirin gwahade goyen ne belen wor dad dermeke kunayin geb,” yinyin. ²²Gwaha yinenbe mel go hitte menemin fu yirdeb, “Holi Spirit tenan. ²³Irdeb den belen al kurat mata bulunmin halde yunnayinbe Al Kurun wor mata bulunmin go halde yunyen. Munan mata bulunmin ma halde yunayinbe Al Kurun wor mata bulunmin ma halde yunyen,” yinyin.

Tomas belen Yesu kinyin

²⁴Be, komatmin 12 goyen al kura Tomas, denjem kurabe Didimus inen hanjen al gobe Yesu wayyinyabe gor ma hinhin. ²⁵Irkeb komatmin wen hoyan belen, “Nenbe Doyan Al Kurun kintin,” yen momon iramin.

Goyenbe wol heḡbe, “Haniḡde nil delḡeḡ wor wor yeneḡ. Irdeb nil yame bana goḡ hanne kereḡ. Irdeb hak beleḡ fakamtiḡ yameḡde gor hanne kerde gab fudinde yeḡ nureḡ,” yinyiḡ.

²⁶Be, gor mat naḡa fay 7 hubu hekeb Yesuyen komatmiḡ go sopte ya bana gabu iramiḡ. Tomas wor gor hinhin. Yamebe biḡ mat tatiḡ goyenbe, Yesu go waḡ mel gote diliḡ mar huwardeb, “Bitiḡ kamke hinayiḡ,” yinyiḡ. ²⁷Irdeb Tomas inyiyiḡ. “Hange faw gar hor irayiḡ. Irde hanne ga yena. Irdeb hange giḡ irdeb gegelhekner gar kera. Irdeb dufay budam ma heḡbe ne huwarmiḡ gayen fudinde yeḡ nurayiḡ,” inyiyiḡ. ²⁸Irkeb Tomas gore, “Gebe Al Kurunḡ, Doyaḡ Al Kurunḡne!” inyiyiḡ. ²⁹Irkeb Yesu beleḡ, “Gebe ne neneḡ gab gogo fudinde yeḡ nurha? Al kura go ma neneḡya ne niḡ dufaymiḡ tareḡ irnayiḡ mar gobe Al Kurunḡ beleḡ guram yirde saḡiḡ yiryeyḡ,” inyiyiḡ.

³⁰Be, Yesube komatmiḡ diliḡde mata tiḡeḡ turunḡ yaḡ kurayen kurayen budam forok yirde hinhin. Goyenbe asaḡ gayenter goke tumḡaḡ ma katiḡ haḡ. ³¹Goyenbe Yesube Mesaia, Al Kurunḡ Urmiḡ yeḡbe yeḡ ge dufaytiḡ saḡiḡ irnayiḡ yeḡ mere kurunḡ gayen kayhem. Irde yeḡ ge dufaytiḡ tareḡ irke Yesuyen tareḡde Al Kurunḡya hugiḡeḡ heḡ heḡ mata gobe dende hiyyeyḡ yeḡbe mere gago kaḡ hime.

Komatmiḡ 7 beleḡ Yesu kenamiḡ

21 ¹Be, Yesu go komatmiḡ yago Yerusalem hikeya diliḡde forok yiriḡ kamereb Taiberias fe ala kurunḡ siḡare sopte komatmiḡ diliḡde forok yiriḡ. Gote baraḡbe gahade: ²Be, Saimon Pita, Tomas deḡem kurabe Didimus, Galili naḡa bana niḡ taun Kana gor niḡ al Nataniel, Sebedi urmiḡ waraḡyabe kadom waraḡ hoyay manay tumḡaḡde hinhan. ³Irkeb Saimon Pita beleḡ, “Nebe fe alare dapḡa niḡ kweḡ tihim,” yinyiyiḡ. Irkeb mel goreb, “Tumḡaḡ kutek,” ineyḡbe hakwa bana hurkunḡbe kwamiḡ. Goyenbe go wawunḡbe dapḡa kura ma yawaramiḡ.

⁴Be, wampot muḡ wor po Yesu gobe waḡ makaḡ siḡare huwaryiyiḡ. Goyenbe komatmiḡbe Yesu yeḡ keneḡ bebek ma tiyamiḡ. ⁵Be, Yesu beleḡ mel goyen hokde po, “Mel yo, dapḡa kura yawarhaḡ we?” yinyiyiḡ. Irkeb, “Moḡ,” inamiḡ. ⁶Be, mel gore gwaha inkeb, “Kamaḡtiḡ go hakwa siḡa yase beleḡ mat temeyde gab dapḡa kura yawarnayiḡ,” yinyiyiḡ. Irkeb mel go gwaha teḡbe dapḡa karim ma yawaramiḡ geb, kamaḡ go tulunḡ teḡ hakwa hende kertek ma hamiḡ.

⁷Irke gab komatmiḡ kura Yesu beleḡ bubulkunḡne wor po yeḡ nurde uney hiyen al goreb Pita goyen, “Al irobe Doyaḡ Al Kurunḡ be!” inyiyiḡ. Irkeb Saimon Pita beleḡ, “Al irobe Doyaḡ Al Kurunḡ be!” yeke nurdeb goyare po uliḡhormiḡ hende niḡ tugu titiḡ goyen teḡ uliḡde bili irdeb fete solok yiriḡ. ⁸Irkeb komatmiḡ weḡ hoyayḡbe fe ala kurunḡ fereḡ binde

100 mita gwahade po hinhan geb, hakwa hende kame ga gama irde wayamiŋ. Gama irde waŋ heŋyabe kamaŋ dapŋa beleŋ po making hitiŋ goyen tulun teŋbe teŋ wayamiŋ. ⁹Irdeb fe siŋare waŋbe kak kawaltiŋde kura gorbe makaŋ dapŋaya beretya kura hike yenamiŋ.

¹⁰Be, Yesu beleŋ, “Dapŋa yawarhaŋ go kura yawanaj,” yinyiŋ. ¹¹Irkeb Saimon Pita go hakwa hende hurkun kamaŋ go tulun teŋ fe siŋare kiriŋ. Dapŋa karkuwaŋ beleŋ making hiriŋ. Dapŋabe budam wor po 153 yawaramiŋ. Goyenbe kamaŋ go ma erek yiriŋ. ¹²Be, Yesu beleŋ komatmiŋ goyen, “Waŋ wampotde niŋ biŋge nenaŋ,” yinyiŋ. Goyenbe yeŋbe Doyaŋ Al Kurun yeŋ nuramiŋ geb, komatmiŋ kura beleŋ, “Gebe ganuŋ?” yeŋ gusuŋaŋ ma iramiŋ. ¹³Irkeb Yesu go waŋ beret go teŋbe yunyiŋ. Irdeb dapŋa goyen wor gwahade po iryiŋ. ¹⁴Be, Yesu go kamyiŋde mat huwariŋ, irde komatmiŋ yago hitte forok yiriŋ goyen gare irkeb wawun karwo hiriŋ.

Yesu beleŋ Pita tareŋ iryiŋ

¹⁵Be, komatmiŋ go biŋge nene pasi hamiŋ. Irkeb Yesu beleŋ Saimon Pita go, “Saimon, Yon urmiŋ, ge gayen fudinde wor po ne niŋ amaŋeŋ nurde ha? Mel gar haŋ gare ne niŋ amaŋeŋ nurde haŋ gote folek?” inyiŋ. Irkeb Pita beleŋ wol heŋbe, “Gwaha, Doyaŋ Al Kurun. Gebe ne beleŋ ge niŋ amaŋeŋ nurde hime goyen nurde ha gogo,” inyiŋ. Irkeb, “Sipsipne paka yirde hayiŋ,” inyiŋ. ¹⁶Irdeb sopte po, “Saimon, Yon urmiŋ, gebe fudinde wor po ne niŋ amaŋeŋ nurde ha?” inyiŋ. Irkeb Saimon beleŋ, “Gwaha, Doyaŋ Al Kurun, ne beleŋ ge niŋ amaŋeŋ nurde hime gobe nurde ha gogo,” inyiŋ. Irkeb wol heŋbe, “Sipsipne doyaŋ yirde hayiŋ,” inyiŋ. ¹⁷Be, wawun karwore sopte, “Saimon, Yon urmiŋ, gebe ne niŋ amaŋeŋ nurde ha?” inyiŋ. Irkeb Pita go Yesu beleŋ, “Gebe ne niŋ amaŋeŋ nurde ha?” gwahade wawun karwore gusuŋaŋ irkeb biŋ misiŋ iryiŋ. Irkeb Pita go, “Doyaŋ Al Kurun, gebe det kurun gayen tumŋaŋ nurde ha. Ge niŋ amaŋeŋ nurde hime goyen nurde ha gogo,” inyiŋ. Irkeb Yesu go wol heŋbe, “Sipsipne paka yirde hayiŋ. ¹⁸Fudinde wor po gineŋ hime, ulger igiŋ heŋyabe gigeŋ umŋa teŋ goŋ kura kwe yeŋbe mali ga kun hinhan. Goyenbe salanŋeŋ hawayiŋyabe al beleŋ po ganarde umŋa girdeb ge kutek ma girde hiyeŋ beleŋ goŋ gukunayiŋ,” inyiŋ. ¹⁹Yesu beleŋ go yiriŋ gobe kame Pita daha mat kamyen, irde kamde kamdemiŋ gore Al Kurun deŋem turŋun yaŋ iryen goke inyiŋ. Be, Yesu go gwaha inenbe, “Gama nira!” inyiŋ.

²⁰Irkeb Pita go fulgaŋ kaŋbe Yesu beleŋ komatmiŋ kura bubulkunne wor po yeŋ nurde unen hiyeŋ al goyen gama yirde hike kinyiŋ. Al gobe Yesu kameŋ go yeŋya biŋge funaŋ namiŋya Yesu hitte tawun heŋbe, “Doyaŋ Al Kurun, ganuŋ beleŋ pel giren tiya?” inyiŋ al go goyen. ²¹Be, Pita beleŋ al go kenenbe, “Doyaŋ Al Kurun, munaŋ al gabe daha tiyyen?”

inen gusunan iriyn. ²² Irkeb Yesu belen wol henbe, “Yenbe diliŋ gergen hikeya ne mulgan hewen yen nuren gobe gere samun mon geb. Hoyan niŋ ma dufay hawayiŋ, gama po nirayiŋ,” inyiŋ. ²³ Be, Yesu belen mere tiyyiŋ gote mere momonbe komatmiŋ yago hoyan belen nurdeb kenkela ma bebak tenbe, “Al gobe ma kamyen,” yamiŋ. Gega Yesu belenbe, “Al go ma kamyen,” yen ma yiriŋ. “Yenbe diliŋ gergen hikeya ne mulgan hewen yen nuren gobe gere samun mon geb,” po yiriŋ.

²⁴ Yesuyen komat gobe Yesu belen mata ten hike yinyiŋ kurun goyen asande gar kaya gago. Al gore Yesuyen baran asande gar kan hi kurun gabe fudinde yen nurde hite.

²⁵ Be, Yesube mata hoyan manan budam tiyyiŋ. Asande gar kan hi gayen po mon. Matamiŋ go tumnan katekbe megen gar asan goyen yerd yerd gasun minmon hiyyen yen nurde hime. Gogo po.